

BHIHITA METAA NEBUHINO

MATIUS

Kaatono Wamba

Bhihita Metaa aini nobuhie Matius. Anoa ini seemie mai'aono ne rasulu ompulu hoduanano (Mat 9:9-13). Weo kitabino Markus bhe Lukas dokonae Lewi, seemie mealano sewa (Mrk 2:13-17; Luk 5:27-32). Weo kitabino ini Matius notalesaane putae Yesus maitu Mesias Omputo Fosalamatino, sampu'ano Daud, toka nedhandi'aono Lahata'ala mpini dhamani wawono. Weo kitabi aini Yesus nentela dokonae Anano tawa Sampu'ano Daud (1:1; 9:27; 12:23; 15:22; 20:30-31; 21:9,15; 22:41-45).

Nobhahi dua pakuno Matius notalesaane putae toka nekosuaha'aondo ana-anabii dhamani wawono noko'ulamo ne dadino Yesus. Nentela notibuhi "Aini nokadhadhia mbali noko'ula'ao bhoasaono Ompu nefosampendo anabii" (1:22-23; 2:5-6, 15, 17-18, 23; 3:3; 4:14-16; 8:17; 12:17-21; 13:35; 21:4-5, 16; 26:31; 27:9-10). Pedamo ana'a nentalea sepali'a putae Yesus maitu Omputo Fosalamatino nedhandi'aono Lahata'ala bhe nemantaa-ntaa'aondo miendo Israel.

Weo kitabi aini nandoo lima honda kafoina'u bhalano peda aini:

1. Kafoina'uno Yesus te wawono kabhawo (psl 5-7).
2. Kafoina'uno Yesus ne anaguhu'ino dakumala daefolele Bhihita Metaa (9:35 - 11:1).
3. Kafoina'uno Yesus nepake kapalenda, notalesao ma'anano Kafopahinta'ano Lahata'ala (13:1-52).
4. Kafoina'uno Yesus nopulao'ao sifati medando ae mantasi'ano so mie mangkafie (psl 18).
5. Kafoina'uno Yesus nopulao'ao so kumadhadhia'ano mada kaowu (psl 24 - 25).

Siwulu kamai'ao'ano Yesus Kristus

1:1-17

Luk 3:23-38

1 Pedamo aini siwulu kamai'ao'ano Yesus Kristus sampu'ano Daud, sampu'ano Abraham.

² Abraham nokoana'ao Ishak,
Ishak nokoana'ao Yakub.

- Yakub nokoana'ao Yehuda bhe bhahitie'ino.
- ³ Yehuda nokoana'ao Peres bhe Zerah, neano inando
Tamar.
Peres nokoana'ao Hesron,
Hesron nokoana'ao Ram.
- ⁴ Ram nokoana'ao Aminadab,
Aminadab nokoana'ao Nahason,
Nahason nokoana'ao Salmon.
- ⁵ Salmon nokoana'ao Boas, neano inano Rahab.
Boas nokoana'ao Obed, neano inano Rut.
Obed nokoana'ao Isai.
- ⁶ Isai nokoana'ao Daud, membalino omputo.
Daud nokoana'ao Salomo, anano bhe bhihinandano
Uria.
- ⁷ Salomo nokoana'ao Rehabeam,
Rehabeam nokoana'ao Abia,
Abia nokoana'ao Asa.
- ⁸ Asa nokoana'ao Yosafat,
Yosafat nokoana'ao Yoram,
Yoram nokoana'ao Usia.
- ⁹ Usia nokoana'ao Yotam,
Yotam nokoana'ao Ahas,
Ahas nokoana'ao Hiskia.
- ¹⁰ Hiskia nokoana'ao Manase,
Manase nokoana'ao Amon,
Amon nokoana'ao Yosia.
- ¹¹ Yosia nokoana'ao Yekonia bhe bhahitie'ino,
ne dhamanino kati'oho'ando we witeno Babel.
- ¹² Nopalusi dhamanino kati'oho'ando we Babel,
Yekonia nokoana'ao Sealtiel,
Sealtiel nokoana'ao Zerubabel.
- ¹³ Zerubabel nokoana'ao Abihud,
Abihud nokoana'ao Elyakim,
Elyakim nokoana'ao Asor.
- ¹⁴ Asor nokoana'ao Zadok,
Zadok nokoana'ao Akim,
Akim nokoana'ao Eliud.
- ¹⁵ Eliud nokoana'ao Eleasar,
Eleasar nokoana'ao Matan,

Matan nokoana'ao Yakub.

¹⁶Yakub nokoana'ao Yusuf, mo'aneno Maria.

Maria koana'aonomo Yesus nekonando Kristus.

¹⁷Dadi'anomo kosasawindo siwulu ana'a peda aini: ompulu fato sampu'a nomai'ao ne Abraham ampa ne Daud, ompulu fato sampu'a nomai'ao ne Daud ampa kati'oho'ando we Babel, ompulu fato sampu'a nomai'ao ne kati'oho'ando we Babel ampa ne Kristus.

Kalente'ano Yesus Kristus

1:18-25

Luk 2:1-7

¹⁸Kalente'ano Yesus Kristus pedamo aini. Maria, inano Yesus, nopopohae bhe Yusuf. Miina'o dagumaa'a, gaha'a nofowoowamo hampano Rohino Lahata'ala. ¹⁹Yusuf, pohaeno Maria maitu, seemie melaano lalo. Anoa nokiido namekaambano Maria ne wisendo mie bhahi, dadi'anomo nokopatudhu nabhotuemo popohaendo, tamaka pae naefemata-mataa. ²⁰Gaha'a tangasano notimba-timbang pa-tudhuno maitu, mala'ekatino Ompu nofotiwohamo wutono weo nifi. Ambano mala'ekati maitu, "Yusuf, sampu'ano Daud, koe mote'ia mala Maria so mieno lambumu, kapa'amo ana'i newoowa-no itu nomai'ao ne Rohino Lahata'ala. ²¹Maria nakoana'ao mo'ane, maka kumonae Yesus, kapa'amo Anoamo so mosalamatino umatino mai'ao ne dhosando." ²²Aini nokadhadhia mbali noko'ula'ao bhoasaono Ompu nefosampeno anabii peda aini, ²³"Kotu-kotu'u, seemie kalambe tapa'o popande'aono bhe mo'ane nafowoowa maka nakoana'ao mo'ane. Ana'i aitu dakumonae Imanuel."^a (Ma'anano Imanuel, Lahata'ala nopobhai kaitaomu). ²⁴Hato nowanu, Yusuf noangkafimo pahintano mala'ekatino Ompu na'a. Nowowo'omo Maria mbali mieno lambuno. ²⁵Ampamo kaowu, Yusuf miina napomoodofianea ampa nofolente anano maitu. Ana'i aitu nokonae Yesus.

Mie mande mai'aono te mata oleo

2:1-12

2 Yesus nolente we liwuno Betlehem we kadieno Yudea ne dhamanino kolaki Herodes. Gaha'a dohatomo we Yerusalem seemie hodua mie mande mai'aono te mata oleo. Andoa ini dopoguhu'ao waweno sabhaha kulipopo. ²Andoa dofee-feena ambado,

^a 1:23 Yes 7:14

“Ne amai bhahaa omputo Yahudi kane'o lumente'ano? Ingka ta-wohaemo kulipopo katandaino te mata oleo. Kamai'a mani ini tatumaohao'ao somba mani ne Anoa.” ³Nofetingke peda na'a kolaki Herodes nokohedu sepali'a, miendo Yerusalem dopuli dua dokohedu. ⁴Anoa nofohompumo kosasawindo neangcando imamumu bhe pande Kitabi miendo Yahudi maka nofee-feenada bhaha'i ne amai so kalente'ano Mesias Omputo fosalamatino. ⁵Dotobhoosimo ambado, “We liwuno Betlehem, we kadieno Yudea, kapa'amo weo Kitabindo anabii notibuhi peda aini,

⁶ ‘Betlehem, ne kadieno Yehuda,
 hintu kotu-kotu'u suano liwu fofoliuno kahobu
 ne olotando liwu bhala'ino ne kadieno Yehuda,
 hampano namai'ao ne hintu namehe seemie so
 neangka,

Anoamo so mowano umatiku Israel.’ ”^a

⁷Pada peda na'a, Herodes nobhasimo mie mande na'a tamaka miina naefemata-mataa. Andoa ini nofeenada nofotinda-tindada bhaha'i endefiemo dowohae kulipopo katandaino. ⁸Pada peda maitu notududamo dakumala we Betlehem bhe nopugauanda ambano, “Kalamoomu, ondofie'omu ana'i ana'a fotinda-tindae'omu. Mo'awaaneomu kaowu mefebhihitai kanau'omu, neanomo amai dua atumaohao sombaku ne Anoa.” ⁹Pada dofetingke kaowilino kolaki Herodes na'a, dokalamo. Gaha'a kulipopo katandai newohando koha'anomo te mata oleo, nopa'induluanda ampa nohato te potala'ano kaeate'ano ana'i na'a maka nofetumpu. ¹⁰Ka'iendo maka dowoha toha kulipopo ana'a. ¹¹Hato dopesua weo lambu, dowohamo ana'i na'a bhe Maria inano. Andoa dosudhu dotaohao sombado ne ana'i na'a. Pada ana'a dolengkasi kahato'aondo maka defoampe kawa'ao, o bulawa, o dupa bhe mina-mina nekonando mur. ¹²Tamaka Lahata'ala nofodhagada weo nifi keana dosuli we Herodes, dadi'anomo dosulimo we liwundo doangka ne kaangka'a sigao'ano.

Dogampi we Mesir

2:13-15

¹³Dokundo mie mande maitu, mala'ekatino Ompu nofotiwohamo wutono ne Yusuf, ambano, “Wanumo, wowo'o ana'i aitu bhe inano maka filei'omu we witeno Mesir. Meateomu ne watu ampa

^a 2:6 Mi 5:2

amohatoko toha, kapa'amo ana'i aitu na'umondofie Herodes patudhuno namongkoe.”¹⁴ Yusuf lasao nowanu, nowowo'o ana'i amaitu bhe inano maka alo aitu dua dogampi we Mesir.¹⁵ Andoa deate-ate we na'a ampa nomate Herodes. Aini nokadhadhia so noko'ula'ao nekobhoasa'aono Ompu nefosampeno anabii, “Anaku abhasie mai'ao we witeno Mesir.”^a

Ana'i we Betlehem dopongkoda

2:16-18

¹⁶Sanopande'ao lalono gaha'a dobhohe-bhohe'ie mie mande maitu, Herodes no'amaha sepali'a. Dadi'anomo nofotudumo damongko kosasawindo ana'i mo'ane tapa'o kumapono haa ta'u we Betlehem bhe liwu-liwu ne owano. Aini nopokantibha bhe wakutuu katiwoha'ano kulipopo, peda nefeena'aono ne mie mande na'a.¹⁷ Pedamo aini noko'ula bhoasaono Ompu nefosampeno anabii Yeremia,

¹⁸“We Rama notifetingkemo ka'u lei bhe kangko'ae timopea'aono lalo;
gaha'a Rahel no'aefi ana'i'ino,
nokiido dalamawesie hampano ana'i'ino miinadamo.”^b

Dosuli mai'ao we Mesir

2:19-23

¹⁹Nomate kaowu Herodes, mala'ekatino Ompu nofotiwohamo wutono ne Yusuf weo nifi we Mesir.²⁰ Ambano mala'ekati na'a, “Wanumo, wowo'o ana'i aitu bhe inano maka suli we witeno Israel, kapa'amo mie so malano inawano ana'i aitu domatemo.”²¹ Yusuf nowanumo, nowowo'o ana'i aitu bhe inano maka dosuli we witeno Israel.²² Pada ana'a Yusuf nofetingke Arkelaus, anano Herodes nololi amano nembali kolaki we kadieno Yudea. Dadi'anomo note'i nasumuli we na'a. Gaha'a Ompu nofohato Yusuf weo nifi namansuhu we kadieno Galilea.²³ Dohato we Galilea deatemo ne se'onu kota konea'ano Nasaret. Pedamo na'a noko'ula'ao bhoasano Ompu nefosampendo ana-anabii mulao'aono ana'i amaitu, “Anoa dakumonae miendo Nasaret.”

^a 2:15 Hos 11:1

^b 2:18 Yer 31:15

Yohanes Fokadiuno

3:1-12

*Mrk 1:1-8;**Luk 3:3-9; 15-17; Yoh 1:19-28*

3 Ne wakutuu ana'a notiumbamo Yohanes Fokadiuno we panda-so bhalano ne kadieno Yudea. Anoa nefolele Bhihita Metaa, ²ambano, “Fetompa'ao dhosamiu, doliomu ne Lahata'ala, kapa'amo Kafopahinta'ano Lahata'ala noma'omo.” ³Yohanesmo ini nepulao'aono anabii Yesaya ambano,

“Nandoo suaha mekei-keino we pandaso bhalano,
Mebhongkaomu kaangka'a so Ompu
fekalaa'eomu so kaangka'ano.”^a

⁴Pakeano Yohanes wuluno unta, kagegeno o kuli.^b Nehumaano kapunda bhe golano kainiua. ⁵Dobhahi mie maino ne Yohanes, mai'aono we Yerusalem, mai'aono ne koseka'ewa'ae kadieno Yudea bhe mai'aono ne sabhaha kadie ne owano umelena Yordan. ⁶Mie andoa ini dekapuna domangaku'ao dhosando maka nokadiuda Yohanes we umelena Yordan.

⁷Dobhahi dua miendo Farisi bhe miendo Saduki mefekadiuno. Sanowohada, Yohanes nopugaumo ambano, “Hintimiu ini sampu'ano ule modai. Ambamo la'ae bhahaa lumapaomu ne amahano Lahata'ala so humato'ano? ⁸Dadi'anomo fotiwohae'omu ne podiumiu, ingka gaha'a fetompaanemoomu dhosamiu. ⁹Koise nokofekihi we lalomiu, ‘Ingka insaodi ini sampu'ano Abraham, [tetewei tasumalamati,]. Kapa'amo Lahata'ala nokokuasa naefokonandoo sampu'ano Abraham mahinggamo namai'ao ne kontu ini. ¹⁰Polulu nokantaa-ntaamo ne pahakano sau. Sabhaha sau tapa mokesa'ano bhake tetewei datumu'oe maka da'umohoe weo efi. ¹¹Idi akadiu-angkoomu oe mbali katandaino fetompa'ao dhosamiu, tamaka so humatono mada kaowu nofoliu kanau kuasa. Mahingga alumense katapuno kaampinino pae amantasia. Anoa na'a nakumadiuangkoomu Rohino Lahata'ala bhe efino. ¹²Katepi nontiintahaemo so natumepisao'ao gandum ampa naonggela. Onuno gandum nahumompunaane weo lambu kaentei'a oti, tamaka kulino bhe kansiano laano natumunuane efi tapa mopopeono.”

^a 3:3 Yes 40:3

^b 3:4 Pakeano Yohanes nopototo bhe pakeano anabii Elia; 2Raj 1:8

Yesus nokadiu'e Yohanes

3:13-17

*Mrk 1:9-11;
Luk 3:21-22; Yoh 1:32-34*

¹³Wakutuu ana'a nohatomo Yesus we umelena Yordan no-mai'ao we Galilea, nefekadiu ne Yohanes. ¹⁴Tamaka Yohanes miina na'umunda'aanea ambano, “Ingka tabeano idi so nekadiumu, peda amai dua hintu mai'i kanau?” ¹⁵Nopugaumo Yesus ambano, “Hunsa'anomo aitu, kapa'amo nofaraluu peda aini so damangkafi'ao kosasawi'ae kapoindalono Lahata'ala.” Dadi'anomo Yohanes noangkafie kamesalono.

¹⁶Pada nokadiu'e, Yesus lasao nolimba mai'ao weo oe, gaha'a tanosimoengka'amo lani maka nowoha Rohino Lahata'ala nokatu fute'o, nosampu te wawono. ¹⁷Tanotifetingkemo dua suaha nomai'ao te lani ambano, “Ainimo Anaku timoasi'aono, neposahasi'aono laloku.”

Yesus nosobae Kafeompu'ando seetani we pandaso bhalano

4:1-11

Mrk 1:12-13; Luk 4:1-13

4 Pada ana'a Yesus nowowo'oe Rohino Lahata'ala we pandaso bhalano so nae'awa'ao kasobano Kafeompu'ando seetani. ²Pada nopoasa fato fulu'a ole-oleono koho-kohondo'ano, panda-pandano Yesus no'ahomo. ³Gaha'a nomaimo Fosobano maitu bhe nopugau ambano, “Ane hintu ini Anano Lahata'ala, soba tududa kontu ini daembali roti.” ⁴Yesus tanotobhoosi, “Nandoo notibuhi weo Kitabi, ‘Suano kaowu ta'o roti kao'uhi'ando manusia, tamaka o ae nekobhoasaono Lahata'ala do'uhiane dua.’”^a

⁵Pada aitu Kafeompu'ando seetani noowamo Yesus we kota mongkilo, Yerusalem, maka noampee te kabubuno Lambuno Lahata'ala, ⁶bhe nopugau ambano, “Ane hintu ini Anano Lahata'ala, soba oho wutomu we panda, kapa'amo notibuhi, ‘Lahata'ala natumudu mala'ekatino dakumantafeko keana notompalo a'emu ne kontu.’”^b

⁷Yesus notobhoosie ambano, “Notibuhi dua weo Kitabi, ‘Koe sobaea Ompu Lahata'alamu!’”^c

^a 4:4 Ul 8:3

^b 4:6 Mzm 91:11-12

^c 4:7 Ul 6:16

⁸Pada aitu Kafeompu'ando seetani noowamo toha Yesus ne se'onu kabhawo melangke'ano maka nofotiwohaane kosasawi'ae kakolaki'ano dhunia bhe sabhaha kahangkaeano, ⁹bhe nopugau ambano, “Kosasawi'ae maitu ama'angkoe, sumanomo sudhu bhe taohao sombamu ne idi.” ¹⁰Yesus tanotobhoosi ambano, “Gampimo, seetani! Kapa'amo notibuhi, ‘Taohao sombamu ne Ompu Lahata'alamu, ampamo kaowu Anoa so nefeompuni'imua!’ ”^a ¹¹Panda-pandano Yesus nohunsamo Kafeompu'ando seetani, maka dohatomo mala'ekati do'ondofaane.

Yesus notandakimo kahadhaano we Galilea

4:12-17

Mrk 1:14-15; Luk 4:14-15

¹²Nofetingke kaowu Yohanes dotohongkue, Yesus nogampimo we kadieno Galilea.

¹³Anoa nohunsamo Nasaret maka neate we Kapernaum, se'onu liwu ne wiwino te'ino Galilea, we kadieno Zebulon bhe Naftali.

¹⁴Aini nokadhadhia mbali noko'ula'ao nefosampeno anabii Yesaya,

¹⁵“Miendo witeno Zebulon bhe witeno Naftali,

ne kaangka'a humope'ano we te'i,

kadie we sewetano umeleno Yordan,

o mieno Galilea, witendo mie suano Yahudi!

¹⁶Mie dumadino weo kahohondo,

dowohamo tilanga bhalano;

meateno we liwu mewisekino mate,

noumbatidamo tilanga.”^b

¹⁷Notandamo ne na'a Yesus nofolelemo, “Fetompaaneomu dhosamiu, doliomu ne Lahata'ala, kapa'amo Kafopahinta'ano Lahata'ala noma'omo!”

Yesus nosali'i anaguhuno kabhao-bhaono

4:18-22

Mrk 1:16-20; Luk 5:1-11

¹⁸Wakutuuno Yesus nokala nosohaki wiwino te'ino Galilea, nowohamo mie dohodua. Andoa ini dosikakuta'a, neando Simon nekonando dua Petrus, bhe Andreas kakuta'ano. Andoa ini tangasano debuani we te'i, hampano andoa maitu pande kenta. ¹⁹Yesus nopugauandamo ambano, “Mai angkafi kanau'omu, amoguhukoomu

^a 4:10 Ul 6:13

^b 4:15-16 Yes 9:1-2

so mebuanino manusia.”²⁰ Buanindo tadohunsa maka doangkafi Yesus.

²¹ Yesus nofopansuhu kala-kalano maka nowohamo dua mie dohodua dosikakuta'a, neando Yakobus bhe Yohanes, ana'ino Zebedeus. Dupoowa bhe Zebedeus, amando, andoa ini nandoo dofosintuwu pukando weo bhangka. Yesus nosali'idamo dua.²² Andoa lasao dohunsa bhangka bhe amando maka doangkafie.

Yesus nofofoina'u bhe dobhahi mie nefeka'osano

4:23-25

Luk 6:17-19

²³ Yesus noangkai koseka'ewa'ae kadieno Galilea, nofofoina'u ne lambu-lambu kasambahe'a. Anoa nefolele Bhihita Metaa Kafopahinta'ano Lahata'ala, poowa nefeka'osa sabhaha mie mosaki bhe modaino namisi ne liwu aitu.²⁴ Bhihitano Yesus ini nokolelemo ne koseka'ewa'ae kadieno Siria, sampe deowa'ianemo mie menamisino sabhaha saki, kakadee-dee bhe kadaino namisi, mie nepesuakino seetani, mate manuno bhe mokaluno. Kosasawindo na'a nofeka'osada.²⁵ Mie bhahi dosipumpu doangkafie. Nandoo mai'aono we kadieno Galilea bhe Dekapolis, mai'aono we Yerusalem bhe we Yudea bhe mai'aono we sewetano umeleno Yordan.

Kafoina'u te wawono kabhawo

5:1-2

5 Nowoha mie bhahi maitu, Yesus nofonimo te kabhawo. Nengkoaha kaowu domai'iemmo anaguhu'ino.² Yesus nelengkaandamo pugau bhe nofoina'uda ambano,

Wambano dawua

5:3-12

Luk 6:20-23

- ³ “Dokodawua mpuu mie ngkumaasi-asino masandeno ne Ompu,
kapa'amo andoamo so mehapino Kafopahinta'ano Lahata'ala.
- ⁴ Dokodawua mpuu mopeano lalo,
kapa'amo nalumawesida Lahata'ala.
- ⁵ Dokodawua mpuu momaluno lalo,
kapa'amo dhunia somo fehebua'ando.
- ⁶ Dokodawua mpuu mokambano lalo ne kabanara,

kapa'amo Lahata'ala nama'andae
nemokamba'aondo.

⁷ Dokodawua mpuu mobhelano lalo ne manusia
bhaindo,

kapa'amo Lahata'ala naobhelaanda dua lalo.

⁸ Dokodawua mpuu mongkilono lalo,
kapa'amo damoha Lahata'ala.

⁹ Dokodawua mpuu meowano pometaa,
kapa'amo dakumonada ana'ino Lahata'ala.

¹⁰ Dokodawua mpuu mie nefodee-dee hampano
doangkafi kapoindalono Lahata'ala,
kapa'amo andoamo so mehapino Kafopahinta'ano
Lahata'ala.

¹¹ Kodawua'omu, ane damewambakikoomu, damodee-deekoomu
bhe da'umumbuangkoomu modai'ano hampano angkafiomu Idi.

¹² Fowula lalomiu, mo'ia'omu, kapa'amo ponambomiu te surugaa
nabhahi. Ingka pedamo dua na'a defodee-dee ana-anabii dumadi-
no wawo bhe hintimiu.”

O gaha bhe kantaleano dhunia

5:13-16

Mrk 9:50; Luk 14:34-35

¹³ “Hintimiu itu dimbano gaha we dhunia. Ane o gaha nao-
tembe, damekakahaane dua ae? Ingka miinamo nakofahalaa'a,
tada'umoho maka dapokafinda'iane.

¹⁴ Hintimiu itu kantalea we dhunia. Se'onu kota te wawono
kabhawo tetewei paise natifebunia. ¹⁵ Miina dua bhe mesulano
kantalea maka dosongkowiane bhengki, tamaka tetewei dohunsae
ne kangkailao'ano mbali dentalea'ane kosasawindo mie weo lambu.
¹⁶ Pedamo aitu dua tilangamiu tabeano naentalea ne wisendo mie
bhaimiu, dowoha'ao podiumiu metaa'ano so damudhi'ao Amamiu
te surugaa.”

Yesus bhe Pahintano anabii Musa

5:17-48

Luk 6:27-36

¹⁷ “Koise kofekihiomu, Idi ini amai amosali tubhono agama
Yahudi bhe Kitabindo ana-anabii. Idi amai paise amosaliea tamaka
amosusuangkoomu ma'anano sakotu'uno. ¹⁸ Amohatokoomu, kotu-
kotu'u ane lani bhe dhunia pae'o naosalia, bhe nasehorofu tawa
setanda tubhono agama Yahudi pae dua bhe so mosali'ano, ampa

kosasawi'ae nako'ula. ¹⁹Dadi'anomo la'ae so kumamudaino tubhono agama Yahudi mahingga pahinta foliuno kahobu, maka namoguhuandae dua bhaindo, nae'awa kaengkoha'a foliuno kapanda weo Kafopahinta'ano Lahata'ala. Tamaka la'ae mangkafino bhe fofoguhu'aono kosasawi'ae pahinta ana'a, nae'awa kaengkoha'a foliuno kalangke weo Kafopahinta'ano Lahata'ala. ²⁰Amohatokoomu, kotu-kotu'u pae bhe kapoolia mesua'omu weo Kafopahinta'ano Lahata'ala, simbali podiumiu poangkafi'ano bhe kapoindalono Lahata'ala namoliu podiundo pande-pande Kitabi bhe miendo Farisi.

²¹Ingka fetingkeemoomu nekobhoasa'aono Lahata'ala ne awua'ntoomua, 'Koise fopongko, la'ae fopongkono dahumukumue'.^a ²²Tamaka ambaku Idi, la'ae umamahano ne bhahitieno tetewei dahumukumue. La'ae mugauno ne bhahitieno, 'Hintu itu kaafihi!' tetewei dabhitahakie Sahano Agama. La'ae mugauno, 'Hintu itu notolau kabhohemu!' tetewei da'umohoe weo efino narakaa ngkalai-lai'ano.

²³Dadi'anomo, ane moowa kapopangamu so Lahata'ala te wawono medha kaefoampe'a, gaha'a nokofe'ulai lalomu ingka nandoo bhe bhahitiemu moleano lalo ne hintu, ²⁴hunsu kadeki kapopangamu ne wiseno medha kaefoampe'a na'a, maka suli pometaa bhe bhahitiemu na'a. Namada aitu maka suli foampe kapopangamu.

²⁵Ane bhe so mobhieangko, lasao pometaa'ane tinangke we laano sala, keana nosungkuangko ne pande bhitaha. Kapa'amo ane nahumatomo ne pande bhitaha, namowako ne limando dhagano katohongku maka damopesuako weo katohongku. ²⁶Amohatokoomu, kotu-kotu'u paise sepali'a damolimbakoomua ane pae'o momea'e kosasawi'ae dosamu.

²⁷Ingka fetingkeemoomu dua, 'Koise monsulea!'^b ²⁸Tamaka ambaku Idi, ane seemie mo'ane nowoha hobhine maka lasao gano napomoodofiane, ingka nomonsuleanemo weo totono lalono. ²⁹Ane matamu suana naehabuangko dhosa, sungkie maka ohoe! Naetaa mobunto sembali bhe nasumangka mbadhamu, tamaka da'umohoko weo narakaa. ³⁰Ane limamu suana naehabuangko dhosa, totoe maka ohoe! Naetaa kolima sembali bhe nasumangka mbadhamu, tamaka mesua narakaa.

^a 5:21 Kel 20:13; Ul 5:17

^b 5:27 Kel 20:14; Ul 5:18

³¹Nokobhoasaane dua Lahata'ala peda aini, 'Ane dohunsu mie-no lambudo tetewei debuhiane bhe suhano'.^a ³²Tamaka ambaku Idi, ane seemie mo'ane nohunsu mieno lambuno gaha'a mieno lambuno maitu miina namonsule, ingka nehabuanemo dhala so namonsule'ao ane hobhine ana'a nogaa toha. La'ae gumaano bhe hobhine nehunsu, nomonsulemo dua.

³³Ingka fetingkeemoomu dua nekobhoasa'aono Lahata'ala ne awua'intoomu, 'Koise podhandi sampe femata, tamaka o ae nepodhandi'aomu ne wiseno Ompu tetewei dhalangie'.^b ³⁴Tamaka ambaku Idi, koise sepali'a podhandi bhe femata putae nandoo bhe fo'ondo-ondono, ibahano nandoo bhe lani fo'ondo-ondono, kapa'amo lani kaengkoha'ano Lahata'ala. ³⁵Koise dua podhandi bhe femata nandoo bhe wite fofetingkeno, kapa'amo wite kafinda'ano Lahata'ala. Koise dua podhandi bhe femata sambili kotano Yerusalem, kapa'amo Yerusalem kota kaeate'ano Omputo Bhalano. ³⁶Koise dua podhandi bhe femata sambili fotumu, kapa'amo miina bhe kuasamu mekapute tawa meka'ito wuluno fotumu mahingga nasetangke. ³⁷Dadi'anomo ane patudhumu uumbe, tafoko'uumbe-mo; ane patudhumu paise, tafokopaisemo. Labhino ana'a, no-mai'ao ne Kafeompu'ando seetani.

³⁸Fetingkeemoomu dua bhoasaono Lahata'ala, 'Mata dololiane mata, wangka dololiane wangka'.^c ³⁹Tamaka ambaku Idi, koise bholosia ne mie humabu modaino ne hintu. Ane dotofa bhagamu we suana, fodoliane dua bhe kemamu. ⁴⁰Ane mie nosungkuangko mba'inomo nopoindalo namala bhadhumu, wa'ane dua bhe bheta-mu.^d ⁴¹Ane seemie kafeompu'a nofosuhuko tumongkuane wowo'ono nasekilo kakodo'ono, poangkafiane nahaa kilo. ⁴²Ane bhe konisalongo, wa'anda; koise mokiido ane dakoniada.

⁴³Fetingkeemoomu dua bhoasaono Lahata'ala, 'Moasianda mie bhaimu, bansida kaewamu'.^e ⁴⁴Tamaka ambaku Idi, moasianda kaewamu bhe sambahea'anda mie modee-deeko. ⁴⁵Kapa'amo nada-mo aini so membali'ao'omu ana'ino Amamiu te surugaa. Anoa nofofoni oleono so mie modai bhe so mie metaa, nofosampu useno so mie banara bhe so mie pata banara. ⁴⁶Ane moasi'ao'omu kaowu

^a 5:31 Ul 24:1

^b 5:33 Im 19:12; Bil 30:2; Ul 23:21

^c 5:38 Kel 21:24; Im 24:20; Ul 19:21

^d 5:40 Sakotu'uno: *dhubamu*.

^e 5:43 Im 19:18

mie moasiangkoomu, so dua ae Lahata'ala namonambokoomu? Ingka mahingga mie mesalono sewa dohabu dua peda na'a. ⁴⁷ Ane pofende'ao'omu kaowu bhe bhahitie'imiu, o ae po'ala'ano bhe habundo mie bhaimiu? Ingka mahingga mie pata mande'aono Lahata'ala dohabu dua peda na'a. ⁴⁸ Dadi'anomo tabeano nasumangka totono lalomiu, peda Amamiu te surugaa.”

Dosadhakaa

6:1-4

6 “Tandai'eomu, koise angkafiomu tubhono agamamiu mefe-wohaomu kaowu ne mie bhahi. Ane peda na'a Amamu te surugaa pae nama'angkoomu ponambo. ² Dadi'anomo ane fowa'ao sadhakaa koe mefole-folelea, peda nehabundo mie mehaa'ulano. Andoa ini dohabu peda ana'a weo lambu-lambu kasambahea'a tawa ne kaangka'a so dotipudhi'ao ne mie bhaindo. Amohatoko-omu, kotu-kotu'u andoa maitu dotahimaemo ponambodoa. ³ Tamaka ane sumadhakaa, nehabuno suanamu koemo nopande'aanea kemamu. ⁴ Sadhakaamu koemo dopande'aanea bhaindo, maka Amamu mohano tifebuni'ano nabholosiangkoe.”

Dosambahea

6:5-15

Luk 11:2-4

⁵ “Ane sumambahea'omu koe nameda mie mehaa'ulano. Andoa maitu doasiane dosambahea ngkaehe-ehe weo lambu kasambahea'a bhe ne kampuna defewoha ne mie bhaindo. Amohatoko-omu, kotu-kotu'u andoa maitu dotahimaemo ponambodo. ⁶ Tamaka ane sumambahea pesua weo bolokumu, onto fointo maka sambahea ne Amamu pata tiwohana. Ane nada na'a Amamu mohano tifebuni'ano nabholosiangkoe.

⁷ Pakade sambaheamu koe tanobhahi-bhahimo wamba tapa koma'anano, peda kaneando mie tapa mande'aono Lahata'ala. Dukuno lalondo hampano kabhahino wambado maitu, natitahimaanemo kamesalondo. ⁸ Dadi'anomo hintimiu koe peda andoa maitu. Kapa'amo miina'o mesaloomua, Amamu te surugaa nopande'aanemo kafaralumua. ⁹ Dadi'anomo sambahea'omu nada aini,

‘Ama mani te surugaa,
notifosibhala'o toha neamu.

¹⁰ Nohato'o toha Kafopahinta'amu,

noko'ula'o toha patudhumu we dhunia ini peda te surugaa.

¹¹ Wa'a kainsami nehumaa kafaraluu mani se'oleo itu.

¹² Amponie sabhaha dhosa mani,
pedamo dua insaodi tama'afu'ao mie koka'alano ne insaodi.

¹³ Koise folapasa kainsami weo kasoba,
tamaka dhagani kainsami ne kuasa modai.
[Kapa'amo Hintumo mahintano, kokuasano bhe
kumalabhiano ampa suhue dhamani. Amin.]'

¹⁴ Ane ma'afu'ao'omu mie koka'alano ne hintimiu, Amamiu te surugaa na'umamponikoomu dua. ¹⁵ Tamaka ane paise ma'afu'ao'omu mie bhaimiu, Amamiu te surugaa pae dua na'umamponikoomua."

Dopoasa

6:16-18

¹⁶ "Ane moasaomu koe mengkuru-ngkuruomua peda mie mehaa'ulano. Andoa maitu dohabu-habue ulando, defewoha ne mie putae dopoasa. Amohatokoomu, kotu-kotu'u andoa dotahimaemo ponambodoa. ¹⁷ Tamaka ane moasaomu mekundeomu, mehe'u-omu, ¹⁸ keana dopande'aane mie bhaindo putae poasaomu, ampamo kaowu Amamu tapa tiwohana mande'aane. Maka Amamu mohano tifebuni'ano nabholosiangkoe'omu."

Defo'onu kahangkaea

6:19-24

¹⁹ "Koise mefo'onuomu kahangkaeano dhunia, kapa'amo nadumai-dai'e faa bhe hase, pakade dapombuhusiane kaso'o. ²⁰ Tamaka fo'onuomu kahangkaeano surugaa, kapa'amo te surugaa paise nadumai-dai'e faa bhe hase pakade pae dua dapombuhusiane kaso'o. ²¹ Kapa'amo ne amai kanandoo'ano kahangkaeamu, ne itu'aemo dua totono lalomu.

²² O mata kantaleanomo mbadha. Ane netaa matamu, nentaleamo dua mbadhamu. ²³ Ane nodai matamu, nohohondomo dua mbadhamu. Dadi'anomo ane tilanga we lalomu nohohondomo, notolau sepali'a kahohondono!

²⁴ Miina bhe bhatua dohodua kafeompu'ano. Ane nada na'a tetewei seemiea nabansie, seemie namasiane, tawa nokampuu-mpuu lalono ne seemieno maka seemieno miina nakumona'i miea.

Hintimiu pae naembalia meompuomu ne Lahata'ala bhe ne khangkaeano dhunia.”^a

Kamihino lalo

6:25-34

Luk 12:22-31

²⁵“Dadi'anomo amohatokoomu, koise nomihl lalomiu ne kadadi'amiu, momaa'omu ae tawa mohou'oumu ae. Koise dua nomihl lalomiu ne mbadhamiu bhaha'i mepakeomu ae. Ingka noliu'e dadi ini bhe oti, noliu'e dua mbadha bhe pakea. ²⁶Soba ondoomu ka'uhi lumolano; miina dahumooa, miina dakumape, miina dua dasumolo pephapindo, tamaka Amamiu te surugaa no'ondofaanda. Ingka foliuda hintimiu bhe ka'uhi lumolano maitu.

²⁷La'ae bhahaa ne olotamiu itu hampano kamihino lalono namooli namodhulu dadino naseendai kaowu? ²⁸Noafa nomihl'ao lalomiu bhaha'i mepakeomu ae? Soba ondoomu kamba-kamba we pada; miina dakumahadhaa, miina dua damoohu. ²⁹Tamaka amohatokoomu, omputo Salomo foliuno khangkaea maitu, pakeano miina naehatoa ne kakesano kamba-kamba aitu!^b ³⁰Kahoku tumumbu'ano we pada oleo itu, namentae datumawuemo. Sanginomo kahoku maitu nolegasiemo Lahata'ala, bhemo toha dua hintimiu! Kakuhano dua kaparasaeamiu!

³¹Dadi'anomo koe nomihl lalomiu bhe pugau'omu, 'Daomaa ae?', 'daoho'u ae?' tawa 'daepake ae?' ³²Kosasawi'ae na'a nefosibhalandomo sabhaha bansano liwu tapa mande'aono Lahata'ala. Amamiu te surugaa nopande'aane kosasawi'ae maitu faraluu'oumu. ³³Dadi'anomo ondofiomu kadeki Kafopahinta'ano Lahata'ala bhe dhalangie'omu kapoindalono. Maka kosasawi'ae kafaraluumiu na'a nama'angko'e'oumu dua. ³⁴Dadi'anomo koe nomihiane lalomiu oleo naewine, kapa'amo oleo naewine bhe kasabhano dua wutono. Se'oleo-se'oleo bhe kasabhano wutono, koemo dotubha-tubhahiea.”

Koengkohano bhithaha

7:1-5

Luk 6:37-38, 41-42

7 “Koise bhithaki manusia bhaimu, keana nobhithakiko Lahata'ala. ²Kapa'amo kabhotusi nefondawumu ne manusia bhaimu somo dua kabhotusino Lahata'ala ne wutomu. Pedamo dua aitu tubho nepakemu ne bhaindo somo dua tubhono Lahata'ala ne

^a 6:24 Sakotu'uno: *Mamon*, ma'anano o dhoi.

^b 6:29 1Raj 10:4-7

wutomu. ³Noafa bhahaa woha'ao kanenano habha weo matano bhahitiemu, gaha'aitumo kakebhano sau weo matamu miina mande'aanea? ⁴Peda ae dua pugau'ao ne bhahitiemu, 'Naetaa amaliangko kanenano habha weo matamu itu', gaha'aitumo weo matamu bhe kakebhano sauno. ⁵Hintu mehaa'ulano! Alimo kadeki kakebhano sau weo matamu itu, so nentalea'ao umondo maka mali kanenano habha weo matano bhahitiemu.”

Bara mongkilo bhe mo'ali'ano

7:6

⁶“Bara mongkilo koise wa'ane da'u, bhahaa nosuli nokokapeko. Muntiamu koise ohoane wewi, bhahaa nopokafinda'iane.”

Kamesalo

7:7-11

Luk 11:9-13

⁷“Tamesalomo tetewei dama'angko, ta'ondofimo tetewei po'awa-ane; tamekatengkimo fointo tetewei dalumengkaangko. ⁸Kapa'amo sasuka mesalono naetahima, sasuka me'ondofino naepo'awa'ao bhe sasuka mekatengkino fointo dalumengkaane. ⁹Nandoo bhahaa ne olotamiu itu, ane anano nesalo roti tanowa'ane kontu? ¹⁰Tawa ane nesalo kenta tanowa'ane ule? ¹¹Sanginomo hintimiu mie modai pandemoomu wa'ao'omu metaa'ano ne anamiu, bhemo toha Ama-miu te surugaa! Anoa nama'ao metaa'ano ne mie mesalono.”

Kaangka'a sakotu'uno

7:12-14

Luk 13:24

¹²“Bhahi-bhahi'ae kapoindalomu so nehabundo mie bhaimu ne hintu, habue dua ne mie bhaimu. Ingka kosasawi'ae kafoina'uno Kitabino Musa bhe Kitabindo ana-anabii no'onumo ne ini.

¹³Pesua'omu ne fointo moseke'ano, kapa'amo ne'ewa fointo bhe nolalesa kaangka'a humope'ano we narakaa, pakade dobhahi mie mangkai'e. ¹⁴Tamaka noseke fointo bhe nomahasai mpuu kaangka'a humope'ano ne dadi suhue dhamani, pakade miina dabhahia mie mangkai'e.”

Kafoina'u umala

7:15-23

¹⁵“Posi'ondoomu ne mie mpahaana-anabiino. Andoa damai daesahangka ne dhumba momaluno lalo, gaha'aitu andoa itu da'u

ngkahoku fohumaano. ¹⁶Andoa ini mande'aandaomu ne podiundo. Bhahaa nandoo me'utano bhakeno angguru nomai'ao ne dahadaha? Tawa bhakeno woha'a nomai'ao ne laiwongka? ¹⁷Pedamo na'a sau metaa nokobhake'ao metaa'ano, sau tapa metaa'ano noko-bhake'ao modai'ano. ¹⁸Sau metaa pae bhe kapoolia nakobhake'ao modai'ano, pedamo dua sau tapa metaa'ano pae bhe kapoolia nakobhake'ao metaa'ano. ¹⁹Kotika sau tapa metaa'ano bhake, tetewei datumu'oe maka da'umohoe weo efi. ²⁰Pedamo dua mie mabhino wutono anabii, andoa maitu mande'aandaomu ne podiundo.

²¹Suano kotika mie kumangkonano neaku, 'Ompu! Ompu!' so mesuano surugaa, tamaka mie mangkafino kapoindalono Amaku te surugaa. ²²Nahumato Oleono Kiama dabhahi so mugauno ne Idi, 'Ompu! Ompu! Ingka insaodi ini takosuaha peda seemie anabii tapake neamu, taefolimba seetani tapake neamu, pakade nobhahi taehabu kadhadhia timente'aono tapake dua neamu.' ²³Ne na'amo dua amohatoda mentalea-mentalea, 'Ingka miina sepali'a amande'aangkomua! Gampiomu ne wiseku ini, hintimiu humabu modaino.' "

**Dohodua mefelambuno: seemie nopande,
seemie nobhohe**

7:24-27

Luk 6:47-49

²⁴"La'ae metingkeno pugauku ini maka noangkafie, nopototo bhe seemie mandeno moeheno lambuno te wawono dempa. ²⁵Pada nofoehee nomaimo use, domawamo oe noangkafie bhe kawea mo'osa nokitufao lambu aitu. Tamaka lambuno miina naosansaa, mba'inomo nofoehee te wawono dempa.

²⁶La'ae metingkeno pugauku ini tamaka miina namangkafie, nopototo bhe seemie bhohe moeheno lambuno te wawono bhone. ²⁷Pada nofoehee nomaimo use, domawamo oe noangkafie bhe kawea mo'osa nokitufao lambu aitu. Gaha'a lambuno nosansa. Kadaha maka kadaino."

Ponamisindo metingkeno

7:28-29

²⁸Nopalusi Yesus nofofoina'u peda maitu, mie bhahi tadomente dofetingke kafoina'uno na'a. ²⁹Kapa'amo Yesus nofoina'uda peda seemie kokuasano, nopo'ala bhe pande-pande Kitabindo.

Yesus nefeka'osa seemie kokuli modaino

8:1-4

Mrk 1:40-45; Luk 5:12-16

8 Sasampuno Yesus nomai'ao te kabhawo, doangkafiemo mie bhahi. ²Nomai'iemmo seemie kokuli modaino, maka notaohao sombano bhe nopugau ambano, “Waompu, ane umunda, tetewei naembali meka'osa kanau.” ³Yesus nofonsoho limano, nodampasi mie amaitu bhe nopugau ambano, “A'unda, monggela'o toha.” Mie aitu lasao no'osa, kulino nonggelamo. ⁴Ambano toha Yesus, “Tandai'e, koise mekapu-kapuna ne la'ae maka dua, ampamo kaowu kalamo fotiwoha wutomu ne imamu. Namada aitu meowa kapopanga ne Lahata'ala peda neowili'aono anabii Musa, so netandaindo mie bhahi putae hintu mo'osamo.”^a

Yesus nofeka'osa bhatuano neangkando

tantara we Kapernaum

8:5-13

Luk 7:1-10; Yoh 4:46-53

⁵Hato nopesua we Kapernaum, nopo'awaanemo seemie neangkando tantarando Roma, nefetulumi ne Yesus. ⁶Ambano, “Waompu, bhatuaku we lambu nokalu, sandole; nokadee-deemo sepali'a.” ⁷Ambano Yesus, “Amai ameka'osae.” ⁸Tamaka ambano neangkando tantara maitu, “Waompu, miina amantasia mesuaki lambuku; tapugaumo nasewobha wamba, maka bhatuaku maitu teteweimo nao'osa. ⁹Kapa'amo idi ini bhe neangkaku dua maka nandoo dua tantara neowaku. Ane apugau ne seemie tantara, ‘Kala!’, lasao nokala. Pedamo dua apugau, ‘Mai!’ lasao nomai, bhaha'i apugau ne bhatuaku, ‘Kahadhaa aini!’, lasao nokahadhaa'e.” ¹⁰Nofetingke peda na'a, Yesus namente sepali'a, maka nopugau ne mie mangkafie ambano, “Amohatokoomu, kotu-kotu'u kabhalano kaparasaea medando ini miina'o apo'awaane ne olotando miendo Israel. ¹¹Amohatokoomu, dabhahi mie so humatono damai'ao te mata oleo bhe we kansoopa maka daomaa dapombali-mbali bhe Abraham, Ishak bhe Yakub weo Kafopahinta'ano Lahata'ala. ¹²Tamaka so tala'ano mie membalino umatino Lahata'ala miendo Israel, awua'ino Abraham, da'umohofida weo doloma mposo. Ne na'a ta'o kangko'ae bhe ku'ino wangka.” ¹³Pada ana'a nopugaumo Yesus ne meangkando tantara maitu ambano, “Nakumadhadhiamo peda kaparasaea-mu itu.” Wakutuu aitu dua bhatua na'a lasao no'osa.

^a 8:4 Im 14:1-32

**Yesus nofeka'osa inano hobhineno Petrus
bhe mie sigao'ano dua**

8:14-17

Mrk 1:29-34; Luk 4:38-41

¹⁴Nohato se lambuno Petrus, Yesus nowoha poniano Petrus nendole-ndole nosodoe. ¹⁵Anoa nointahamo limano hobhine na'a, gaha'a sodono lasao nopada, maka nowanu no'ondofao Yesus. ¹⁶Nosoo kaowu oleo, Yesus deowa'ianemo mie nepesuakino seetani. Yesus tanopugaumo kaowu sewobha wamba, seetani andoa maitu dopuli dolimba. Anoa nofeka'osa dua kosasawindo mie mosakino. ¹⁷Kadhadhia aini mbalimo noko'ula'ao bhoasaono Lahata'ala nefosampeno anabii Yesaya peda aini, "Anoamo sumodano sakintoomu, wowo'onomo dua kadaino namisintoomu."^a

Mie so mangkafino Yesus

8:18-22

Luk 9:57-62

¹⁸Nowoha mie bhahi maitu dolibu-libue, notudumo anaguhu'ino dapolimba we sewetano te'i. ¹⁹Nomaimo seemie pande Kitabi, ambano, "Guru, amangkafiko ne amai maka dua so kakala'amu." ²⁰Yesus notobhoosimo ambano, "Da'u ngkahoku bhe liano, ka'uhi lumola bhe kaufeno, tamaka Anano Manusia – Idimo ini – miina sepali'a bhe katifekalaa'i'ano towuno."^b

²¹Seemie dua mangkafie nopugaumo, ambano, "Ompu, folalesa kanau asumuli kadeki akumobuhu amaku." ²²Tamaka Yesus notobhoosi, "Angkafi kanau, hunsa'anomo mie mate dakumobuhu mie mate bhaindo."

Yesus nefeonto kawea mongkolo

8:23-27

Mrk 4:35-41; Luk 8:22-25

²³Yesus nosawimo toha ne bhangka doangkafie bhe anaguhu'ino. ²⁴Gaha'a tanosihato'amo kawea mongkolo, bhangkando netaa nohambi-hambita'iane ewo, tamaka Yesus noodo. ²⁵Anaguhu'ino domaimo dofowanue, ambado, "Waompu, tulumi kainsami! Inga dabinasamoomu." ²⁶Yesus tanopugau ambano, "Noafa gaha'a mote'i'ao'omu? Kakuhanu maka kaparasaeamiu!" Pada ana'a nowanumo, nobhoohai kawea bhe oeno te'i maitu. O te'i lasao nolinto.

^a 8:17 Yes 53:4

^b 8:20 Sakotu'uno: *katifondole'ano fotuno*, ma'anano kafewule'ano.

²⁷ Anaguhu'ino maitu damente sepali'a, ambado, “O mie ae bhahaa Anoa ini, sampe kawea bhe oe doangkafi dua pahintano?”

Yesus nefeka'osa dohodua mie nepesuakino seetani

8:28-34

Mrk 5:1-20; Luk 8:26-39

²⁸ Sahatono we sewetano te'i, we liwuno miendo Gadara, domaimo dohodua mie nepesuakino seetani, dopo'awa'ao Yesus. Andoa ini domai'ao te tombuno lia kafokobuhu'a. Dotimote'i sepali'a sampe bhe naseemie miinamo bhe mokadono namangka ne itu. ²⁹ Andoa dopokakei-kei ambado, “Anano Lahata'ala, mai mafa'i kainsami gaha'a? Patudhumu maimo modee-dee kainsami, mahingga pae'o nahumato tempono?” ³⁰ Miina nakodo'oa bhe andoa maitu nandoo kawaindo wewi nekanea tangasano doliwu. ³¹ Seetani'i maitu desalomo ne Yesus ambado, “Ane molimba kainsami, tudu kainsami tamesua weo kawaindo wewi atatu.” ³² Ambano Yesus, “Kalamoomu!” Seetani'i maitu lasao dolimba maka dope-suaki kawaindo wewi na'a. Kosekawaindo wewi maitu dofilei we wiwino pimpi maka do'ohofi wutondo weo te'i sampe dolomo. ³³ Mie dhumaganino wewi maitu lasao dofilei we liwu. Dohato ne watu, detula-tula'aomo kosasawi'ae kumadhadhia'ano. Detula-tula'aomo dua kumadhadhia'ano ne mie hoduan nepesuakino seetani maitu. ³⁴ Dofetingke peda na'a kosasawindo mieno liwu domai'imo Yesus. Hato dopo'awaane, desalo mpuu nakumalamo nahumunsa liwundo.

Yesus nefeka'osa kalu

9:1-8

Mrk 2:1-12; Luk 5:17-26

9 Nopalusi ana'a, Yesus nosawimo ne bhangka, nolimba we sewetano maka nohato toha we liwuno. ² Ne itu deowaanemo seemie kalu, nendole-ndole ne kaodo'ano. Nowoha kabhalano kaparasaendo maitu, Yesus nopugaumo ne kalu na'a ambano, “Fekatangka lalomu sabhangka, dhosamu noti'amponimo.” ³ Dofetingke peda na'a pande-pande Kitabi nokodukumo we lalondo, “Mie aini nopototo'ao wutono bhe Lahata'ala, ingka nofeka'aebumo Lahata'ala.” ⁴ Tamaka Yesus nopande'aane nefekihindo, maka ambano, “Noafa kofekihi modai'ao'omu? ⁵ Nomuda ae bhahaa, apugau'ao, ‘Dhosamu noti'amponimo’ bhaha'i apugau'ao ‘Wanumo maka kala’? ⁶ Amotiwohaangkoomu Anano Manusia – Idimo ini – nokokuasa ne'amponi dhosa te dhunia ini.” Maka nopugau ne kalu

na'a, "Wanu'o toha, sangke kaodo'amu itu maka suli se lambumu."
 7 Mie kalu na'a lasao nowanu maka nosuli se lambuno. 8 Mie bhahi mohano kadhadhia aitu dote'i bhe dopudhi Lahata'ala ma'aono kuasa bhalano pedando aitu ne manusia.

Matius mealano sewa noangkafi Yesus

9:9-13

Mrk 2:13-17; Luk 5:27-32

9 Hato nokala nomai'ao ne itu, Yesus newohamo seemie nengko-ha-ngko-ha weo lambu kaesalo'a sewa. Neano mie ana'a Matius. Ambano Yesus, "Angkafi kanau." Matius lasao noehe maka noangkafie. 10 Pada ana'a, tangasano Yesus nohumaa we lambuno Matius, dobhahi mealano sewa sigao'ano bhe mie kodhosa domaimo dua. Andoa ini dohumaa dopombali-mbali bhe Yesus bhe anaguhu'ino. 11 Dowoha peda na'a, miendo Farisi dopugaumo ne anaguhu'ino ambado, "Noafa gaha'a gurumi nohumaa nopombali-mbali bhe mealano sewa bhe mie kodhosa maitu?" 12 Yesus nofetingkeda, maka ambano, "Suano mie metaano namisi mefalaruuno foagono, mpahinomo mie mosaki. 13 Dadi'anomo kalamoomu, ma'anakiomu wambano Kitabi aini, [Ambano Lahata'ala] 'Kapoindalo-ku dopomobhela-bhela'ao lalo, suano kapopanga', kapa'amo kahato'aku miina ae'ondofi mie mongkilo, tamaka mie kodhosa." ^a

Dopoasa

9:14-17

Mrk 2:18-22; Luk 5:33-39

14 Palusi ana'a domaimo anaguhu'ino Yohanes Fokadiuno ne Yesus, bhe dopugau ambado, "Noafa gaha'a insaodi bhe miendo Farisi tapoasa tamaka anaguhu'imu ingka miina?" 15 Notobhoosi Yesus ambano, "Naembali bhahaa sabhangka'ino lo'ia bu'ou daguguhu tangasano nopobhaianda lo'ia bu'ou? Tantumo paise. Tamaka nahumato tempono, lo'ia bu'ou dawowo'oemo. Ne na'a kane'omo damoasa.

16 Ane detabha nggasi, miina bhe mepakeno kabhini bu'ou pata'o mokuhuno. Kapa'amo kabhini medano aitu nahumela nggasi maitu, sampe nadhumulu kabhensino. 17 Pedamo dua na'a, miina nandumandooa mie mefosingi'ino angguru bu'ou ne kaentei'a katembuno, ^b kapa'amo ane nada na'a so kaowu naowengka'ao kaentei'ano.

^a 9:13 Hos 6:6

^b 9:17 Kaentei'a katembuno, sakotu'uno: kadu kangkodauno mai'ao ne bhalulano kadadi.

Angguruno nabinasa, kaentei'ano nahumansuru. Tamaka angguru bu'ou tetewei datumei'e dua ne kaentei'a bu'ou, neanomo kohaa-honda'ae sadaa-daa kataano.”

**Yesus nofodadi anano Yairus
bhe nefeka'osa seemie hobhine**

9:18-26

Mrk 5:21-43; Luk 8:40-56

¹⁸Tangasano Yesus nopuga-pugau peda na'a bhe andoa, no-maimo seemie mande'aono lambu kasambahea'a. Sahatono notao-hao sombano ne Yesus bhe nopugau ambano, “Anaku hobhine kane'o nobhotu, mai tei limamu te wawono neanomo sumuli nadumadi.” ¹⁹Yesus noehe maka noangkafi mie ana'a, nopoowa-owa bhe anaguhu'ino.

²⁰Wakutuu aitu nandoo seemie hobhine ompulu haa ta'umo nomai'ie kansuhu wulano miina bhe katiehea. Hobhine aini nomai'oti Yesus mai'ao we kundo maka nodingku dhambe-dhambeno dhubano. ²¹Dukuno lalono, “Sumanomo ta'adumingku kaowu dhubano ao'osamo.” ²²Tamaka Yesus nodoli, nowohamo hobhine amaitu bhe nopugau ambano, “Fekatangka lalomu wa'ina, hampano kaparasaeamu ne Idi mo'osamo.” Notanda aitu hobhine na'a no'osamo.

²³Nohato se lambuno neangkando mande'aono lambu kasambahea'a sa'ituini, Yesus nowoha mie mepuntono suli [katandaino kaguguhuno lalo] bhe mie sigao'ano dohobho sepali'a. ²⁴Ambano Yesus, “Gampiomu, kapa'amo ana'i aini miina namatea, tamaka noodo.” Tamaka tadofuta-futaa'i. ²⁵Pada dogihasi mie bhahi maitu, Yesus nopesuamo nointaha limano ana'i ana'a. Ana'i aitu lasao nowanu. ²⁶Bhihitano kadhadhia amaitu nokolele ne koseka'ewa'ae kadie aitu.

Yesus nefowula matando kabunto dohodua

9:27-31

²⁷Yesus nofopansuhumo kala-kalano, gaha'a doangkafie dohodua kabunto bhe dekei-kei ambado, “Mobhela kainsami lalo, sampu'ano Daud!” ²⁸Sanopesua ne se'onu lambu, kabunto hoduanomaitu domai'iemo. Yesus nofeenadamo ambano, “Parasaea'omu bhahaa naembali ameka'osakoomu?” Ambado, “Taparasaea, Wampu.” ²⁹Pada aitu Yesus nofedampamo matando bhe nopugau

ambano, “Nokadhadhia'o toha peda neparasaeamiu itu.” ³⁰Matando lasao nentalea. Yesus nofodhagadamo ambano, “Posi'ondo-omu koise mekapuna ne la'ae maka dua.” ³¹Tamaka kohoduando dokala dofolele bhihitano Yesus ne koseka'ewa'ae kadie aitu.

Yesus nefeka'osa seemie bhea

9:32-34

³²Dokala kaowu mie hoduanu na'a, deowamo dua seemie bhea nepesuakino seetani ne Yesus. ³³Pada nofolimba seetani na'a, bhea aitu lasao nopande nopugau. Mie bhahi tadomente, ambado, “Kadhadhia pedando ini miina'o daohooaomua ne witeni Israel inia.” ³⁴Tamaka ambado miendo Farisi, “Anoa ini nefolimba seetani, nopake kuasano Kafeompu'ando seetani.”

Yesus nobhela lalono ne mie bhahi

9:35-38

³⁵Pedamo aitu, Yesus noliligi kota bhe liwu ne itu, nofofoina'u weo lambu kasambahea'a bhe nefolele Bhihita Metaano Kafo-pahinta'ano Lahata'ala, poowa nefekasali sabhaha saki bhe kadaino namisi. ³⁶Nowoha mie bhahi maitu, Yesus nobhelaandamo lalono, kapa'amo dongawamo bhe miinamo dakototonolaloa, tapedamo dhumba tapa kodhaga'ano. ³⁷Nopugaumo Yesus ne anaguhu'ino ambano, “Pehapi so netobhe nobhahi, tamaka kumahadhaano dendai. ³⁸Dadi'anomo mesaloomu ne kokaampono na'a, naetudu mie dakumala datumobhe.”

Yesus nebhasi anaguhu'i doompulu hodua

10:1-4

Mrk 3:13-19; Luk 6:12-16

10 Yesus nebhasi anaguhu'ino doompulu hodua maka nowa'anda kuasa daefolimba seetani, daefekasali sabhaha saki bhe kadaino namisi. ²Pedamo aini neando rasulu ompulu hoduanu na'a. Kabhao-bhaono Simon nekonando Petrus bhe Andreas kakuta'ano. Pada ana'a Yakobus anano Zebedeus bhe Yohanes kakuta'ano. ³Maka Filipus bhe Bartolomeus, Tomas bhe Matius mealano sewa, Yakobus anano Alfeus bhe Tadeus. ⁴Simon miendo Zelot^a bhe Yudas Iskariot. Anoamo ini mowano Yesus ne limano kaewando.

Takando rasulu'i ompulu hoduanano

10:5-15

Mrk 6:6b-13; Luk 9:1-6

⁵Yesus notudumo anaguhuno ompulu hoduanano na'a dakumala bhe nofohatoda ambano, “Koise angkafiomu kampuna humope'ano we liwundo mie suano Yahudi tawa mesua'ano weo kotando miendo Samaria. ⁶Tamaka kalaomu ne umatino Israel kolilinono tapedamo dhumba. ⁷Kalaomu bhe foleleomu, ‘Kafopahinta'ano Lahata'ala noma'omo.’ ⁸Feka'osadaomu mie mosaki, fowanudaomu mie mate, feka'uhidaomo mie kokuli modaino, folimbadaomu seetani. Kosasawi'ae ini awae'omu miina umolie'omua, dadi'ano-mo tafowa'aomoomu dua.

⁹Koise mewowo'oomu bulawa, tawa salaka bhaha'i dhoi tambaga ne kawawemiu. ¹⁰Koise dua mewowo'oomu bhaku so we laano sala, koise mewowo'oomu bhadhu nahaa tuwu, koise mepake-omu kaampini tawa katuko, kapa'amo mie kumahadhaa nopantasi na'umawa ponambono. ¹¹Ane mesua'omu ne kota tawa ne liwu, me'ondoomu mie mantasino so kabutu'amiu, meate-ateomu ne itu ampa kumalaomu toha. ¹²Ane mesua'omu ne lambudo mie fe-abhadaomu putae, ‘Kabarakatino Ompu so polambu aini.’ ¹³Ane damantasi, kabarakatino kafeabhamiu naeatemo ne andoa. Tamaka ane paise, kabarakatino nasumuli ne wutomiu. ¹⁴Ane nandumandoo mie tapa tumahimakoomu tawa dokiido dametingkeoomu, limba bhe hunsaomu lambu tawa kota aitu; tantae'omu bhe bunga-hasino a'emiu. ¹⁵Amohatokoomu kotu-kotu'u, nahumato Oleono Kiama kahukumu ne'awano witenso Sodom bhe Gomora nandoo naosape ane dapototoane bhe so ne'awano liwu aitu.”^a

Kakadee-dee so netempaloi

10:16-33

*Mrk 13:9-13;**Luk 12:2-9; Luk 21:12-19*

¹⁶“Tandai'eomu! Atumudukoomu kumalaomu nada dhumba monaleno damesua ne wunta-wuntando da'u ngkahoku. Dadi'ano-mo tabeano mengkowaweomu nada ule bhe naelaa lalomiu nada dhaadhaha.

¹⁷Ampamo kaowu kodhagaomu ne mie, kapa'amo dahumakokoomu bhe damowakoomu ne Sahano Agama. Dahumambisiangkokoomu

^a 10:15 Sodom bhe Gomora, ondo Kej 19:24-28

habuta weo lambu kasambahea'ando. ¹⁸Hintimiu datumonda-koomu ne wiseno kabhalano liwu bhe kafeompu'a mba'inomo kaparasaeamiu ne Idi. Aini somo katolalamiu membaliomu sakusiiku ne andoa bhe mie tapa'o mande'aono Lahata'ala. ¹⁹Ane damowakoomu ne fobhitahakino, koe nekenda-kenda handamiu nada amai tawa o ae so pugaumiu. Kapa'amo so pugaumiu itu dama'angkoe'omu wakutuu aitu dua. ²⁰Suanomo hintimiu so mugau-no, tamaka Rohino Amamiu te surugaa so kosuahano namangka ne hintimiu.

²¹O mie damowa kakutando ne kokuasano damongkoe'ao, pedamo dua o ama damowa anando damongkoe'ao. ²²Hintimiu ini dabansikoomu sabhaha mie mba'inomo neaku. Tamaka so kosabahano napotaami ampa namalusi, damosalamatida. ²³Ane damodee-deekoomu ne se'onu liwu, filei'omu ne liwu sigao'ano. Amohatokoomu, kotu-kotu'u pae'o madae'omu liwu-liwuno Israel mangkai'eomua, Anano Manusia – Idimo ini – nahumatomo. ²⁴Seemie anaguhu pae nalumiu guruno, tawa seemie bhatua pae nalumalo kafeompu'anoa. ²⁵Naetaamo seemie anaguhu napototo bhe guruno, bhe seemie bhatua napototo bhe kafeompu'ano. Ane kolambuno dakumonaemo Beelsebul [ma'anano Kafeompu'ando seetani,] bhemo toha mie weo lambuno; ingka dawambakianda sabhaha modai'ano. ²⁶Dadi'anomo koe mote'iomua; kapa'amo kosasawi'ae tifebuni'ano damotiumbae; sabhaha rahasia damekantalaea'ie. ²⁷O ae nepugau'aoku weo kahohondo, pugauaneomu ne mentalea'ano. O ae nekamuntui ne tingalamiu, foniomu te melangke'ano maka foleleomu ne mie bhahi. ²⁸Koise mote'iomu ne mie mepongkono mbadha tamaka miina dakokuasa daepongko alusu. Ampamo kaowu mote'iomu ne Anoa kokuasano fofobinasano naetaa alusu naetaa mbadha weo narakaa.

²⁹Ingka dopande'aanemo o rone doasoe haa ulu sedhoi. Tamaka bhe nase'ulu miina bhe mondawu'ano we wite ane pae namoindalo Amamu te surugaa. ³⁰Hintimiu itu bhemo wuluno fotumiu dopadae do'epie. ³¹Dadi'anomo koise mote'iomua, noliu'e hintimiu itu bhe kawaindo rone.

³²La'ae mangakuno ne wisendo manusia putae anoa noangkafi Idi, a'umakui'e dua te wiseno Amaku te surugaa. ³³Tamaka la'ae gumagano ne wiseno manusia putae anoa miina namangkafi Idi, agumagai'e dua ne wiseno Amaku te surugaa.

Yesus neowa powengke-wengke'a
10:34-11:1

³⁴Koise kofekihomu hatoku ini aeowa pometaa te dhunia. Ahato miina aeowa pometaa, tamaka o kampue [ma'anano powengke-wengke'a]. ³⁵Kapa'amo maiku ini aepogaati'ao amano bhe anano, ana'i hobhine bhe inano, seemie hobhine bhe ponია hobhine-no. ³⁶Tangkanomo kaewando mie sanea mie weo lambu.

³⁷La'ae so moasi'aono inano bhe amano nalumiu'e kaasino ne Idi, pae namantasia namangkafi kanau. La'ae moasi'aono anano mo'ane tawa hobhine nalumiu'e kaasino ne Idi pae namantasia namangkafi kanau. ³⁸La'ae so pata tumongkuno sau salipuno^a maka namangkafi kanau, pae namantasia so Idi. ³⁹La'ae so potaami'ano inawano, namiinae inawano. Tamaka la'ae miinaeno inawa mba'inomo noangkafi Idi, tetewei namehapi dadi mpuuno.

⁴⁰La'ae tumahimakoomu, notahimamo dua Idi; maka la'ae tumahimano Idi, notahimamo Anoa tumudu kanau. ⁴¹La'ae metahimano seemie anabii weo lambuno mba'inomo mie aitu o anabii, nae'awa ponambono anabii; la'ae metahimano mie banara mba'inomo mie aitu nobanara, naetahima ponambono mie banara. ⁴²La'ae fowa'aono oe kafoho'u mahingga nasekampoho'u'a kaowu so mie mepandano kaengkoha'a ini mba'inomo mie aitu anaguhuku, kotukotu'u pae namiinaea ponambonoa.”

11 Nopalusi nofohato anaguhu'ino ompulu hoduanu na'a, Yesus nohunsamo liwu aitu maka nokala nofofoina'u bhe nefolele Bhihita Metaa ne liwu-liwu moma'o'ano ne itu.

Yesus bhe Yohanes Fokadiuno
11:2-19

Luk 7:18-35

²Weo katohongku Yohanes nofetingke dua nehabuno Kristus. ³Dadi'anomo notudu anaguhu'ino dameena ne Yesus ambado, “Hintumo bhahaa so humatono peda nedhandi'aono Lahata'ala itu, kaa taeantagi dua mie sigao'ano?” ⁴Yesus notobhoosida ambano, “Sulimoomu, fohatoaneomu Yohanes o ae nefetingkemiu bhe newohamii. ⁵Kabunto suli dofowoha, mie kalu dekala-kala, kokuli modaino donggela, kapongke dofofetingke, mie mate suli dodadi bhe mie ngkumaasi-asi defebhihitaianda Bhihita Metaa.^b

^a 10:38 Ma'anano: do'unda mahingga damate.

^b 11:5 Yes 35:5-6, 61:1

⁶Dokodawua mpuu mie tapa mongahe'i kanau hampano kandidatekino lalo.”

⁷Dokundo kaowu anaguhu'ino Yohanes, Yesus nopugaumo ne mie bhahi, nopulao'ao Yohanes ambano, “Kala me'ondoomu ae gaha'a we pandaso bhalano endefi'ini? Me'ondoomu wulu ne-angko-angkonu kawe baahaa? ⁸Baahaa kala me'ondoomu ae we pandaso bhalano? Me'ondoomu mie kopakea alusuno? Ingka mie kopakea alusuno deate weo kamali. ⁹Kaowu kala me'ondoomu ae we pandaso bhalano? Me'ondoomu seemie anabii? Ingka anoamo, bhahamo noliu'e anoa bhe seemie anabii. ¹⁰Kapa'amo Yohanes ini nepulao'aono wambano Kitabi peda aini,

[Ambano Lahata'ala] ‘Anoamo ini katuduku,
atudue nama'induluangko, naebhongkaangko
kaangka'a te wisemu.’^a

¹¹Amohatokoomu, kotu-kotu'u ne olotando manusia lumenteno ne dhunia ini miina bhe moliuno Yohanes Fokadiuno; tamaka foliuno kahobu weo Kafopahinta'ano Lahata'ala nofoliu'e kabhala.

¹²Notanda Yohanes notiumba ta'ampa aitu, Kafopahinta'ano Lahata'ala doewangie, mewangie na'a dokopatudhu dasumaohi bukue.

¹³Kapa'amo kosasawindo anabii bhe Kitabino Musa dofofohato-anemo so kumadhadhia'ano ampa katiumba'ano Yohanes. ¹⁴Maka ane tumahimae'omu, Yohanesmo ini anabii Elia so humatono itu.^b

¹⁵Ane dokotingala, beano dametingke!

¹⁶Apototoane bhe ae baahaa mie ne dhamani aini? Andoa tapedamo kaana-ana'i we daoa, dopolo'o-lo'oi bhe sabhangka'indo, ambado, ¹⁷‘Ingka taetempaangkoomu ganda,^c tamaka miina luminda-omu; taelagu-laguangkoomu kapea, ingka miina moguguhuomua.’

¹⁸Kapa'amo Yohanes nohato, miina naomaa'a miina naoho'ua, ambado mie, ‘Anoa maitu nopesuakie seetani.’ ¹⁹Pada ana'a Anano Manusia – Idimo ini – nohato nohumaa nofoho'u, ambado mie, ‘Soba ondoomu, mie kumadau-dau bhe pande foho'u, sabhangkando meala'ino sewa bhe mie kodhosa.’ Tamaka kakotimbangino Lahata'ala notipande'ao kakotu'uno ne hasilino.”

^a 11:10 Mal 3:1

^b 11:14 Mal 4:5

^c 11:17 Sakotu'uno: *taepuntoangkoomu suli*.

Liwu-liwu tapa marasaeano

11:20-24

Luk 10:13-15

²⁰Pada aitu Yesus nofe'alamo liwu-liwu kaehabu'ano tanda tapa mentela, kapa'amo miina dametompa'ao dhosando bhe dadumoli ne Lahata'ala mahinggamo ne itu foliu'anomo kabhahi tanda nehabuno. ²¹Ambano, “Balaamo hintu liwuno Korasim! Balaamo dua hintu liwuno Betsaida! Ane endefi'ini we kotano Tirus bhe Sidon nakumadhadhia tanda-tanda tapa mentela newohamiau ini, tetewei nomponamo dadumoli ne Lahata'ala, daepake bhida bhe daetei abu te fotundo _{peda katandaino dososo'ao dhosando,}^a ²²Tamaka amohatokoomu, nahumato Oleono Kiama, naosape kahukumuno miendo Tirus bhe Sidon bhe kahukumu so ne'awamiau. ²³Hintu liwuno Kapernaum, kuna'emu dasumangkeko te lani? Paise, hintu da'umohoko we narakaa, kapa'amo ane endefi'ini we Sodom nakumadhadhia tanda-tanda tapa mentela newohamiau ini, tetewei liwu aitu nandumandoo'e ampa se'oleo itu.^b ²⁴Tamaka amohatokoomu, nahumato Oleono Kiama, naosape kahukumuno miendo Sodom bhe kahukumu so ne'awamiau.”

Kasali'ino Omputo Fosalamatino

11:25-30

Luk 10:21-22

²⁵Wakutuu ana'a Yesus nosambaheamo ambano, “Notumpu laloku, Ama, Ompuno lani bhe dhunia, kapa'amo kosasawi'ae ini febungie ne mie kotimbangi bhe mie mande, tamaka fotiwohae ne mie mepandano kaengkoha'a pata kokasikolano. ²⁶Daanumo Ama, pedamo aitu kaposahasi'anomo lalomu. ²⁷Kosasawi'ae padamo nowa'a kana'e Amaku. Miina bhe mande'aono Anano Lahata'ala mpahinomo Amano. Miina dua bhe mande'aono Amano mpahinomo Anano, bhe kosasawindo mie ne'unda'aono Anano Lahata'ala damande'ao Amano.

²⁸Mai'omu ne idi, hintimiu mowuleno bhe kowowo'o mobhieno, maka ama'angkoomu kalalesano lalo. ²⁹Tongkuomu wowo'oku _{ma'anano angkafi pahintaku} bhe poguhuomu ne Idi, kapa'amo Idi ini netaa laloku bhe afekapanda Wutoku. Tetewei me'awaomu kalalesano lalo. ³⁰Kapa'amo pahinta newa'aoku nomuda, wowo'o nefotongku'aoku nosape.”

^a 11:21 Kotano Tirus bhe Sidon, ondo Yes psl 23; Yeh psl 26-28

^b 11:23 Sodom, ondo Kej 19:24-28

Anaguhu'ino Yesus detobhe gandum ne oleono Sabat

12:1-8

Mrk 2:23-28; Luk 6:1-5

12 Sewakutuu, ne oleono Sabat Yesus bhe anaguhu'ino dolalo weo kaampono gandum. Mba'inomo do'aho, anaguhu'ino detobhemo wunano gandum maka dohumaa. ²Dowoha amaitu, ambado miendo Farisi, “Soba ondo anaguhu'imu maitu, ingka dekangkala'imo faliano oleono Sabat.” ³Tamaka Yesus tanotobhoosi ambano, “Miina'o basae'omua gaha'a nehabuno omputo Daud wakutuuno wutono bhe mangkafie do'ahomo? ⁴Ingka nopesua weo Lambuno Lahata'ala maka nohumaa roti kapopanga so Lahata'ala. Gaha'a weo tubhono agamantoomu roti ana'a o falia daomaa'e andoa, naetaa wutono naetaa mie mangkafie, mpahinomo imamu.^a ⁵Bhahaa miina dua basae'omua weo Kitabino Musa, ne oleono Sabat imamu kumahadhaano weo Lambuno Lahata'ala ingka dekangkala'i tubhono Sabat, tamaka miina dua dakoka'alaa? ⁶Amohatokoomu, ne ini nandoo lumiuno Lambuno Lahata'ala. ⁷Notibuhi weo Kitabi, ‘Kapoindaloku dopomobhela-bhela'ao lalo, suano kapopangaa.’^b Ane kotu-kotu'u lumosangie'omu ma'anano wamba aini, tetewei pae mefo'alaomu mie tapa koka'ala. ⁸Anano Manusia – Idimo ini – nokokuasa dua namotantu atorano oleono Sabat.”

Yesus nefeka'osa mie ne oleono Sabat

12:9-15a

Mrk 3:1-6; Luk 6:6-11

⁹Nomai'ao ne itu Yesus nopesuamo weo lambu kasambaheando. ¹⁰Ne itu nandoo seemie nokepe limano sembali. O mie dofeenamo ne Yesus, “Weo tubhono agamantoomu naembali bhahaa daefeka'osa mie mosaki ne oleono Sabat?” Patudhundo damo'alaa. ¹¹Tamaka Yesus nopugau ne andoa ambano, “Ane ibahano ne olotamiu itu nandoo bhe kodhumbano se'ulu, gaha'a ne oleono Sabat dhumbano nondawu weo ola, namafa'iane bhahaa? Ingka tetewei nahumakoe maka namolimbae? ¹²Ingka noliu'e manusia bhe dhumba. Dadi'anomo ne oleono Sabat naembali daehabu metaa'ano.” ¹³Pada ana'a nopugau ne mie mokepeno lima maitu, “Fonsoho limamu!” Mie aitu nofonsoho limano, lasao no'osa peda

^a 12:3-4 1Sam 21:1-6; Im 24:5-9

^b 12:7 Hos 6:6

limano sembalino. ¹⁴Tamaka miendo Farisi tadolimba maka dopokana-kanagau damongko Yesus. ^{15a}Gaha'a Yesus nopande'aane patudhundo maka nofogampi Wutono.

Yesus katuduno Ompu

12:15b-21

^{15b}Dobhahi mangkafino Yesus, kosasawindo mosaki'ano nofeka'osada. ¹⁶No'ele'aanda sepali'a daetaatanga putae la'ae Anoa maitu. ¹⁷Aini so noko'ula'ao bhoasao nefosampeno anabii Yesaya peda aini,

¹⁸ Ambano Lahata'ala, “Ainimo katudu nepiliku,
nemoasi'aoku, neposahasi'aono laloku.

Rohiku atumei'e we lalono,

Anoamo so mefoleleno tubhono kasalamati ne
sabhaha bansano liwu.

¹⁹Anoa pae napotagalia, pae nakumeia,

pae dua dametingkea suahanoa ne amai kaangka'a.

²⁰Wulu tipakuno pae natumampuea,

kantalea mohawuno hende pae nameonia.

Anoa napotaami sampe tubhono kasalamati neowano
nafotalo.

²¹Anoamo so kaposahuna'aondo sabhaha bansano liwu.”^a

Yesus bhe Beelsebul

12:22-32

Mrk 3:20-30;

Luk 11:14-23; Luk 6:43-45

²²Pada ana'a deowaanemo seemie nepesuakino seetani. Mie ana'a nobunto bhe nobhea. Yesus nofeka'osae sampe nembalimo nopugau bhe nofowohamo. ²³Kosasawindo mie tadomente, ambado, “Anoamo ini bhahaa nekonando sampu'ano Daud?” ²⁴Tamaka dofetingke amaitu, miendo Farisi dopugaumo ambado, “Kaembali'ano mie aini nefolimba seetani hampano nopake kuasano Beelsebul, Kafeompu'ando seetani.” ²⁵Yesus nopande'aane fekihindo lasao nopugau ne andoa ambano, “Ane se'onu kakolaki'a pae nase'ise tamaka sadhia nopoewa-ewangi tetewei nabinasa; pedamo dua aitu ane se'onu liwu tawa se'onu polambu pae dase'ise tamaka sadhia dapogiha-giha pae dua naentaraa. ²⁶Dadi'anomo ane Kafeompu'ando seetani naefolimba seetani, ingka miinamo

^a 12:18-21 Yes 42:1-4

nase'ise, noewangimo wutono. Nada amai naentara dua kafo-pahinta'ano seetani na'a? ²⁷ Ambamiu aefolimba seetani apake kuasano Beelsebul. Ane peda ana'a anaguhu'imiu depake kuasa ae defolimba seetania? Dadi'anomo nehabundo maitu katandainomo ka'alano fekihimi. ²⁸ Tamaka ane aefolimba seetani apake kuasano Rohino Lahata'ala, sakotu'uno nohatokoomu Kafopahinta'ano Lahata'ala.

²⁹ Ane damesuaki lambuno seemie mo'osa maka dasumaohi buku kanandoono, tabeano datumapu kadeki kolambuno na'a. Mada aitu kane'omo naembali darumampasi kanandoono. ³⁰ La'ae tapa pobhai-no bhe Idi noewangi kanau; la'ae tapa humamba kanau taefohompu mie, mie aitu mehabuno pogasa-gasa'ando mie. ³¹ Dadi'ano-mo amohatokoomu: kosasawi'ae dhosa bhe ka'umbu ne manusia nati'amponi, tamaka ka'umbu ne Rohino Lahata'ala pae nati'amponia. ³² Ane o mie nopahampugau noewangi Anano Manusia nati'amponi; tamaka ane dopahampugau doewangi Rohino Lahata'ala pae nati'amponia, naetaa te dhunia ini, naetaa we sulia'."

Pu'uno sau bhe bhakeno

12:33-37

Luk 6:43-45

³³ "Ane dopoindalo dae'awa bhakeno sau metaa'ano, tabeano netaa dua pu'uno. Ane miina naetaa pu'uno, bhakeno miina dua naetaa. Kapa'amo sau dopande'aane ne bhakeno. ³⁴ Hintimiu ini sampu'ano ule modai! Nada dua amai mefolimbaomu pugau metaa, sangi'anomo wutomiu mie modai? Kapa'amo lumimbano ne wiwi, nomai'ao ne kamponono totono lalo. ³⁵ Mie metaa nefolimba metaa'ano mai'ao ne kampebuni'ano lalo metaa'ano. Pedamo dua aitu mie modai nefolimba modai'ano mai'ao ne kampebuni'ano lalo modai'ano. ³⁶ Amohatokoomu: sabhaha pugau tapa kofahalaa dapowiseane wuto nahumato Oleono Kiama. ³⁷ Kapa'amo waktuu ana'a namokantibhako bhaha'i namo'alako Lahata'ala, neatemo ne pugaumu."

Tandano anabii Yunus

12:38-42

Mrk 8:11-12; Luk 11:29-32

³⁸ Waktuu aitu dopugaumo seemie hodua pande Kitabi bhe miendo Farisi ne Yesus, "Guru, gao mani taoha mehabu kainsami tanda tapa mentela." ³⁹ Yesus tanotobhoosi ambano, "Mie dhamani aini dodai diundo bhe miina daeangka, gaha'aitu desalo se'ise

tanda. Tamaka paise dama'anda, ampamo kaowu tandano kumadhadhiano ne anabii Yunus. ⁴⁰Kapa'amo peda anabii Yunus neate weo handano kenta bhalano tolu oleo tolu alo, nadamo dua aitu Anano Manusia naeate we lalono wite tolu oleo tolu alo. ⁴¹Nahumato Oleono Kiama, miendo Niniwe dasiwanu-wanu'a bhe mie dhamani aini maka damo'alada. Kapa'amo miendo Niniwe dofetingke kaowu bhihita neowano anabii Yunus, dofetompa'aomo dhosando bhe dodoli ne Lahata'ala. Sakotu'uno humatono ini noliu'e anabii Yunus.^a

⁴²Nahumato Oleono Kiama, omputo hobhine mai'aono we liwuno Sheba nasiwanu'a bhe mie dhamani aini maka namo'alada. Kapa'amo omputo hobhine aini nomai'ao we tompano dhunia nametingke kafoina'u kotimbangino omputo Salomo. Sakotu'uno humatono ini noliu'e omputo Salomo.”^b

Seetani nosuli kundo

12:43-45

Luk 11:24-26

⁴³“Ane seetani nolimba nomai'ao ne manusia, tanolilimo ne wite pandaso ne'ondofi kafeolu'ano tamaka miina nae'awaa. ⁴⁴Dadi'ano-mo ambano, ‘Naetaa asumuli we lambu kahunsa'aku.’ Nohato gaha'a lambu ana'a miina nakomiea, nonggela bhe notifosintuwu. ⁴⁵Pada ana'a nosulikimo sabhangkano dopipitu maka dopesua deate ne itu. Seetani bhaino maitu dofoliu'e dua kadaindo. Panda-pandano mie aitu dhulu kadaha bhe pakatandano. Nadamo dua ana'a so kumadhadhia'ano ne mie modaino dhamani aini.”

Yesus bhe bhahitie'ino

12:46-50

Mrk 3:31-35; Luk 8:19-21

⁴⁶Tangasano Yesus nopugau ne mie bhahi maitu, dohatomo inano bhe bhahitie'ino. Andoa deehe-ehe we simbali, gaondo damo'awaane. ⁴⁷Nofohatoemo seemie ambano, “Guru, inamu bhe bhahitie'imu deehe-ehemo we simbali, gaondo dapo'awaangko.” ⁴⁸Tamaka Yesus tanotobhoosi mie ana'a ambano, “La'ae gaha'a inaku? La'ae bhahitie'iku?” ⁴⁹Pada ana'a nosusumo anaguhu'ino bhe nopugau ambano, “Aini'adamo inaku bhe bhahitie'iku. ⁵⁰Kapa'amo la'ae mangkafino kapoindalono Amaku te surugaa, anoamo bhahitieu mo'ane, anoamo bhahitieu hobhine, anoamo dua inaku.”

^a 12:40-41 Yun 1:17, 3:1-10

^b 12:42 1Raj 10:1-10; 2Taw 9:1-12

Kapalendano mie me'ewino wine

13:1-23

Mrk 4:1-20; Luk 8:4-15

13 Ne oleo ana'a Yesus nolimba we simbalino lambu maka nokala nengkoha we wiwino te'i. ²Mie bhahi dopohatohatomo toha dolibu-libue, sampe nosawimo ne bhangka maka nengkoha. Mie bhahi tadeehe-ehe te wite. ³Nobhahi kafoina'uno Yesus nepakeanda kapalenda. Ambano, "Nandoo seemie mekaampono nokala ne'ewi wine. ⁴Tangasano ne'ewi, nandoo wine mondawu'ano ne kaangka'a. Gaha'a dohatomo ka'uhi lumola, dopadae dohumaa'e. ⁵Nandoo dua mondawu'ano ne kamo'ali, witeno miina naokapaa. Wine aitu nopikitumbu mba'inomo nonifi witeno. ⁶Tamaka hato nopana oleo, tumbuno noleleumo maka nomate mba'inomo pahakano miina nakumamaa. ⁷Nandoo dua wine mondawu'ano we wuntano kahoku kokihi. Kahoku aitu nodhulu kabhala, maka no'onti'i kantisa na'a ampa nomate. ⁸Sigao'ano nondawu ne wite menowu, sampe nokobhake. Bhakeno nandoo mo'ono onu sewili, nandoo nomo fulu, nandoo dua tolu fulu onu. ⁹Ane dokotingala beano dametingke."

¹⁰Pada aitu domaimo anaguhu'ino, dofeenae ambado, "Noafa gaha'a ingka fofoina'u'ao mepake kapalenda?" ¹¹Notobhoosimo Yesus ambano, "Hintimiu nowa'angkoomu kadawu Lahata'ala pande'aanemoomu rahasiano Kafopahinta'ano, tamaka mie sigao'ano miina. ¹²Kapa'amo kokanandoono datumubhahiane ampa napontalabhi-labhi, tamaka tapa kokanandoono, o ae maka dua kanandoono damadae damala'ie. ¹³Pedamo ana'a kaepake'aku kapalenda ne andoa, hampano mahingga da'umondo paise dakoniwoha, mahingga dametingke paise dakonilosangi. ¹⁴Aini noposahataamo bhe nekosuaha'aono anabii Yesaya peda aini,

‘Hintimiu safeti-fetingke tamaka pae melosangieomu,
sawoha-woha tamaka pae konipande'ao'omua.

¹⁵Kapa'amo totono lalondo mie andoa ini nofekontumo,
tingalando nopo'opimo, matando nopilomo.

Kanandoo'ano peda ana'a keana dofowoha'ao
matando,

keana dofofetingke'ao tingalando,

keana dua dolosangi'ao totono lalondo,

bhaha sala dodoli se idi maka ameka'osada.'^a

^a 13:14-15 Yes 6:9-10

¹⁶Tamaka kakodawuamiu, matamiu nofowoha, tingalamiu nofofetingke. ¹⁷Amohatokoomu, kotu-kotu'u dobhahi anabii bhe mie lumebe endefi'ini, gaondo damoha newohamiu aitu, tamaka miina daohaea; gaondo dametingke nefetingkemiu aitu tamaka miina dametingkeea.

¹⁸Dadi'anomo fetingkeomu ma'anano kapalenda me'ewino wine sa'ituini. ¹⁹Kotika mie metingkeno bhoasao Kafopahinta'ano Lahata'ala tamaka miina nalumosangiea, nomai'ie Kafeompu'ando seetani norampasi bhoasao kane'o ne'ewi weo totono lalondo maitu. Aitumo ma'anano wine mondawu'ano ne kaangka'a. ²⁰Wine ne'ewi ne kamo'ali, ma'anano mie metingkeno bhoasaono Lahata'ala, lasao dotahimae bhe do'ia'ane. ²¹Ampamo kaowu bhoasao aitu miina nakopahakaa weo totono lalondo sampe miina natumahaa. Sade'awa kasabhano tawa kakadee-dee mba'inomo doangkafi bhoasao maitu, lasao dohunsu kaparasaeando. ²²Wine mondawu'ano weo kahoku kokihi, ma'anano mie metingkeno bhoasaono Lahata'ala, tamaka nobhahi dofekihi so kadadi'ando bhe nobhohe-bhohe'ida kahangkaeano dhunia. Kosasawi'ae na'a nopesua weo totono lalondo no'onti'i bhoasaono Lahata'ala sampe miina nakohasilia. ²³Wine mondawu'ano ne wite menowu, ma'anano mie metingkeno bhoasaono Lahata'ala bhe dolosangie. Dadi'anomo nokobhake, nandoo mo'ono lentu'a, nandoo nomo fulu lentu'a, nandoo dua tolu fulu lentu'a hasilino."

Kapalendano dana ne wuntano gandum

13:24-30

²⁴Yesus nefohatoandamo dua kapalenda sigao'ano. Ambano, "Kafopahinta'ano Lahata'ala tapedamo seemie me'ewino wine metaa te kaampono. ²⁵Gaha'a sealo, tangasano doodo mie, nomaimo kaewano lasao ne'ewiane dana ne olotano gandum na'a maka nokala. ²⁶Hato notumbu bhe nokowunamo gandum na'a, notiwohamo dua dana sa'ituini. ²⁷Bhatuano lasao domai ne kafeompu'ando, ambado, 'Waompu, ingka wine metaa ne'ewimu te kaampo, tamaka nomai'ao ne amai bhahaa dana tatua?' ²⁸Ambano kafeompu'ando, 'Kahadhaano kaewa itua.' Ambado dua bhatua na'a, 'Bhahaa gaomu tabunatiemo dana maitu?'

²⁹Tamaka ambano kafeompu'ando, 'Koise, kapa'amo ane bunatie'omu dana itu, kunanomo gandum natibunati dua. ³⁰Hunsa'anomo kohaahonda'ae da'umende ampa metobhe'a. Nahumato metobhe'a,

amugau'aomo ne tumobheno, “Fo'onuomu kadeki dana itu, obhobhoe'omu maka tawue'omu. Mada aitu fo'onuomu gandum weo lambu kaentei'ano otiku.” ’ ’ ”

Kapalendano onuno wonoita bhe ragi

13:31-35

Mrk 4:30-34; Luk 13:18-21

³¹ Pada ana'a nefohatoandamo dua kapalenda sigao'ano, ambano, “Kafopahinta'ano Lahata'ala tapedamo dua onuno sau wonoita se'onu^a noalae seemie maka nohoo'e te kaampono. ³² Onuno sau wonoita ini foliuno kahobu ne olotano sabhaha wine, tamaka ane notumbu kaowu, no'ende noliuda sabhaha kantisa. Nembali pu'uno sau bhalano, sampe ka'uhi lumola domai dofekaufe ne ha'ano” .

³³ Nosunsumiane dua kapalenda aini. “Kafopahinta'ano Lahata'ala tapedamo ragi nealano seemie hobhine mbali kaefo'ende'ano roti. Ragi aini nokunsaloe bhe tariguno fato fulu baa ampa no'ende kosasawi'ae.”

³⁴ Yesus nofohatoanda kosasawi'ae na'a ne mie bhahi, nepakeanda kapalenda. Anoa miina sepali'a namoina'uda ane miina naepalendaanda. ³⁵ Aini mbali noko'ula'ao bhoasaono Lahata'ala nefosampeno anabii,

“Abhoka wambaku aepalenda,
amohatoanda tifebuni'ano mpini pakatandano
dhunia.”^b

Ma'anano kapalendano dana ne olotano gandum

13:36-43

³⁶ Pada ana'a Yesus nohunsamo mie bhahi, nopesuamo weo lambu. Domaimo anaguhu'ino maka ambado, “Fohato kainsami ma'anano kapalendano dana te kaampo sa'ituini.” ³⁷ Notobhoosidamo ambano, “Mie me'ewino wine metaa, ma'anano Anano Manusia – Idimo ini. ³⁸ Kaampono, ma'anano dhunia ini. Wine metaa, ma'anano umatino Kafopahinta'ano Lahata'ala; dana nokoma'ana'ao mie tumaino ne Kafeompu'ando seetani. ³⁹ Kaewa me'ewino dana, ma'anano Kafeompu'ando seetani. Tempono metobhe'a nokoma'ana'ao kafetompaino dhamani bhe tumobheno na'a o mala'ekati. ⁴⁰ Peda dana dofo'onue maka dotawue ne efi, namedamo dua na'a nahumato

^a 13:31 Onuno sau wonoita, sakotu'uno: *onuno sawi*.

^b 13:35 Mzm 78:2

kafetompaino dhamani. ⁴¹ Anano Manusia natumudu mala'ekati-no damo'onu sabhaha mie mekakodhosano manusia bhaindo bhe mie humabu modaino weo Kafopahinta'ano. ⁴² Kosasawindo na'a da'umohofida weo efino narakaa; ne na'a ta'o kangko'ae bhe ku'ino wangka. ⁴³ Wakutuu ana'a mie mongkilo dakotilanga nada oleo weo Kafopahinta'ano Amando. Ane dokotingala, beano dametingke!”

Kapalendano arataa tikantanono bhe muntia mo'ali

13:44-46

⁴⁴ “Kafopahinta'ano Lahata'ala tapedamo dua arataa tikantanono te kaampo. Gaha'a nandoo seemie umawae, maka suli nokantanoe. Ka'osano ka'iano nokalamo noasopi kosasawi'ae kanandoono maka no'oli kaampo ana'a.

⁴⁵ Pedamo dua ana'a, Kafopahinta'ano Lahata'ala peda seemie daga me'ondofino muntia mokesa. ⁴⁶ Nopo'awa'ao kaowu muntia foliuno kakesa bhe ka'ali, nokalamo noasopi kosasawi'ae ka-hangkaeano maka nosuli no'oli muntia na'a.”

Kapalendano puka

13:47-52

⁴⁷ “Kafopahinta'ano Lahata'ala tapedamo dua puka nelabu we te'i, notikaiane sabhaha kenta. ⁴⁸ Kentano notahusu, domaimo mie dohelae te ka'oti'a maka dengkoha dofepili kenta na'a. Metaa'ano dotei'e weo kaentei'a, tapa metaa'ano do'ohofie. ⁴⁹ Namedamo ana'a nahumato kafetompaino dhamani; mala'ekati damai dapogaati'ao mie modai bhe mie metaa. ⁵⁰ Mie modai da'umohofida weo efino narakaa, ne na'a ta'o kangko'ae bhe ku'ino wangka.”

⁵¹ Nofeenamo Yesus ambano, “Losangie'omu bhahaa kosasawi'ae ini?” Anaguhu'ino dotobhoosi ambado, “Uumbe.” ⁵² Ambano toha Yesus, “Dadi'anomo kotika pande Kitabi metahimano kafoina'uno Kafopahinta'ano Lahata'ala, tapedamo kolambuno molimbano ka-hangkaeano mai'ao ne kaentei'ano, nabu'ou nangkodau.”

Yesus dobansie we Nasaret

13:53-58

Mrk 6:1-6; Luk 4:16-30

⁵³ Nopalusi nofohatoanda sabhaha kapalenda na'a, Yesus nokalamo. ⁵⁴ Sahatono we liwu kamai'ao'ano, nofofina'umo weo lambu kasambahea'a. O mie tadomente bhe dopugau ambado, “Nomaiane ne amai bhahaa sabhaha kapande bhe kuasano nehabu

giu timente'aono maitu? ⁵⁵Ingka anoa ini anano tuka. Inano ingka Maria bhe bhahitie'ino ndo Yakobus, Yusuf, Simon bhe Yudas. ⁵⁶Ingka bhahitie'ino hobhine deate dua bhe intaodiomu. Kaowu ne amai noalae sabhaha kapande bhe kuasano maitu?" ⁵⁷Mie andoa na'a nondidiki lalondo sampe dokiidoemo. Gaha'a nopugau-mo Yesus ne andoa maitu ambano, "Seemie anabii dofosibhalae ne amai liwu. Ampamo kaowu ne liwu kamai'ao'ano bhe ne lambuno wutono miina damosibhalaea." ⁵⁸Dadi'anomo Yesus miina nabhahia nehabu giu timente'aono ne itu, mba'inomo miina damarasa'a'a.

Kamate'ano Yohanes Fokadiuno

14:1-12

Mrk 6:14-29; Luk 9:7-9

14 Wakutuu ana'a Herodes, kolaki we kadieno Galilea, no fetingke dua bhihitano Yesus. ²Dadi'anomo nopugaumo ne mie'ino ambano, "Mie aini tetewei Yohanes Fokadiuno. Anoa suli nodadi, kakokuasa'anomo nehabu giu timente'aono." ³Kapa'amo Herodes padamo nofotudu dohako Yohanes, dokatapue maka dotohongkue. Katitohongku'ano mba'inomo parakarano Herodias, mieno lambuno Filipus, nealano Herodes. Gaha'aitumo Filipus ini dosibhahitie bhe Herodes. ⁴Yohanes nefe'ulaiane ambano, "Ingka o falia mala Herodias so mieno lambumua." ⁵Herodes gaono namongko Yohanes, tamaka note'i mie bhahi, kapa'amo Yohanes doabhie seemie anabii.

⁶Se'oleo kolaki Herodes nehabu hame-hame nofe'ulai oleo kalente'ano. Ne hame ana'a kalambeno Herodias nolinda ne wisendo humatono. Herodes no'ia sepali'a nowoha lindano. ⁷Ka'osano ka'iano Herodes nopodhandi bhe nofemata ne kalambe ana'a ambano, "O ae maka dua so nesalomu, tetewei ama'angko." ⁸Mba'inomo kawudhuno inano, kalambe ana'a nopugau ambano, "Wa'a kanau fotuno Yohanes Fokadiuno, datumei'e ne tala; amalaemo dua aitu." ⁹Kolaki Herodes nopea lalono, tamaka hampano padamo nofemata ne wisendo humatono, nofopahintangimo tetewei dam'ane. ¹⁰Netudumo mie dotompe wu'uno Yohanes we kato-hongku. ¹¹Pada aitu fotuno Yohanes dowowo'oemo dotei'e ne tala maka dow'a'ane kalambe na'a. Pada notahimae, nowa'anemo inano. ¹²Dofetingke peda na'a domaimo anaguhu'ino Yohanes doala maeatino maka dokobuhue. Pada dokobuhue dokalamo dofohatoane Yesus.

Yesus nepakande mie dolima hewu

14:13-21

*Mrk 6:30-44;**Luk 9:10-17; Yoh 6:1-13*

¹³Nofetingke bhihita peda na'a, Yesus nogampimo nosawi ne bhangka, patudhuno nakumala we molino'ano namoisa. Sado-fetingke peda aitu, mie bhahi domai'ao ne sabhaha liwu do-angkafie doangka wite. ¹⁴Hato nosede, Yesus nowohamo mie bhahi maitu. Anoa nobhelaanda lalo sampe mie mosakino nofe-ka'osada.

¹⁵Noma'o kaowu naohondo oleo, domai'iemu anaguhu'ino bhe dopugau ambado, “Ingka nosoomo oleoa. Nolino sepali'a ne ini. Naetaamo tumududa dasumuli mie bhahi ini, neanomo naembali dae'oli otindo ne koliwu'ano.” ¹⁶Tamaka Yesus tanopugau, “Koemo dokalaa, hintimiu so makandedaa.” ¹⁷Ambado, “Ndumandoo'ano ne ini ingka roti kaowu lima onu bhe kentano haa ulu.” ¹⁸Ambano toha Yesus, “Owa kana'eomu.” ¹⁹Pada ana'a mie bhahi notududamo daengkoha ne kahoku. Dengkoha kaowu, noalamo roti lima onuno bhe kenta haa uluno na'a, nototohana te lani nefoampe katumpuno lalo ne Lahata'ala maka nobhebhehae. Pada ana'a nowa'andae anaguhu'ino dodawu-dawuandae mie bhahi maitu. ²⁰Kosasawindo dohumaa ampa dowe'i. Pada dohumaa dofo'onu kabhila'ando, nopono ompulu haa kalangka. ²¹Momaano, mo'ane kaowu dolima hewu, miina datilentua hobhine bhe ana'i.

Yesus nekala-kala te wawono oe

14:22-33

Mrk 6:45-52; Yoh 6:16-21

²²Pada ana'a Yesus notudumo anaguhu'ino dasumawi ne bhangka dama'indulu we sewetano, mie bhahi notududamo dua dasumuli. ²³Dokala kaowu mie bhahi, Yesus nofonimo te kabhawo nosamba-hea nomoisa. Nohondo oleo, sadaa-daa'e ne itu nomoisa. ²⁴Bhangka-ndo anaguhu'ino nohatomo we wuntano ndalo, nohambi-hambita'iane ewo mba'inomo desumpu kawea. ²⁵Hambi-hambi tolu mata kohondo'a Yesus nomai'idamo nekala-kala te wawono oe. ²⁶Dowohae nekala-kala te wawono oe, anaguhu'ino dotikenda sepali'a, ambado, “Aitu kahanda!” sampe dokei mpodea'ao kate'i. ²⁷Tamaka Yesus lasao nopugauanda, “Fekatangka lalomiu, o Idi inia, koise mote'iomua!” ²⁸Notobhoosimo Petrus, ambano, “Waompu, ane kotu-kotu'u o Hintu, tudu kanau amai'iko aekala-kala dua te

wawono oe.”²⁹ Ambano Yesus, “Maimo padaa!” Dadi'anomo Petrus nosampumo nomai'ao ne bhangka maka nokala te wawono oe napo'awa'ao Yesus.³⁰ Tamaka nowoha kaowu ka'osano kawea note'imo, maka notondumo uluno seendai-seendai sampe nokei, “Ompu, tulumi kanau!”³¹ Yesus lasao nofonsoho limano maka nointahae bhe nopugau ambano, “Kakuhano kaparasaeamu gaha'a! Noafa nopoibhaha'ao lalomu?”³² Pada ana'a dofonimo weo bhangka, gaha'a kawea notiehemu.³³ Mie weo bhangka dotaohao sombado bhe dopugau, “Kotu-kotu'u Hintu ini Anano Lahata'ala.”

Yesus nefeka'osa mie mosakino we Genesaret

14:34-36

Mrk 6:53-56

³⁴Dohato we sewetano, dosedemo we liwuno Genesaret.³⁵ Sadopande'aane mieno liwu putae humatono ini Yesus, dopofolefolelemo koseka'ewa'ae kadie aitu. Kosasawindo mie mosakino doowa'idamo ne Yesus.³⁶ Andoa desalo na'umunda'aanda dadumingku dhubano, mahingga dhambe-dhambeno kaowu. Kosasawindo dumingkue do'osamo.

Pahintano Lahata'ala bhe adhatino miendo Yahudi

15:1-20

Mrk 7:1-23

15 Pada ana'a dohatomo miendo Farisi bhe pande-pande Kitabi mai'aono we Yerusalem. Andoa domai ne Yesus bhe dofeena ambado,² “Noafa gaha'a anaguhu'imu maitu dokangkala'i adhatino awua'intoomu, ingka tadohumaamo miina daewanua peda atorano agamantoomu?”³ Tamaka Yesus tanotobhoosida ambano, “Noafa ingka hintimiu dua kangkala'iomu pahintano Lahata'ala maka fosibhalaomu adhatino awua'imiu?”⁴ Kapa'amo Lahata'ala nokowamba, ‘Fosibhalae inamu bhe amamu; mie me'awutino inano bhe amano tabeano damekamatee.’⁵ Tamaka ambamiu peda aini: ane o mie nopugau ne inano bhe ne amano ‘Kanandooku so atumanggo'ao hintimiu, nembalimo kapopanga so Lahata'ala’,⁶ maka mie aitu paemo naoafaa ane paemo namosibhala inano bhe amano. Peda kaowu ana'a ingka pisakie'omu bhoasaono Lahata'ala maka fosibhala adhatimiu wutomiu.⁷ Mie mehaa'ulano! Nokotu'umo nekosuaha'aono anabii Yesaya nopolao'ao hintimiu,

⁸ ‘Mie andoa ini dosombai kanau kaowu ne wiwindo, tamaka totono lalondo nokodo'o bhe Idi.

^a 15:4 Kel 20:12, 21:17; Im 20:9; Ul 5:16

⁹ Miina nako'ulu'a dosombai kanau,
kapa'amo kafoina'u nefoguhu'aondo pahintano
manusia.' ”^a

¹⁰ Pada ana'a Yesus nosali'i mie bhahi maitu maka nofohatoda ambano, ¹¹ “Fetingke bhe tandai'eomu! Suano mesua'ano ne wobhano manusia fofekaharamuno, tamaka lumimba'ano ne wobhano aitu'aemo fofekaharamuno.” ¹² Kaowu domai'iemu anaguhu'ino maka dofeena ambado, “Pande'aane bhahaa wambamu sa'ituinia nolea'ane lalondo miendo Farisi?” ¹³ Yesus tanotobhoosida ambano, “Kotika kantisa tapa netisano Amaku te surugaa, tetewei damadae dabunatie. ¹⁴ Koemo heruandaomua. Andoa itu kabunto metondano dua kabunto. Ane kabunto netonda kabunto, kohodua-ndu tetewei daondawu weo ola.”

¹⁵ Nopugaumo Petrus, ambano, “Fohato kainsamie ma'anano kapalenda sa'ituini.” ¹⁶ Ambano Yesus, “Gaha'a miina dua lumosangie'omua? ¹⁷ Miina mande'aaneomua gaha'a sabhaha mesua'ano ne wobhano manusia nosampu we handa maka do'ohoe ne dhamba? ¹⁸ Tamaka lumimba'ano ne wobha nomai'ao we totono lalo, aitu'aemo fofekaharamuno. ¹⁹ Kapa'amo nomai'ao we totono lalo nolimba sabhaha fekihi modai, dofopongko, domonsule, dopokawite-wite, dosibu, degau-gau bhe dofo'umbu. ²⁰ Medandomo na'a fofekaharamuno. Tamaka dohumaa'ao lima pata nefewaniu, miina nafofekaharamua.”

Seemie hobhine miendo Kanaan noparasaea

15:21-28

Mrk 7:24-30

²¹ Pada peda na'a Yesus nokalamo, nogampi we kadieno Tirus bhe Sidon. ²² Ne itu nomaimo hobhine miendo Kanaan [suano miendo Yahudi] meateno ne itu bhe nokei ambano, “Mobhela kanau lalo, Ompu sampu'ano Daud, anaku hobhine nopesuakie seetani nokadee-deemo sepali'a.” ²³ Tamaka Yesus miina sepali'a natumobhoosia. Dadi'anomo domaimo anaguhu'ino desalo ambado, “Tuduemo nakumala, ingka nofoangkafi kansuhu bhe nopoka-kei-kei.” ²⁴ Ambano Yesus, “Idi ini dotudu kanau a'umondofi kaowu umatino Israel kolilinono, andoa maitu tapeda'idamo dhumba miinae'ano.” ²⁵ Tamaka hobhine ana'a noma'otie, notaohao sombano ne Yesus bhe nopugau, “Waompu, tulumi kanau.” ²⁶ Yesus

^a 15:8-9 Yes 29:13

tanotobhoosi ambano, “Ingka pae namantasia daeala rotindo ana'i maka da'umohoane da'u.” ²⁷ Ambano dua hobhine aitu, “Anoamo na'a Waompu, ampamo kaowu da'u [peda insaodi ini] nohumaa dua kapondawu mai'aono ne medhano ompuno.” ²⁸ Yesus notobhoosi ambano, “Wa'ina, nobhala mpuu kaparasaeamu, dadi'ano-mo nokadhadhia'o toha peda kapoindalomu itu.” Gaha'a anano lasao dua no'osa.

Dobhahi mie mosakino nefeka'osano Yesus

15:29-31

²⁹ Nohunsa kaowu kadie aitu, Yesus nosohakimo wiwino te'ino Galilea maka nofoni nengkoha-ngkoha te kabhawo. ³⁰ Gaha'a mie bhahi dosipumpumo toha domai'ie bhe deowa'iane mie kalu, kakempa, kabunto, bhea bhe nobhahi dua mosakino sigao'ano. Andoa maitu doowada ne wiseno Yesus maka kosasawindo nofeka'osada. ³¹ Mie bhahi maitu tadomente dowoha bhea nopugau, kakempa no'osa, kalu nekala-kala, bhe kabunto nofowoha. Dadi'ano-mo kosasawindo dopudhimo Lahata'alando miendo Israel.

Yesus nepakande mie dofato hewu

15:32-39

Mrk 8:1-10

³² Yesus nosali'imo anaguhu'ino maka nopugau ambano, “Nobhelaanda laloku mie bhahi inia. Tolu oleomo dopobhai kanau bhe miinamo dako'otia. Akiido dasumuli'ao kulino handado bhahaa dokamposola we sala.” ³³ Ambado anaguhu'ino, “Nada amai dae'awa roti ne kalino aini so damakande'ao mie bhahi peda aini ampa daowe'i?” ³⁴ Ambano Yesus, “Fee onu gaha'a rotimiua?” Ambado, “Fitu onu bhe nandoo dua kakenta-kenta mohobu.” ³⁵ Pada nofeena, Yesus notudumo mie bhahi maitu dengkoha ne wite. ³⁶ Pada ana'a noalamo roti fitu onuno na'a bhe kakenta-kentano, nefoampe katumpuno lalo ne Lahata'ala, nobhebhehae maka nowa'andae anaguhu'ino dodawu-dawuandae mie bhahi. ³⁷ Kosasawindo na'a dohumaa ampa dowe'i. Pada dohumaa kabhila'ando dofo'onue nopono fitu kalangka. ³⁸ Mie momaano, mo'ane kaowu dofato hewu miina datilentua hobhine bhe ana'i. ³⁹ Pada peda na'a Yesus notudumo mie bhahi maitu dasumuli. Anoa nosawi ne bhangka maka nopolimba we kadieno Magadan.

Miendo Farisi bhe Saduki desalo tanda tapa mentela

16:1-4

Mrk 8:11-13; Luk 12:54-56

16 Sewakutuu dohatomo miendo Farisi bhe Saduki patudhundo damanso'alai Yesus. Andoa desalo namotiwohaanda tanda tapa mentela, so katandaino kuasano Yesus nomai'ao ne Lahata'ala. ²Tamaka Yesus tanotobhoosida ambano, “Ane ma'oleo nodedea lani, ambamiu ingka naombena toha oleo naewine. ³Ane hangkowine lani nodea lalo mohawu, ambamiu nako'use bhe nakokawea. Tanda-tanda te lani pande'aaneomu ma'anakie'omu, tamaka tanda-tanda kumadhadhiano ne dhamani aini miina. ⁴Mie dhamani aini nodai diundo bhe miina daeangka, gaha'aitu desalo se'ise tanda. Tamaka paise dama'anda, ampamo kaowu tandano anabii Yunus.” Pada nopugau peda ana'a, Yesus nohunsadamo.

Ragindo miendo Farisi bhe Saduki

16:5-12

Mrk 8:14-21

⁵Pada aitu anaguhu'ino Yesus dohatomo we sewetano te'i, gaha'a dolimpu dewowo'o roti. ⁶Nopugaumo Yesus, “Kodhagaomu bhe posi'ondoomu ne ragindo miendo Farisi bhe Saduki.” ⁷Dofetingke peda na'a dopugaumo sapada-pada andoa, “Kapugau'ano peda ana'a mba'inomo miina daewowo'oomu roti.” ⁸Yesus nopande'aane nepuga-pugau'aondo maka ambano, “Kakuhano kaparasaeamiu! Noafa gaha'a puga-pugau'aomu miina bhe rotia? ⁹Gaha'a miina'o dua lumosangie'omua? Miina me'ulai'eomua lima onu roti apakandeandae dolima hewu mie, fee kalangka gaha'a kabhila'ando nefo'onumiu? ¹⁰Pedamo dua aitu roti fitu onu apakandeandae dofato hewu mie, bhahaa fee kalangka kabhila'ando nefo'onumiu? ¹¹Noafa'ao dua miina lumosangie'omua, ingka suano roti patudhuku sa'ituini. Kodhagaomu bhe posi'ondoomu ne ragindo miendo Farisi bhe Saduki!” ¹²Pada ana'a kane'omo dolosangie patudhuno Yesus, gaha'a suano ragi kaefo'ende'a rotia, tamaka daposi'ondo ne kafoina'uno miendo Farisi bhe Saduki.

Petrus no'akui putae Yesus o Mesias

16:13-20

Mrk 8:27; Luk 9:18-21

¹³Nohato kaowu we kadieno Kaisarea Filipi, Yesus nofeenamo ne anaguhu'ino ambano, “Ambado mie, la'ae gaha'a Anano Manusia – Idi ini?” ¹⁴Ambado, “Nandoo mugauno Hintu Yohanes Fokadiuno,

nandoo mugauno Hintu anabii Elia, tamaka nandoo dua mugauno anabii Yeremia tawa seemie anabii sigao'ano.”¹⁵ Yesus nofeenadamo, “Ane ambamiu, la'ae gaha'a Idi ini?”¹⁶ Notobhoosimo Simon Petrus ambano, “Hintumo Mesias, Omputo Fosalamatino, Anano Lahata'ala dumadino [suhue dhamani,]”¹⁷ Ambano Yesus, “Kodawua sepali'a Simon anano Yunus, kapa'amo suano manusia mohato-angko, tamaka Amaku te surugaa.”¹⁸ Amohatoko, hintumo Petrus [ma'anano nea aini o kontu dempa,] maka te wawono dempa aini amoehe umatiku. Mahingga kuasano mate pae natumaloea.¹⁹ Hintu ama'angko kunsino Kafopahinta'ano Lahata'ala. O ae so ne'elea'aomu we dhunia ini, tokamo dua noti'elea'ao te surugaa. O ae so ne'unda'aomu we dhunia ini, tokamo dua noti'unda'ao te surugaa.”²⁰ Pada nopugau peda na'a no'ele'aandamo anaguhu'inoa daekapukapuna ne la'ae maka dua putae anoa maitu Mesias, Omputo Fosalamatino.

Yesus nofofohato'ao kakadee-dee so nenamisino

16:21-28

Mrk 8:31-9:1; Luk 9:22-27

²¹ Notandamo wakutuu ana'a Yesus nofohatomo anaguhu'ino mentalea-mentalea, putae Anoa tetewei nakumala we Yerusalem. Ne itu naobhahi nae'awa kakadee-dee mai'ao ne kamungkula'i, neangka'indo imamumu bhe pande-pande Kitabi. Andoa damongko, tamaka ne katolu oleono namanu namai'ao ne mate.²² Nofetingke peda na'a Petrus nohelamo Yesus ne sohihino maka notangahie ambano, “Paise, Ompu. Sio-siomo Lahata'ala pae sepali'a namolapasako ne balaa ana'a. Pae sepali'a nakumadhadhia.”²³ Yesus nodolimo maka nopugau ne Petrus, “Gampi hintu seetani! Hintu onto-ontomi kanau, kapa'amo fekihimu suano fekihino Lahata'ala, tamaka fekihino manusia.”

²⁴ Pada peda maitu Yesus nopugau ne anaguhu'ino, “La'ae maka so mangkafi kanau tabeano nahumunsa kafaraluuno wutono, natumongku sau salipuno [ma'anano do'unda mahingga damate,] maka namangkafi kanau.”²⁵ La'ae so potaami'aono inawano, namiinae inawano. Tamaka la'ae miinaeno inawa mba'inomo no-angkafi Idi, tetewei namehapi dadi mpuuno.²⁶ O ae fahalaano seemie manusia nae'awa kosasawi'ae kahangkaeano dhunia ini tamaka namiinae inawano? Nalumoliane ae bhahaa inawano maitu?²⁷ Kapa'amo namada kaowu Anano Manusia namai weo kakalabhiano Amano dapoangka'aane mala'ekatino. Wakutuu ana'a

nama'andamo [kabarakati tawa kahukumu] ne manusia seemie-seemie naposahataa bhe habuno. ²⁸Amohatokoomu, kotu-kotu'u ne olotando mie meehe-eheno aitu nandoo so pata'o mateno, ane pae daoha kadeki Anano Manusia namai naembali Omputo weo Kafopahinta'ano.”

Anaguhu'ino dowoha kakalabhiano Yesus te kabhawo

17:1-13

Mrk 9:2-13; Luk 9:28-36

17 Nopalusi nomo oleo, Yesus nowowo'omo Petrus, Yakobus bhe Yohanes kakuta'ano Yakobus, dofoni te kabhawo melangke'ano. Ne itu domoisa kaowu. ²Gaha'a Yesus tanotibhaliimo ulano ne wisendo. Woha'ano nokotilanga peda oleo, pakeano kapute kosilo. ³Pada ana'a dowohamo anabii Musa bhe anabii Elia dopuga-pugau bhe Yesus. ⁴Gaha'a nopugaumo Petrus ambano, “Ompu, ingka netaa domai'omu ne ini. Ane moindalo naetaa aefoehe natolu onu bhantea ne ini. Se'onu so Hintu, se'onu so anabii Musa bhe se'onu so anabii Elia.”

⁵Tangasano Petrus nopugau, tanosikaolumidamo olu nentalea sepali'a. Nomai'ao weo olu na'a notifetingkemo suaha ambano, “Ainimo Anaku timoasi'aono, neposahasi'aono laloku, fetingkee'omu pugauno.” ⁶Dofetingke peda na'a, anaguhu'ino defodapa ne wite, dote'i sepali'a. ⁷Yesus nomai'idamo, nodingkuda bhe nopugau ambano, “Eheomu, koise mote'iomua!” ⁸Hato dofowanu fotundo miinamo dakoniwohaa, tamo Yesus nomoisa.

⁹Wakutuuno dosampu domai'ao te kabhawo na'a, Yesus nopugau-andamo ambano, “Koise mekapuna'ao'omu newohamiau sa'ituini ne la'ae maka dua. Simbali Anano Manusia – Idimo ini – namanumo namai'ao ne mate, maka naembali mekapunaomu ne mie sigao'ano.” ¹⁰Anaguhu'ino dofeenamo ambado, “Ane peda na'a, noafa gaha'a ambado pande-pande Kitabi putae tetewei anabii Elia so maino wawo?”^a ¹¹Ambano Yesus, “Daanumo anabii Elia so maino wawo, namosintuwu bhahi-bhahi'ae. ¹²Amohatokoomu, sakotu'uno anabii Elia padamo nomai, tamaka mie miina damande'aanea, tadohabumo ampa kapoindalondo. Nadamo dua ana'a Anano Manusia – Idimo ini – damodee-dee'e.” ¹³Wakutuu aitu anaguhu'ino dolosangiemu ingka Yesus nopulao'ao Yohanes Fokadiuno.

^a 17:10 Mal 4:5

Yesus nefeka'osa seemie ana'i mo'ane mate manuno

17:14-21

Mrk 9:14-29; Luk 9:37-43

¹⁴Yesus bhe anaguhu'ino dosulimo se mie bhahi. Dohato ne itu, nomaimo seemie notaohao sombano ne Yesus. ¹⁵Ambano mie ana'a, “Ompu, aesalo kabhelano lalomu ne anaku. Anaku nomate manu, nokadee-dee sepali'a. Nentelamo nondawu weo efi, nentelamo dua weo oe. ¹⁶Ingka padamo aowandae anaguhu'imū, tamaka miina damondoi'ea dofeka'osae.” ¹⁷Nopugaumo Yesus ambano, “Pahasili hintimiu, mie tapa marasaeano bhe kolilinono totono lalo! Tana se'ae gaha'a beano so kaomponano aeate bhe hintimiu? Tana se'ae bhahaa so sabahaku? Owae'omu se ini ana'i itu!” ¹⁸Dohatoane kaowu, Yesus nohandapimo seetani mesuakino ana'i aitu, gaha'a lasao nolimba mai'ao ne ana'i maitu, ko'osa-osano.

¹⁹Pada aitu anaguhu'ino domaimo ne Yesus. Hato tadomoisa, dofeenaemo ambado, “Noafa bhahaa ingka insaodi miina tamooliea tafolimba seetani sa'ituinia?” ²⁰Ambano Yesus, “Mba'inomo no-kuha kaparasaeamiu. Dadi'anomo amohatokoomu, kotu-kotu'u ane kaparasaeamiu namooli nada onuno sau wonoita,^a naembali pugau'omu ne kabhawo aini, ‘Gampi mai'ao ne ini’, maka kabhawo aitu tetewei nagumampi. Pakade, paemo dua bhe so tapa ne-poolimiu. ²¹[Tamaka seetani pedando aini miina natifolimba, simbali dosambahea bhe dopoasaane.”]

Yesus nopugau'ao toha so kamate'ano

17:22-23

Mrk 9:30-32; Luk 9:43-45

²²Wakutuuno Yesus bhe anaguhu'ino dopohompu-hompu we Galilea, nofohatodamo ambano, “Paemo naomponaa, Anano Manusia – Idimo ini – damowae ne limando mie kokuasano. ²³Andoa maitu damongkoe tamaka ne katolu oleono namanu mai'ao ne mate.” Dofetingke peda na'a anaguhu'ino nokompeaha sepali'a lalondo.

Yesus notanduoao sewa so Lambuno Lahata'ala

17:24-27

²⁴Wakutuuno Yesus bhe anaguhu'ino dohato we Kapernaum, domaimo mealano sewano Lambuno Lahata'ala ne Petrus bhe

^a 17:20 Sakotu'uno: *onuno sawi*.

dopugau ambado, “Bhahaa gurumu miina natumanduaoa sewano haa woka perano so Lambuno Lahata'ala?” ²⁵ Ambano Petrus, “Ingka notanduao dua.” Hato nopesua Petrus weo lambu, Yesus nosumpuianemo kafeena. Ambano, “Peda ae fekihimu Simon? Dealasewa ne la'ae bhahaa kolakindo dhunia ini? Doalae ne ra'eati bhahaa ne mie humato?” ²⁶ Ambano Petrus, “Ingka doalae ne mie humato.” Ambano toha Yesus, “Ane peda ana'a, ra'eatindo do-bebasimo, koemo dosewaa. ²⁷ Tamaka koemo dofekalea lalondo. Dadi'anomo kala mekabua kaita we te'i. Kenta kabhao-bhaono so nepoolimu, hakoe maka weo wobhano mewoha dhoi pera nakumapomo so sewanto dahodua. Ala dhoi aitu maka tanduao kaita sewano Lambuno Lahata'ala ne andoa maitu.”

Foliuno kabhala weo Kafopahinta'ano Lahata'ala

18:1-5

Mrk 9:33-37; Luk 9:46-48

18 Wakutuu ana'a anaguhu'ino domaimo ne Yesus dofeena ambado, “La'ae bhahaa foliuno kabhala weo Kafopahinta'ano Lahata'ala?” ² Yesus nesali'imo seemie ana'i maka nofoehe-ehée ne wunta-wuntando, ³ bhe nopugau ambano, “Amohatokoomu, kotu-kotu'u ane pae bhali'omu fekihimi maka membalimu nada ana'i, pae mesua'omua weo Kafopahinta'ano Lahata'ala. ⁴ La'ae mekapandano wutono peda ana'i aini, anoamo itu foliuno kabhala weo Kafopahinta'ano Lahata'ala. ⁵ La'ae tumahimano ana'i kahobu medando ini weo neaku, anoa notahimamo Idi.”

Mie mehabuno tingkuno dhosa so manusia bhaindo

18:6-11

Mrk 9:42-48; Luk 17:1-2

⁶ “Tamaka la'ae mehabuno tingkuno dhosa so mie mepandano kaengkoha'a peda ana'i aini, sampe miinamo namarasaea ne Idi, naetaa dakumantaine kagili kontu ne wu'uno maka damotondue weo ndalo. ⁷ Nobalaamo mieno dhunia mehabuno tingkuno dhosa. Daanumo tingkuno dhosa sadhia nonandoo, tamaka nobalaamo mie humabue.

⁸ Ane limamu tawa a'emu naehabuangko dhosa, totoe maka ohoe, kapa'amo naetaa mesua weo dadi suhue dhamani nase-dhodho limamu tawa mokempa, bhe mesua weo efino narakaa kohaambali'ae limamu bhe a'emu. ⁹ Ane matamu naehabuangko dhosa, sungkie maka ohoe, naetaa mesua surugaa komata sembali, bhe komata haa mbali maka da'umohoko we efino narakaa.

¹⁰Tandai'eomu, koe pisakidaa mie mohobu pedando ini, kapa'amo mala'ekati dhumaganida sadhia dopowise bhe Amaku te surugaa. ¹¹[Kapa'amo Anano Manusia nomai namosalamati kolilinono totono lalo].”

Kapalendano dhumba miinae'ano

18:12-14

Luk 15:3-7

¹²“Peda amai fekihimu? Ane seemie nokodhumba mo'ono ulu, maka nomiinae se'ulu, naeafamo bhahaa? Ingka tetewei tanahumunsada te kabhawo siua fulu siua uluno, maka na'umondofi miinae'ano na'a. ¹³Amohatokoomu, kotu-kotu'u ane nopo'awaane kaowu, nobhalamo ka'iano ne dhumba se'uluno maitu bhe ne dhumba siua fulu siua uluno tapa miinae'ano. ¹⁴Pedamo dua aitu Amamu te surugaa nokiido namoha seemie mohobu pedando ini namiinae.”

Dopotanga-tangahi

18:15-20

¹⁵“Ane bhahitiemu nakoka'ala, tangahie hodua'omu kaowu; ane nametingke katangahimu, ingka pooliemo, sulimo nembali bhahitiemu. ¹⁶Ane paise nametingkeko, mewowo'o bhe sabhangka mu naseemie bhaha'i dahodua. [Kapa'amo notibuhi weo Kitabi,] ‘Sehonda parakara kane'omo notiangga ane bhe sakusiino dohodua tawa dototolu.’^a ¹⁷Ane nandoo dua nokiido natumahimae, fohatoandae umati. Ane umati pae dua nametingkeda, abhie'omu mie aitu mie tapa mande'aono Lahata'ala tawa mie kodhosano peda mesalo-salono sewa. ¹⁸Amohatokoomu, kotu-kotu'u: o ae ne'elea'aomu we dhunia ini, nati'elea'ao dua te surugaa; o ae ne'unda'aomu we dhunia ini, nati'unda'ao dua te surugaa. ¹⁹Amohatokoomu dua, ane ne dhunia ini dohodua ne olotamiu itu dose'ise desalo weo sambaheando, o ae maka dua kamesalondo na'a, namekako'ulae Amaku te surugaa. ²⁰Kapa'amo ane dohodua tawa dototolu dopohompu-hompu weo neaku, bhemo dua Idi ne itu.”

Kapalendano poma'a-ma'afu'ao

18:21-35

²¹Pada ana'a nomaimo Petrus maka nofeena ne Yesus ambano, “Ompu, ane bhahitiekumu nokoka'ala ne idi, ampa fee paku bhahaa

^a 18:16 Ul 19:15

ama'afuane? Ampa fitu paku bhahaa?" ²² Ambano Yesus, "Paise! Amohatokoomu, suano fitu paku, tamaka fitu fulu fitu paku."^a

²³ Kapa'amo Kafopahinta'ano Lahata'ala tapedamo seemie kolaki so polentuno bhe bhatua'ino. ²⁴ Netandaki kaowu, deowaanemo kodosano ompulu hewu bhoka.^b ²⁵ Tamaka dosano maitu miinama namoolie nopomea'ea, dadi'anomo kolaki na'a netudumo mie damaso bhatua aitu bhe anano bhe hobhineno bhe sabhaha fehebua'ano so kapomeano dosano. ²⁶ Gaha'a bhatua ana'a nosudhumo bhe notaohao sombano ambano, 'Sabaha kanau kadeki waompu, kosasawi'ae dosaku itu amomea'e.'^c ²⁷ Kolaki ana'a nobhelamo dua lalono ne bhatuano maitu, sampe nofolapae bhe kosasawi'ae dosano nofosaliemo. ²⁸ Tamaka hatu nolimba bhatua ana'a, nopo'awa bhe sabhangkano kodosano ne anoa mo'ono dhoi pera.^c Kodosano na'a lasao nohakoe bhe nongonso wu'uno, ambano, 'Pomea dosamu!' ²⁹ Gaha'a sabhangkano na'a nosudhumo bhe notaohao sombano ambano, 'Sabaha kanau ka'asi, dosaku itu tetewei amomea'e.'^c ³⁰ Tamaka bhatua na'a nokiido, sampe nofopesua sabhangkano weo katohongku ampa nopomea dosano.

³¹ Dowoha peda maitu sabhangka'ino sigao'ano nokompeaha sepali'a lalondo sampe dokala dofohato kafeompu'ando. ³² Kolaki ana'a nofotudumo dalumo'oi bhatua sa'ituini. Sahatono nopugau-mo ambano, 'Hintu bhatua modai! Kosasawi'ae dosamu afosalikoe hampano kamesalomu. ³³ Ingka tabeano nobhela dua lalomu ne bhatua bhaimu, peda dua kabhelano laloku ne hintu.'^c ³⁴ Kolaki ana'a no'amaha sepali'a sampe nofotudumo damopesua'e weo katohongku bhe damodee-dee'e, ampa natipomea kosasawi'ae dosano. ³⁵ Pedamo ana'a Amaku te surugaa nahumabukoomu, ane paise ma'afu'ao'omu bhahitiemi weo kawolono lalomiu."

Pohunsa'a

19:1-12

Mrk 10:1-12

19 Nopalusi nofofoina'u peda aitu, Yesus nohunsamo kadieno Galilea nohope we Yudea, we sewetano umelena Yordan. ² Mie bhahi dosipumpu doangkafie ne itu, maka mosakino nofeka'osada.

^a 18:22 Siga'a doma'anakie: *fitu fulu sangke fitu paku.*

^b 18:24 Sakotu'uno: *ompulu hewu talenta.*

^c 18:28 Sakotu'uno: *mo'ono dinar.* Sedinar ponambono mie se'oleo.

³ Domaimo miendo Farisi ne Yesus damanso'alai'e. Dofeenamo ambado, "Weo tubhono agamantoomu bhahaa nembali dohunsa hobhinendo, o ae maka dua tingkuno?" ⁴ Ambano Yesus, "Miina'o basae'omua gaha'a putae mpini kabhao-bhaono Lahata'ala mokonandoono manusia, nofokonandooda o hobhine bhe mo'ane?" ^a ⁵ Bhoasaono Lahata'ala peda aini, 'Dadi'anomo o mo'ane tetewei nahumunsa inano bhe amano maka nase'ise bhe hobhineno, sampe kohoduando daembalimo seemie.' ^b ⁶ Dadi'anomo andoa maitu pae-mo dahodua'a tamaka seemie. Nefose'iseno Lahata'ala, koise dopogaatiane manusia." ⁷ Ambado toha, "Ane peda na'a, noafa gaha'a anabii Musa nofowa'ao pahinta naembali dahumunsa hobhinendo, sumanomo debuhiane bhe suhano?" ^c ⁸ Ambano Yesus, "Anabii Musa no'unda'aangkoomu humunsaomu hobhinemiu mba'inomo katu'ano fotumiu. Tamaka nandoo kabhao-bhaono miina nada na'a. ⁹ Amohatokoomu, ane seemie mo'ane nohunsa hobhineno, gaha'a hobhine maitu miina namonsule, maka nogaa dua bhe hobhine sigao'ano, mo'ane aitu nomonsule." ¹⁰ Dopugaumo anaguhu'ino ambado, "Ane peda na'a koeatendo mo'ane bhe hobhineno, ingka selabhi'ano koemo dogaa'a." ¹¹ Tamaka Yesus nopugaumo ne andoa ambano, "Suano kosasawindo manusia dolosangie pugau ana'a, mpahinomo me'awano kadawu ne Lahata'ala. ¹² Nandoo mie tapa membali'ano dogaa, mba'inomo dolente ingka pedamo na'a. Nandoo dua, mba'inomo dohabue mie bhaindo. Nandoo dua dopoindalo wutondo miina dagumaa'a mba'inomo Kafopahinta'ano Lahata'ala. La'ae so moolino lumosangino pugauku ini, naetaa nalumosangie!"

Yesus nebarakati ana'i

19:13-15

Mrk 10:13-16; Luk 18:15-17

¹³ Pada ana'a domaimo mie deowa'i ana'i kahobu ne Yesus. Patudhundo natumeianda limano te fotundo bhe nasumambahea'anda. Tamaka anaguhu'ino do'amahaki mie andoa maitu. ¹⁴ Nopugaumo Yesus ambano, "Hunsa'anomo ana'i andoa itu damai se Idi, koise ele'aandaomua, kapa'amo mie medandomo andoa ini so mieno Kafopahinta'ano Lahata'ala." ¹⁵ Yesus noteimo limano te fotundo ana'i maitu. Pada ana'a nokalamo.

^a 19:4 Kej 1:27

^b 19:5 Kej 2:24

^c 19:7 Ul 24:1-4

Seemie ana mo'ane hangkaea

19:16-26

Mrk 10:17-27; Luk 18:18-27

¹⁶Nandoo seemie ana mo'ane nomai ne Yesus bhe nopugau ambano, “Guru, ahabu diu metaa'ano medando ae bhahaa so ae'awa'ao dadi suhue dhamani?” ¹⁷Notobhoosimo Yesus ambano, “Noafa gaha'a feena kanau'ao metaa'ano? Ampamo Wutono Lahata'ala metaa'ano. Tamaka ane moindalo me'awa dadi suhue dhamani, angkafi pahintano Lahata'ala.” ¹⁸Ambano mie ana'a, “Pahinta medando ae bhahaa?” Ambano toha Yesus, “Koise fopongko, koise monsule, koise moso'o, koise membali sakusii kopaha, ¹⁹fosibhala inamu bhe amamu bhe moasi'ao mie bhaimu nameda wutomu.”^a ²⁰Ambano ana mo'ane ana'a, “Kosasawi'ae na'a apadaemo adhalangiea. Ta'o dua ae nekaemiku?” ²¹Ambano Yesus, “Ane moindalo nasumangka dadimu, kalamo asopi sabhaha fehebua'amu, olinodawu-dawuandae mie mokae maka suli me'awa fehebua'a te surugaa. Mada ana'a maimo angkafi kanau.” ²²Nofetingke peda na'a ana mo'ane maitu nosabhamo handano tanokala, kapa'amo nohangkaea sepali'a.

²³Nopugau toha Yesus ne anaguhu'ino, “Amohatokoomu, kotukotu'u ka'ali maka mie hangkaea namesua weo Kafopahinta'ano Lahata'ala. ²⁴Sakotu'uno nomuda se'ulu kahumbau^b namangka ne kabhentano deu bhe mie hangkaea namesua weo Kafopahinta'ano Lahata'ala.”

²⁵Dofetingke peda na'a anaguhu'ino domente bhe dokohedu, ambado, “Ane peda na'a, la'ae dua bhahaa so sumalamatino?” ²⁶Yesus no'ondoda bhe nopugau, “Uumbe daanumo, so manusia pae bhe kapoolia nakumadhadhia'a peda amaitu, tamaka so Lahata'ala miina bhe pata nemondoino.”

Ponambo doangkafi Yesus

19:27-30

Mrk 10:28-31; Luk 18:28-30

²⁷Pada aitu Petrus notobhoosimo ne Yesus, ambano, “Insaodi ini tahunsaemo bhahi-bhahi'ae maka taangkafi Hintu. O ae bhahaa so ne'awa mania?” ²⁸Ambano Yesus, “Amohatokoomu, kotukotu'u nahumato tempono dhunia bu'ou, Anano Manusia – Idimo ini – naengkoha-ngkoha ne kaengkoha'ano omputo weo kakalabhiano.

^a 19:18-19 Kel 20:12-16; Im 19:18; Ul 5:16-20

^b 19:24 Sakotu'uno: *se'ulu unta*.

Ne na'a hintimiu toka mangkafi kanau, mengkohaomu dua te kaengkoha'a ompulu haa onuno somo mande'aono ompulu haa onu sampu'ano miendo Israel. ²⁹Pakade kotika humunsano lambuno, bhahitieno namo'ane nahobhine, inano bhe amano, ana'ino tawa kaampono mba'inomo noangkafi Idi, nasumuli nae'awa namo'ono lentu'a bhe nae'awa dua dadi suhue dhamani. ³⁰Tamaka dabhahi mie ma'induluno sumuli dambuhumai, mbuhumaino sumuli dama'indulu.”

**Kapalendano mealano ponambo te kaampono angguru
20:1-16**

20 “Kafopahinta'ano Lahata'ala tapedamo seemie kafeompu'a, nandoo samentaeno nokalamo ne'ondofi so kumahadhaano te kaampono angguruno. ²Pada kaowu dopobhotu'ao ponambo do sewoka dhoi pera se'oleo, notududamo te kaampono angguruno.

³Hambi-hambi siua mata hangkowine nokalamo toha, gaha'a newohamo mie tapa kokaha-kahadhaano tadeehe-ehemo we dao. ⁴Nopugauandamo ambano, ‘Kalaomu dua bhe hintimiu te kaampono angguru, ama'angkoomu ponambo mantasi'ano.’ Andoa maitu lasao dokala. ⁵Hambi-hambi ompulu haa mata pana oleo bhe hambihambi tolu mata kama'oleo nokalamo toha nesali'i mie peda sa'ituini.

⁶Hambi-hambi lima mata ma'oleo, nokalamo toha maka newoha dua mie sigao'ano deehe-ehe. Nofeenadamo ambano, ‘Noafa gaha'a se'oleomo ta'omeehe-ehemu ne ini miina bhe kaha-kahadhaamiu?’ ⁷Dotobhoosimo ambado, ‘Ingka miina bhe monambo kainsamia.’ Ambano dua, ‘Kalaomu dua bhe hintimiu te kaampono angguru bahangka.’

⁸Hato nohondo oleo nopugaumo kokaampono na'a ne mandoro ambano, ‘Sali'ida kumahadhaano itu maka wa'anda ponambodo seemie-seemie, natumanda ne mesuano mbuhumai ampa mesuano kabhao-bhaono.’ ⁹Dadi'anomo domaimo kumahadhaano tumandano hambihambi lima mata kama'oleono. Andoa ini detahima ponambo sewoka dhoi pera seemie. ¹⁰Pada ana'a domaimo dua kabhao-bhaono mesuano, kuna'endomo ponambodo damekolabhii'e, gaha'a dowa'anda dua sewoka dhoi pera seemie. ¹¹Hato dotahima, dofedeemo ne kafeompu'a na'a. ¹²Ambado, ‘Ingka mesuano mbuhumai ini sedhamu kaowu dokahadhaa'a. Noafa pototoanda bhe insaodi kumahadhaa mobhieno, suhue oleo taetohu kasodono

oleo?’¹³ Tamaka kafeompu'a na'a notobhoosimo ne seemie kumahadhaano maitu, ambano, ‘Bhahitie, miina akoka'ala ne hintu. Ingka padamo dopobhotu'ao sewoka dhoi pera se'oleo.’¹⁴ Alamo dawumu itu maka suli. Kapoindaloku wutoku ama'ao humatono mbuhumai napototo bhe kawa'aoku ne hintu.’¹⁵ Paise naembalia bhahaa amake fehebua'aku ampa kapoindaloku? Nokoula lalomu mba'inomu netaa laloku?’ ”

¹⁶ Ambano toha Yesus, “Pedamo ana'a mie humatono mbuhumai sumuli dama'indulu, ma'induluno sumuli dambuhumai.”

Kafohato tolu pakuno putae Yesus nakumadee-dee

20:17-19

Mrk 10:32-34; Luk 18:31-34

¹⁷ Wakutuuno Yesus nakumala we Yerusalem, nosali'imo anaguhu'ino ompulu hoduoano domoisa kaowu. We laano sala nofohatodamo, ¹⁸ ambano, “Aitu dakumalaomu we Yerusalem. We na'a Anano Manusia damowae ne limando neangka'indo imamu bhe pande-pande Kitabi. Andoa maitu dabhotusie damongkoe. ¹⁹ Anoa damowae ne bansano liwu suano Yahudi, damele-elee, dahumambisiane habuta bhe dakumantai'e te sau salipu. Tamaka ne katolu oleono namanu namai'ao ne mate.”

Kamesalondo inano Yakobus bhe Yohanes

20:20-28

Mrk 10:35-45

²⁰ Pada aitu nomaimo hobhineno Zebedeus bhe ana'ino ne Yesus. Sahatono notaohaomo sombano nakonisalo. ²¹ Nofeenamo Yesus ambano, “Mesalo ae bhahaa?” Ambano, “Tapugaumo, gaoku anaku hoduoano ini namada kaowu weo Kafopahinta'amu, daengkoha ne sohihimu, seemie ne kema seemie ne suana.” ²² Tamaka Yesus tanotobhoosi ambano, “Ingka miina mande'aaneomua ulu'ano kamesalomiu itua. Mondoie'omu bhahaa moho'uomu ne kampoho'u'aku?”^a Ambado, “Tamondoi'e.” ²³ Ambano dua Yesus, “Uumbe daanumo, moho'uomu ne kampoho'u'aku, tamaka kaengkoha'a ne kema tawa ne suana suano Idi so motantue. Kaengkoha'a ana'a pada dofontaa-ntaa'andae mie toka nepilino Amaku.”

²⁴ Dofetingke peda na'a anaguhu'ino ompuluno do'amahakimo sabhangkando hoduoano sekakutano maitu. ²⁵ Tamaka Yesus nosali'ida bhe nopugau ambano, “Ingka pande'aaneomu mahintangi-no sabhaha bansano liwu pata mande'aono Lahata'ala dofodee-dee

^a 20:22 Ma'anano: sabhaha kakadee-dee so nenamisino.

ra'eatindo, neangkando nokii sepali'a dofodhala pahintando. ²⁶Tamaka hintimiu pae naembali nada na'a. So moindalono membalino kabhala ne olotamiu, tabeano na'umondofao kafaralundo mie bhaindo. ²⁷So moindalono membalino mie neangka ne olotamiu, tabeano naembali bhatuando sigao'ano. ²⁸Kapa'amo wutono Anano Manusia – Idimo ini – nomai pae naefe'ondofao tamaka nafa'ondofao bhe nafowa'ao inawano so katolosindo mie bhahi.”

Yesus nefeka'osa kabunto dohodua

20:29-34

Mrk 10:46-52; Luk 18:35-43

²⁹Wakutuuno Yesus bhe anaguhu'ino dohunsamo kotano Yeriko, dobhahi mie dosipumpu doangkafie. ³⁰Nandoo dohodua kabunto dengkoha-ngkoha ne wiwino sala. Sadofetingke lumalono maitu Yesus, dokeimo ambado, “Ompu sampu'ano Daud, mobhela kainsami lalo.” ³¹Tamaka mie bhahi do'amahakida bhe dopugauanda koemo dokadiu-diua, tamaka tanodhulu kahaa'ino dokei. ³²Nofetingke peda na'a Yesus nofetumpumo maka nosali'ida. Nofeenadamo ambano, “Amafa'iangkoomu gaha'a gaomiu?” ³³Ambado, “Ompu, gao mani tafowoha.” ³⁴Nobhela sepali'a totono lalono Yesus, maka nofedampa matando lasao dofowoha. Pada ana'a doangkafimo Yesus.

Yesus do'ia-ia'e we kota Yerusalem

21:1-11

*Mrk 11:1-10;
Luk 19:28-38; Yoh 12:12-15*

21 Yesus bhe anaguhu'ino doma'omo we Yerusalem. Dohato we liwuno Betfage te kabhawono Zaitun, Yesus notudumo anaguhuno dohodua dama'indulu. ²Nofohatoda ambano, “Kalamu we liwu te wise watu, ne itu lasao mohaomu se'ulu keledai hobhine dotapue bhe anano ne owano. Lenseomu katapuno maka tonda kana'eomu se ini. ³Ane bhe so meenano, tatobhoosimoomu putae nofaraluu'e Ompu, ingka pae naomponaa namosuliemo dua.”

⁴Aini nokadhadhia mbali noko'ula'ao bhoasaono Lahata'ala nefosampeno anabii peda aini,

⁵ “Fohatodaomu miendo Yerusalem,^a

‘Ondoe'omu! Omputomiu nomai'ikoomu.

^a 21:5 Sakotu'uno: *kalambeno Sion.*

Nomalu lalono, nosawi ne keledai,
anano keledai meangkuno wowo'o.'^a

⁶Anaguhu'ino maitu dokalamo, doangkafi peda netudu'aono Yesus. ⁷Hato dosuli detondamo keledai hobhine bhe anano. Pada aitu towuno keledai na'a dolempejianemo pakeando maka Yesus nengkoaha te wawono. ⁸Dobhahi sepali'a mie dotalessao pakeando ne kaangka'a. Nandoo dua mekapesino ha'ando sau maka dotalessaane ne kaangka'a. ⁹Mie bhahi ma'induluno bhe mangkano kundo do'ia-ia'e ambado,

“Hosana, sampu'ano Daud!

Notibarakati humatono weo neano Ompu.

Hosana, pudhi kaitaomu Ompu Lahata'ala te wawono wawo!”^b

¹⁰Sanopesua weo kotano Yerusalem, mieno kota tadohialelemo ambado, “La'ae bhahaa mie aini?” ¹¹Mie bhahi maitu dotobhoosi ambado, “Aini'aemo anabii Yesus mai'aono we liwuno Nasaret, we kadieno Galilea.”

Yesus nogihasi podaoano weo Lambuno Lahata'ala

21:12-17

Mrk 11:15-19;

Luk 19:45-48; Yoh 2:13-16

¹²Pada ana'a Yesus nopesuamo weo kadeteno Lambuno Lahata'ala, maka nogihasi sabhaha mie podaoano ne itu. Medhando mebhase-bhaseno dhoi bhe bhangko-bhangkondo mahaasono dhaadhaha nobhansualeda. ¹³Yesus nofohatoda ambano, “Nandoo tibuhino weo Kitabi peda aini, ‘Lambuku dakumonae lambu kasambahe'a, tamaka hintimiu habue'omu mbali lia ka'onu'ando mie modai.’”^c

¹⁴Pada aitu domaimo mie kabunto bhe kakempa ne Yesus weo Lambuno Lahata'ala na'a, maka nofeka'osada. ¹⁵Tamaka neangkando imam u bhe pande-pande Kitabi nohehewu sepali'a lalondo dowoha sabhaha giu timenteaono nehabuno Yesus maitu. Sedhulu'a dua kahehewuno lalondo mba'inomo kaana-ana'i weo Lambuno Lahata'ala dopokakei-kei ambado, “Hosana, sampu'ano Daud!” ¹⁶Dopugaumo ne Yesus ambado, “Fetingkee bhahaa pugau-ndo kaana-ana'i ini?” Ambano Yesus, “Afetingkee. Miina'o basae'omua gaha'a aeati peda aini, ‘Padamo mefontaa-ntaa kaana-ana'i bhe ana'i

^a 21:5 Yes 61:11; Zak 9:9

^b 21:9 Mzm 118:25-26

^c 21:13 Yes 56:7; Yer 7:11

nandoo tumitino so mefoampeno lagu-lagu kapudhi.’”^a 17 Pada nopugau peda aitu, Yesus nohunsadamo, nokala te liwuno Betania maka noodo ne itu.

Yesus nebhatata'iao pu'uno ara

21:18-22

Mrk 11:12-14, 20-26

18 Nandoo hangko-hangkowine Yesus nosulimo toha we kota, gaha'a no'ahomo. 19 Ne wiwino kaangka'a na'a Yesus nowohamo pu'uno ara. Nokalamo nofe'ondoe, gaha'a miina nakobhakea, ta'o hoo. Nopugaumo ne sau maitu ambano, “Hintu ini paemo kobhakea suhue dhamani.” Pu'uno ara aitu lasao nokekele. 20 Dowa kadhadhia aitu anaguhu'ino tadomente bhe dopugau ambado, “Peda ae pu'uno ara maitu tadua nokekele?” 21 Ambano Yesus, “Amohatokoomu, kotu-kotu'u ane marasaea'omu bhe paise poibhahaomu, tetewei mooliomu dua mehabuomu peda nehabuku ne pu'uno ara maitu. Bhahamo suano kaowu ta'o ana'a, tamaka mahingga pugau'omu ne kabhawo aini, ‘Sangke wutomu maka oho wutomu we te'i’, tetewei nakumadhadhia. 22 O ae maka dua nemesalomiu weo sambaheamiu, tetewei umawae'omu, sumanomo kotu-kotu'u parasaea'omu.”

Dofeena'ao kuasano Yesus

21:23-27

Mrk 11:27-33; Luk 20:1-8

23 Yesus nopesuamo toha weo Lambuno Lahata'ala. Tangasano nofofoina'u ne itu domaimo neangka'indo imam u bhe kamu-kamungkula'indo Yahudi dofeena ambado, “O ae gaha'a kaengkoha'ano kuasa mehabu sabhaha timenteaono maitu? Nofopooliko la'ae bhahaa?” 24 Yesus tanotobhoosida ambano, “O Idi ameena dua. Ane tumobhoosi kanau'omu, amohatoangkoe'omu dua kaengkoha'ano kuasaku. 25 Nomai'ao ne amai bhahaa kuasano Yohanes nofokadiu? Nomai'ao ne Lahata'ala bhahaa nomai'ao ne manusia?” Pada aitu dopuga-pugaumo sapada-pada andoa, ambado, “Ane damugau'omu nomai'ao ne Lahata'ala tetewei namugau, ‘Noafa gaha'a miina marasaea'aneomua?’ 26 Tamaka ane damugau'omu nomai'ao ne manusia, beano daote'iomu mie bhahi, kapa'amo kosasawindo mie doabhi Yohanes maitu seemie anabii.” 27 Pada aitu dotobhoosimo ne Yesus ambado, “Miina tamande'aanea.”

^a 21:16 Mzm 8:2

Ambano dua Yesus, “Ane peda itu, paise dua amohatokoomua kaengkoha'ano kuasaku ahabu sabhaha timente'aono maitu.”

Kapalendano dohodua ana'i

21:28-32

²⁸Ambano toha Yesus, “Peda amai fekihimi ane peda aini? Nandoo seemie ama bhe ana mo'aneno dohodua. Nokalamo ne anano titiisa maka nopugau ambano, ‘Anaku, se'oleo itu kala kahadhaa kaita te kaampono angguru.’ ²⁹Anano na'a notobhoosi, ‘Uumbe ama’, tamaka miina nakumalaa. ³⁰Pada aitu amando na'a nopugaumo dua ne aino peda pugauno ne isano sa'ituini. Anano na'a tanotobhoosi, ‘Akiido akumalaa’, tamaka gaha'a nososo lasao nokala. ³¹La'ae bhahaa ana'i hoduanu maitu mangkafino kapoindalono amando?” Dotobhoosimo mie andoa na'a ambado, “Membalino ai.” Ambano Yesus, “Amohatokoomu, kotu-kotu'u meala'ino sewa bhe karambole dama'indulu damesua weo Kafopahinta'ano Lahata'ala bhe hintimiu ini. ³²Kapa'amo Yohanes nomai nofotiwohaangkoomu kaangka'ano dadi metaa, tamaka miina marasaea'eomua, gaha'a meala'ino sewa bhe karambole doparasaea'e. Tamaka hintimiu, mahinggamo wohae'omu peda maitu, miina sumosoomua, miina dua marasaea'omua.”

Kapalendano kumahadhaano te kaampono angguru

21:33-46

Mrk 12:1-12; Luk 20:9-19

³³“Fetingkeomu dua kapalenda aini. Nandoo seemie kafeompu'a nelengka kaampo, nokantisaane angguru maka nopagalae fatofatowala'ae. Neseliane dua bhe kantobha kaefeo'ano angguru bhe nefoeheane kapala kaedhagani'a. Pada aitu neponambomo mie so kumahadhaano kaampo na'a, maka nokala we koliwuno.

³⁴Noma'o tempono fo'onu'ano pehapi, netudumo bhatuano dokala te kumahadhaano na'a damala dawuno kafeompu'ando. ³⁵Tamaka kumahadhaano maitu tadohako bhatuano na'a; siga'a dopepekida, siga'a dopongkoda, sigao'ano dobhatumbulianda kontu. ³⁶Pada aitu kafeompu'a na'a notudumo dua bhatuano sigao'ano, sedhulu'a dua kabhahindo. Tamaka andoa ini dohabuda dua peda sabhangka'indo ma'indulu'ano. ³⁷Panda-pandano kafeompu'a na'a notudumo anano. Weo fekihino, ‘Anaku ini daengatie.’ ³⁸Tamaka gaha'a sadowoha anano kafeompu'ando, kumahadhaano maitu dopugau-mo sapada-pada andoa, ambado, ‘Ananomo ini so kohaku'aono

kahunsa'aono. Dopongkoe'anaomu, neanomo kahunsa'aono somo intaodiomu.' ³⁹Lasao dohakoe, do'ohoe we kundo ala maka dopongkoe.

⁴⁰Nahumato kokaampono na'a, namafa'ianda bhahaa kumahadhaano maitu?" ⁴¹Dotobhoosie ambado, "Mie modai na'a namongkoda. Kaampono naeponamboane dua mie sigao'ano so ma'ane dawuno nahumato tempono fo'onu'ano pehapi." ⁴²Ambano Yesus, "Miina'o basae'omua gaha'a tibuhino weo Kitabino anabii peda aini,

'Kontu ne'ohondo mefelambuno,
gaha'a nembalimo sandi bhalano.
Kapeda'ano na'a hampano kuasano Ompu,
woha'ano giu timente'aono.'^a

⁴³Dadi'anomo, amohatokoomu, hakumiu weo Kafopahinta'ano Lahata'ala namalae Lahata'ala, maka nama'andae bansano liwu sigao'ano so dhumalangino pahintano. ⁴⁴[Mondawuno te wawono kontu aitu naowita, nendawutino kontu aitu naopuhu.]"

⁴⁵Dofetingke sabhaha kapalendano Yesus na'a, neangka'indo imamumu bhe miendo Farisi dolosangie, ingka andoamo nepulao'aono maitu. ⁴⁶Dadi'anomo dokopatudhu dahumakoe tamaka dote'i mie bhahi, kapa'amo mie bhahi maitu doabhi Yesus seemie anabii.

Kapalendano hame-hameno kakawi

22:1-14

Luk 14:15-24

22 Pada ana'a Yesus nopugau toha nepakeanda kapalenda. ²Ambano, "Kafopahinta'ano Lahata'ala tapedamo seemie omputo nehabu hame-hame kakawino anano. ³Netudumo bhatuano dasumunsumi mie nebhasino so maino se hame-hameno na'a, tamaka mie andoa na'a dokiido damai. ⁴Fendua toha netudu bhatua sigao'ano bhe nopugauanda ambano, 'Fohatodaomu mie nebhasi na'a, "Ingka oti padamo ataganae, sapiku mo'ane bhe anano sapi kampuhobuku padamo dosumbeleda. Kosasawi'ae notokamo, maimoomu se hame-hameku ini." ' ⁵Tamaka mie nebhasi na'a miina daoheruanda, tadokala. Nandoo kumalano te kaampono, nandoo kumalano gumiuono. ⁶Nandoo dua sigao'ano dohako bhatuano, dofodee-deeda maka dopongkoda. ⁷Omputo ana'a no'amaha sepali'a, maka notudumo tantarano dakumala damobinasa fopongkono na'a, dasumulae bhe liwundo.

^a 21:42 Mzm 118:22-23

⁸Pada ana'a nopugaumo ne bhatuano ambano, 'Hame-hameno kakawi notokamo, tamaka mie nebhasi miina damantasia. ⁹Dadi'ano-mo kalaomu ne amai sala bhalano sali'idaomu kotika mie nepo'awa'aomiu damai se hame-hameku ini.' ¹⁰Bhatuano na'a dokalamo maka sabhaha mie nepo'awa'aondo we sala dopadada dofohompuda, namie modai namie metaa. Mie andoa itu dowowo'oda sampe boloku kahame-hame'a na'a nopono'ao mie humato.

¹¹Pada ana'a nopesuamo omputo napo'awa'ao mie humatono maitu. Gaha'a nowohamo seemie tapa mepakeno pakeano hame-hame. ¹²Nopugaumo ambano, 'Sabhangka, peda ae dua tapesuamo ne ini miina mepake pakeano hame-hame?' Tamaka mie ana'a miina nakodiua. ¹³Nopugaumo omputo ana'a ne mieno ambano, 'Tapuomu limano bhe a'eno maka ohoe'omu we simbali, weo doloma mposo. Ne na'a ta'o kangko'ae bhe ku'ino wangka. ¹⁴Kapa'amo nobhahi tibhasino tamaka seendai kaowu tipilino.' "

Tandua'ano sewa ne Omputo Kaisar

22:15-22

Mrk 12:13-17; Luk 20:20-26

¹⁵Pada ana'a miendo Farisi dokalamo dopugau-gau bhaha'i nada amai dameena ne Yesus so dametando'ao alano wambano. ¹⁶Dotudumo anaguhu'indo dapoowa-owa bhe mieno kolaki Herodes dofeena ne Yesus ambado, "Guru, tapande'aane nelaa lalomu. Weo kalaano lalomu fofoina'u'ao sala metaano Lahata'ala so manusia. Miina koniengatia, hampano miina po'ala-alaanda manusia. ¹⁷Soba fohato kainsami, peda ae fekihimu, weo tubhono agamantoomu, naembali bhahaa datumanduao sewa ne Omputo Kaisar kaa paise?"

¹⁸Tamaka Yesus nopande'aane kadaino isikadhindo, dadi'anomo nopugaumo ambano, "Mie mehaa'ulano, noafa solo-solo kanau'omu? ¹⁹Fotiwoha kanau'omu kupa so sumewa'ao'omu itu." Deowaanemo sewoka dhoi pera. ²⁰Nofeenadamo ambano, "Gambaranu ula bhe nea la'ae gaha'a inia?" ²¹Dotobhoosi ambado, "Ula bhe neano Omputo Kaisar." Ambano toha Yesus, "Bahangka peda na'a, fehebua'ano Omputo Kaisar wa'aneomu Omputo Kaisar, fehebua'ano Lahata'ala wa'aneomu Lahata'ala." ²²Dofetingke peda na'a, tado-mente. Lasao dokukundo Yesus kokala-kalando.

Miendo Saduki dofeena'ao kawanu'ando mie mate

22:23-33

Mrk 12:18-27; Luk 20:27-40

²³Ne oleo ana'a domaimo dua miendo Saduki. Andoa ini miina damarasaea'a kawanu'ando mie mate. Andoa dofeenamo ne Yesus ambado, ²⁴“Guru, ambano anabii Musa, ane o mo'ane nomate tamaka hobhineno miina'o nakoanaa, maka kakutano mo'ane tetewei nagumaa bhe bhihinandano na'a, neanomo anano dakumonae sampu'ano mateno maitu.”^a ²⁵Ne olota mani nandoo dopipitu dosekakuta'a sanea mo'ane. Titiisa nogaa tamaka nomate miina'o nakoanaa. Mba'inomo miina'o nakosampu'a katuluno nogaa bhe bhihinandano. ²⁶Gaha'a nomate dua miina'o nakoanaa. Pedamo dua aitu aino tulu'ano. Pedamo ana'a kansuhu sampe kopipitundo domate, sanea tapa koanano. ²⁷Panda-pandano nomate dua hobhine na'a. ²⁸Nahumato oleo kawanu'ando mie mate, so mieno lambu la'ae hobhine amaitua? Ingka kopipitundo sanea gumaa'ane.”

²⁹Yesus notobhoosida ambano, “Ingka no'ala fekihimiua, mba'ino-mo miina mande'aaneomua wambano Kitabi, miina dua mande'aaneomou kuasano Lahata'ala. ³⁰Kapa'amo nahumato kawanu'ando mie mate, andoa dadumadi nada mala'ekati te surugaa: paemo dagumaa, paemo dua damogaada. ³¹Ane kawanu'ando mie mate, miina'o basae'omua bhahaa bhoasaono Lahata'ala peda aini, ³²‘Idimo ini Lahata'alano Abraham, Lahata'alano Ishak bhe Lahata'alano Yakub.’^b Ma'anano Ompu Lahata'ala suano Lahata'alando mie mate tamaka Lahata'alando mie dumadi.” ³³Dofetingke kafoina'uno na'a, mie bhahi tadomente.

Pahinta fofoliuno kabhala

22:34-40

Mrk 12:28-34; Luk 10:25-28

³⁴Miendo Farisi dofetingke putae miendo Saduki miinamo dakowobhaa dowiseki Yesus. Dadi'anomo dopofo'o-fo'onumo. ³⁵See-mie pande Kitabi ne olotando na'a nofeenamo nomanso'alai Yesus. ³⁶Ambano, “Guru, pahinta medando amai gaha'a fofoliuno kabhala weo Kitabino Musa?” ³⁷Ambano Yesus, “Moasiane Ompu Lahata'alamu sampuu-mpuuno lalomu, sampuu-mpuuno alusumu, sampuu-mpuuno fekihimu.”^c ³⁸Aini'aemo pahinta kabhao-bhaono bhe

^a 22:24 Ul 25:5

^b 22:32 Kel 3:6

^c 22:37 Ul 6:5

fofoliuno kabhala. ³⁹Pahinta katuluno nopototo bhe ana'a: moasi'ao manusia bhaimu peda kaasimu ne wutomu.^a ⁴⁰Kosasawi'ae pahinta weo Kitabino Musa bhe Kitabindo ana-anabii nengkohamo ne pahinta haa hondano ini.”

Pokai'ano Yesus bhe Daud

22:41-46

Mrk 12:35-37; Luk 20:41-44

⁴¹Tangasano miendo Farisi dopohompu-hompu, Yesus nofeenadamo ambano, ⁴²“Peda amai fekihimiua ne Mesias Omputo Fosalamatino maitu? Sampu'a la'ae bhahaa?” Ambado, “Sampu'ano Daud.” ⁴³Ambano Yesus, “Ane peda na'a noafa gaha'a Daud weo kuasano Rohino Lahata'ala, nokona Omputo Fosalamatino maitu Ompuno? Ingka nopugau peda aini,

⁴⁴‘Ompu Lahata'ala nokowambamo ne Ompuku,
Mengkoha ne suanaku sampe kaewamu
amolongkoda ne wawono a'emu.’^b

⁴⁵Dadi'anomo ane nokonae Ompuno, noafa'ao dua nembali sampu'ano?” ⁴⁶Bhe naseemie miina bhe mandeno tumobhoosie; notanda oleo aitu bhe seemie miinamo dua bhe mokadono so meenae.

Yesus nofodhaga pande-pande Kitabi bhe miendo Farisi

23:1-36

Mrk 12:38-40; Luk 11:37-54;

Luk 20:45-47

23 Nopugaumo Yesus ne mie bhahi bhe anaguhu'ino ambano, ²“Pande-pande Kitabi bhe miendo Farisi dengkoha ne kaengkoha'ano anabii Musa, dokokuasa dama'anaki pahintano. ³Dadi'anomo angkafie'omu bhe dhalangie'omu kosasawi'ae nefoina'u'aondo, tamaka koise sandahaomu podiundo, kapa'amo andoa itu miina dadhumalangiea nefoina'u'aondo. ⁴Sabhaha tubho nehabundo tapedamo wowo'o mobhie, dotapue maka dofewowo'onie ne mie bhaindo, tamaka wutondo dongahe bhe dadumingkue. ⁵Kosasawi'ae kahadhaa nehabundo patudhundo so kaowu daoaha mie bhaindo. Kawawe kasambahea'ando dofekawahe-wahe'ie,^c dhambe-dhambeno dhubando dofekawanta-wanta'ie. ⁶Weo kahame

^a 22:39 Im 19:18

^b 22:44 Mzm 110:1

^c 23:5 Kawawe kasambahea'a maitu bhe gambi-gambino dofosingi'iane aeati Kitabino Musa; dowawee ne konda'i bhe ne limando.

doasiane dengkoha ne kaengkoha'ando kabhala, weo lambu kasambahe'a dengkoha te wise-wise. ⁷Doasiane dua dofosibhalada we wuntano dao'a bhe dokonada guru.

⁸Tamaka hintimiu koise undaomu dakumonakoomu guru, kapa'amo seemie kaowu gurumiu; kosasawimiu itu sebhahi-bhahitie'omu. ⁹Koise fokoamaomu ne la'ae maka dua ne dhunia ini, kapa'amo seemie kaowu Amamiu, Amamiu te surugaa. ¹⁰Koise undaomu dakumonakoomu neangka, kapa'amo seemie kaowu neangkamiu, Mesias Omputo Fosalamatino. ¹¹La'ae moindalono nafoliu kabhalano soda ne olotamiu itu, tabeano na'umondofao kafaraluundo mie bhaindo. ¹²Kotika mekalangkeno wutono namekapandae Ompu, kotika mekapandano wutono namekalangkee.

¹³Balaamoomu, pande-pande Kitabi bhe miendo Farisi, hintimiu mie mehaa'ulano, kapa'amo songkoemoomu fointono Kafopahinta'ano Lahata'ala ne wisendo mie bhaimu. Hintimiu mokiidoomu mesua'omu pakade me'ontomiomu mie so mesuano.

¹⁴[Balaamoomu, pande-pande Kitabi bhe miendo Farisi, hintimiu mie mehaa'ulano, kapa'amo mebhohhe-bhohe'iomu bhihinanda maka rampasiomu lambudo. Sambaheamiu fekawanta-wantae'omu mbali kaowu powohando mie. Dadi'anomo nasedhulu'a dua kabhie kahukumu so ne'awamiu.]

¹⁵Balaamoomu, pande-pande Kitabi bhe miendo Farisi, hintimiu mie mehaa'ulano, kapa'amo mebhosekiomu te'i bhe mepalintangianeomu wite so kaowu mepopesua'ao'omu naseemie weo agamamiu; tamaka sapesuano habuemoomu so mieno narakaa, kadaino podiuno sangke haa paku bhe podiumiu.

¹⁶Balaamoomu, hintimiu kabunto fotondano. Ambamiu, 'Ane dopodhandi bhe dofemata dosambili Lambuno Lahata'ala, podhandi maitu miina nako'ulu'a. Tamaka ane dopodhandi bhe dofemata dosambili bulawano Lambuno Lahata'ala, podhandi maitu tabeano tetewei dadhumalangie.' ¹⁷Hintimiu mie bhohe bhe kabunto! Ingka noliu'e Lambuno Lahata'ala bhe bulawa, kapa'amo kati-fekangkilo'ano bulawa hampano neate weo Lambuno Lahata'ala. ¹⁸Ambamiu, 'Ane dopodhandi bhe dofemata dosambili medha kaetunu'a kapopanga, podhandi maitu miina nako'ulu'a. Tamaka ane dopodhandi bhe dofemata dosambili kapopanga te wawono medha maitu, podhandi maitu tabeano tetewei dadhumalangie.' ¹⁹Hintimiu mie kabunto! Ingka noliu'e medha aitu bhe kapopangano, kapa'amo katifekangkilo'ano kapopanga hampano neate

te wawono medha aitu. ²⁰Dadi'anomo ane dopodhandi bhe dofe-mata dosambili medha kaetunu'a kapopanga, ingka dosambilimo medha ana'a bhe kosasawi'ae kapopanga netei te wawono medha aitu. ²¹Ane dopodhandi bhe dofemata dosambili Lambuno Lahata'ala, ingka dosambilimo Lambu ana'a bhe Lahata'ala meateno ne itu. ²²Ane dopodhandi bhe dofemata dosambili surugaa, ingka dosambilimo dua kaengkoha'ano Lahata'ala bhe Wutono mengkoha-no ne kaengkoha'a aitu.

²³Balaamoomu, pande-pande Kitabi bhe miendo Farisi, hintimiu mie mehaa'ulano! Kapa'amo ta'olentu-lentuomu pehapimiu mohobu'ino peda sabhaha kagule.^a Feompulu dawue'omu maka sedawu gaatiemoomu so kapopanga ne Lahata'ala.^b Gaha'a fofoliu'ano kafaraluu weo tubhono agama miina konamianeomu. Foliu'ano kafaraluu ana'a peda ka'adhili, pomobhe-mobhela'ao lalo bhe kataino lalo. Tolu hondano aini tetewei dhalangie'omu, tamaka sehondano sa'ituini koise dua molimpu'aneomua. ²⁴Hintimiu kabunto fotondano! Konunu weo kafoho'umi tiisangie'omu, tamaka ane o kahumbau ta'otolomoomu.^c

²⁵Balaamoomu, hintimiu pande-pande Kitabi bhe miendo Farisi, mie mehaa'ulano! Kapa'amo kampoho'u'a bhe kampomaa'a fewaniu'eomu kundono, tamaka we lalo nohaku, nopono'ao hasilino karampasi'a bhe kakadau-daumiu. ²⁶Miendo Farisi mobunto-no, fewaniu'omu kadeki we lalono kampoho'u'a itu maka we kundono naonggelamo dua.

²⁷Balaamoomu, pande-pande Kitabi bhe miendo Farisi, mie mehaa'ulano! Kapa'amo hintimiu itu tapedamo kobuhu ne'efii, we simbali nokesa woha'ano, gaha'aitumo we lalo sanea buku bhe sabhaha giu mohaku sigao'ano. ²⁸Pedamo dua hintimiu itu, ne pomatando mie woha'amiu mie banara, gaha'aitumo we lalomiu sanea fekihi mehaa'ulano bhe isikadhi modai.

²⁹Balaamoomu, pande-pande Kitabi bhe miendo Farisi, hintimiu mie mehaa'ulano! Kapa'amo mehabuomu kobuhu mokesa'ano so ana-anabii bhe mefekakesa'iomu bhata kafe'ulaindo mie lumebeno. ³⁰Ambamiu, 'Ane tadumadi ne dhamanindo awua'i mani, tetewei paise tamangkafi habundo tamongko anabii andoa maitu.'³¹Tamaka hampano pugaumiu na'a, ingka akui'emoomu hintimiu

^a 23:23 Sabhaha kagule, sakotu'uno: *o selasi, o adas bhe dhinta.*

^b 23:23 Im 27:30

^c 23:24 Sakotu'uno: *o unta.*

itu sampu'ando mongkono ana-anabii. ³²Dadi'anomo fopansuhumoomu, fosangkae'omu dhosa-dhosando awua'imiu, fopono kasukando! ³³Hintimiu ule, sampu'ando ule modai! Koe fehoo-hoo'omu lumapaomu ne kahukumuno narakaa. ³⁴Dadi'anomo, amohatokoomu: mada kaowu aetuduangkoomu ana-anabii, mie kotimbangi bhe pande-pande Kitabi. Andoa maitu siga'a mongkodaomu bhe kumantaidaomu te sau salipu, siga'a humambisiandaomu habuta weo lambu kasambahea'a, maka umamba-ambadaomu dapontalala-ala ne amai kota. ³⁵Pedamo ana'a tumongkuomu dhosano limbano heando mie nepongko tapa koka'ala, notanda ne Habel ampa ne Zakaria anano Berekyia. Habel ini mie banara; Zakaria pongkoe'omu ne kadeteno Lambuno Lahata'ala, ne olotano Boloku mongkilo bhe medha kaefoampe'a.^a ³⁶Amohatokoomu, kotu-kotu'u kahukumuno kosasawi'ae dhosa aini damotongkuandae mie dhama-ni aini!"

Yesus nofedee'ao kotano Yerusalem

23:37-39

Luk 13:34-35

³⁷"Yerusalem, Yerusalem! Hintumo mongkono ana-anabii bhe bhatumbulino mie netudu ne hintu. Nentuhumo nokamba laloku ne hintu, amohompu ra'eatimu, kanggetu inano manu nofohompu anano we towawano panino, tamaka hintimiu mokiidoomu. ³⁸Dadi'anomo lambumu ini natihunsamo bhe naolino. ³⁹Amohatokoomu, notanda aitu paemo moha kanau'omu, ampa mugau'omu, 'Notibarakati maino weo neano Ompu.'"^b

Lambuno Lahata'ala damohansurue

24:1-2

Mrk 13:1-2; Luk 21:5-6

24 Pada peda maitu Yesus nolimbamo mai'ao weo Lambuno Lahata'ala maka nokala. Domai'iemo anaguhu'ino bhe dosusupiane lambu weo kadeteno Lambuno Lahata'ala. ²Nopugau-mo Yesus ambano, "Ingka wohae'omu itua? Amohatokoomu, kotu-kotu'u bhe nasepoi kontu pae bhe so tumapi'ano te wawono kontu bhaino, kosasawi'ae damadae damohansurue."

^a 23:35 Habel Kej 4:1-8; Zakaria 2Taw 24:20-22

^b 23:39 Mzm 118:26

Katanda'ano kakadee-dee

24:3-14

Mrk 13:3-13; Luk 21:7-19

³Dohato te kabhawono Zaitun Yesus nengkohamo ne itu. Domaimo anaguhu'ino dopuga-pugau domoisa kaowu. Ambado, “Fohato kainsami bhaha'i naefie nakumadhadhia na'a? O ae bhahaa katandaino so kahato'amu bhe tandano pandano dhamani?” ⁴Yesus notobhoosida ambano, “Kodhagaomu, bhahaa dofokolilino totono lalomiu! ⁵Kapa'amo dabhahi mie so maino damake neaku bhe dapugau ambado, ‘Idimo ini Mesias’, maka dabhahi mie so tibhohe-bhohe'ino. ⁶Ane metingkeomu nduuno popahisa'a bhaha'i me'awaomu bhihitano popahisa'a, koemo notikenda handamiu. Ingka kosasawi'ae maitu tetewei nakumadhadhia, tamaka suano'o kafetompaino dhamani. ⁷Liwu dapowangi bhe liwu, kakolaki'a dapowangi bhe kakolaki'a. Ne'amai-ne'amai nandumandoo gaba bhe luali. ⁸Ampamo kaowu kosasawi'ae na'a kafetompuna'ino dhamani bu'ou, nopototo bhe kaleano so koanano.

⁹Humato ana'a dahumakoomu, maka damowakoomu ne limando mie so modee-deekoomu maka damongkokoomu. Kosasawindo bansano liwu dabansikoomu mba'inomo membaliomu anaguhu'iku. ¹⁰Dabhahi so humunsano kaparasaeando, daposungku-sungku'ao ne kokuasano bhe dapobansi-bansi. ¹¹Dabhahi mpahaana-anabiino sampe dabhahi mie so mokolilinono totono lalo. ¹²Kadaino diundo manusia sadhulu-dhulumo sampe dabhahi mie mosalino kanini kaasi ne mie bhaindo. ¹³Tamaka andoa kosabahano dopotaami sampe namalusi, dasumalamati. ¹⁴Bhihita Metaano Kafopahinta'ano Lahata'ala ini damolelee ne koseka'ewa'ae dhunia, neanomo sabhaha bansano liwu dametingkee. Mada ana'a kane'omo nahumato kafetompaino dhamani.”

Fofekabinasano Timohakuno

24:15-28

Mrk 13:14-23; Luk 21:20-24

¹⁵“Weo kasabha maitu mohaomu Fofekabinasano Timohakuno naeehe-ehe ne Lambuno Lahata'ala peda bhoasaono Lahata'ala nefosampeno anabii Daniel. (Hintimiu mebasano tabeano motindae'omu ma'anano!)” ¹⁶Maka mie we kadieno Yudea tabeano damilei te kokabhawo'ano so dasumalamati'ao. ¹⁷Mie we tamba

^a 24:15 Dan 9:27, 11:31, 12:11

koemo dopesua dakoniala weo lambu.^a ¹⁸Mie te kaampo koemo dosuliki pakeando we liwu. ¹⁹Kadaino maka kolaundo hobhine fowoowano tawa fofotitino ne wakutuu ana'a. ²⁰Sambahea'omu tempono so kafilei'amiu na'a koe nokantibha wulano use tawa oleono Sabat. ²¹Wakutuu ana'a nandumandoo kasabha foliuno kabhibhiisa. Kasabha pedando ana'a miina'o nakopototo'a mpini pakatandano dhunia ampa ha'oleo ini, pakade paemo dua namendua nakumadhadhia. ²²Ane ibahano Ompu pae nakumuhangi tempono, kotika dumadino pae bhe so sumalamatino. Tamaka mba'inomo nandoo umati tipilino, Ompu nakumuhangi tempono.

²³Wakutuu ana'a ane bhe so mugauangko, 'Ondoe, aini'ae Mesias, Omputo Fosalamatino' tawa, 'Ondoe, atatu'ae Mesias', koe parasaea'omua. ²⁴Kapa'amo dabhahimo mabhino wutono Mesias, gaha'aitu suano. Dabhahi dua mpahaana-anabiino. Andoa na'a daehabu tanda-tanda tapa mentela bhe giu timentea'ono, patudhundo ane naembali damokolilino dua totono lalondo umati tipilino. ²⁵Tandai'eomu! Kosasawi'ae padamo afohatoangko'e'omu wawo inia. ²⁶Dadi'anomo ane mie dapugau ne hintimiu, 'Bhe Mesias Omputo Fosalamatino te pandaso bhalano', koe kalaomua; tawa, 'Mesias neka'uko weo boloku', koise parasaea'omua. ²⁷Kapa'amo kahato'ano Anano Manusia – Idimo ini – napototo bhe bhbihito, nakosilaka te mata oleo nasumela ampa we kansoopa. ²⁸Ne amai kobhangke'ano ne itumo kaefo'onu'ano kaa."

So kahato'ano Anano Manusia bhe kapalendano pu'uno ara

24:29-36

Mrk 13:24-32; Luk 21:25-33

²⁹"Sapalusino kasabha ana'a oleo nahohondomo, wula paemo nakotilangaa, kulipopo dapondawuti damai'ao te lani bhe kosasawi'ae waweno alamu naohungga. ³⁰Wakutuu ana'a natiwohamo kantandaino Anano Manusia te lani bhe sabhaha bansano liwu te dhunia ini daekangko'ae bhe daguguhu. Andoa daoha Anano Manusia te olu natiwoha weo kakalabhiano bhe kuasa bhalano. ³¹Duhulele bhalano nakondii. Anano Manusia natumudumo mala'ekatino dalamimba dahumompunao umati tipilino namai'ao ne kofatowala'ae alamu, mai'ao we tompano lani sewetano ampa we sewetano.

^a 24:17 Sakotu'uno: *ndumandoono te ato [potate'ano] koemo dosampu damesua dakoniala weo lambu.*

³²Soba poguhuomu ne pu'uno woh'a.^a Ane ha'a'ino notawomo ingka pande'aaneomu noma'omo nako'oleo. ³³Pedamo ana'a ane mohaemoomu kosasawi'ae kadhadhia nepulao'aoku sa'ituini pande'aanemoomu, noma'omo sepali'a tempono, ingka te wise-nomo fointo. ³⁴Amohatokoomu! Kotu-kotu'u mie dhamani aini pae'o daopulia damate, nakumadhadhiamo kosasawi'ae na'a. ³⁵O lani bhe dhunia naosali, tamaka wambaku ini pae bhe kasalia. ³⁶Ampamo kaowu oleono bhe tempono bhe seemie miina bhe mande'aanea. O mala'ekati te surugaa miina, Anano Manusia miina dua, mpahinomo wutono Amaku mande'aane.”

Katangahi so dakodhaga'ao

24:37-44

Luk 17:26-30, 34-36

³⁷“Peda koeatendo manusia ne dhamanino anabii Nuh, namedamo dua ana'a ne oleo kahato'ano Anano Manusia. ³⁸Ne dhamani ana'a, miina'o nahumatoda luano oe bhalano, o mie dohumaa dofoho'u, dogaa bhe dofogogaa sampe ne oleono anabii Nuh nopesua weo bhangka bhalano. ³⁹Andoa miina sepali'a damande'aanea o ae so kumadhadhiano, sampe nofonisidamo luano oe bhalano na'a. Nadamo dua ana'a ne oleono so kahato'ano Anano Manusia.^b ⁴⁰Wakutuu ana'a ane dahodua mie kumahadhaano te kaampo, seemie dawowo'oe, seemie dahumunsae. ⁴¹Ane dahodua hobhine tangasano megilino kahitela,^c seemie dawowo'oe, seemie dahumunsae.

⁴²Dadi'anomo kodhagaomu, kapa'amo miina mande'aaneomua oleo so kahato'ano Ompumiu. ⁴³Tandai'eomu! Ane kolambuno namande'aane naafa'i alo nahumatoe kaso'o teteweimo nakodhaga, pae tanakumatahomoa lambuno dalumeloe. ⁴⁴Dadi'anomo mantaa-ntaa'omu, kapa'amo Anano Manusia nahumato ne wakutuu tapa nepotu-potulu'ao.”

Kapalendano bhatua motuhuno lalo bhe modaino isikadhi

24:45-51

Luk 12:41-48

⁴⁵“La'ae bhahaa bhatua motuhuno lalo bhe mandeno maitu? Anoamo maitu nesangkeno kafeomp'u'ano so neangkando bhatua

^a 24:32 Sakotu'uno: *pu'uno ara*.

^b 24:37-39 Kej psl 6-8

^c 24:41 Sakotu'u'ano: *o gandum*.

bhaino, naetaganaanda daomaa napobutu bhe tempono. ⁴⁶No-kodawua mpuu bhatua na'a ane nohatofie kafeompu'ano tangasano noala'i gunano. ⁴⁷Amohatokoomu, kotu-kotu'u kafeompu'a na'a nasumangke bhatua aitu somo mande'aono sabhaha fehebua'ano. ⁴⁸Tamaka ane bhatua na'a mie modai sampe nakoduku we lalono, ⁴⁹'Ingka kafeompu'aku nandoo naompona maka nasumuli', maka namepeki bhatua bhaino bhe naomaa naoho'u napoowa bhe mie mololanuno. ⁵⁰Gaha'a kafeompu'ano tamba'omo nahumato, ne oleo tapa nepotu-potulu'ao, ne tempo tapa nenamu-namu. ⁵¹Bhatua ana'a namehaakebhae, kahukumuno napototoane bhe mie mehaa'ulano. Ne na'amo ta'o kangko'ae bhe ku'ino wangka."

Kapalendano doompulu kalambe
25:1-13

25 "Nahumato waktuu ana'a, Kafopahinta'ano Lahata'ala ta-pedamo doompulu kalambe, deala bhe kantaleando maka dokala dosumpui lo'ia bu'ou. ²Lidimano dokabhohe-bhohe, lidimano dopande. ³Kalambe'i kabhohe-bhoheno na'a dewowo'o kantalea tamaka miina daewowo'o bhe minando so katubhano. ⁴Kalambe'i mandeno dewowo'o kantalea pakade dewowo'o dua bhe minando ne kaentei'a sigao'ano. ⁵Gaha'a lo'ia bu'ou miina napikihatoa, tadempau sampe dofisiodo-odo'amo.

⁶Nofewunta'i alo notifetingkemo suaha nekei-kei ambano, 'Aitu'aemo! Lo'ia bu'ou nohatomo! Sumpui'eomu!' ⁷Kalambe ompuluno na'a lasao dowanu maka dofekataa'i kantaleando. ⁸Kalambe'i kabhohe-bhoheno na'a dopugaumo ne kalambe mandeno ambado, 'Wa'a kainsamiomu bhe insaodi minamiu itu naseendai, ingka kantalea mani ma'omo naopeo.' ⁹Tamaka kalambe mandeno tadotobhoosi, 'Paise, bhahaa pae nakumapo so wuto mani bhe so hintimiu. Labhi'ano kala me'oliomu we mahaasono.'

¹⁰Nandoo tangasano dokala de'oli mina, lo'ia bu'ou nohatomo. Toka mantaa-ntaano lasao dopesua weo lambu kahame-hame'a, dopoowa-owa bhe lo'ia bu'ou na'a. Pada aitu fointo do'ontoemo. ¹¹Gaha'a domaimo dua kalambe'i kabhohe-bhoheno sa'ituini, do-feabha ambado, 'Waompu, lengka kainsami fointo!' ¹²Tamaka lo'ia bu'ou na'a tanopugau ambano, 'Amohatokoomu, kotu-kotu'u miina amande'aangkoomua.' ¹³Dadi'anomo kodhagaomu, kapa'amo miina mande'aaneomua oleono bhe tempono."

Kapalendano dototolu bhatua

25:14-30

Luk 19:12-27

¹⁴“Kafopahinta'ano Lahata'ala tapedamo seemie kafeompu'a so kumalano we koliwuno. Nakumala kaowu nosali'imo bhatua'ino maka nopoulosahuna'aanda da'umondofao kanandoono. ¹⁵Seemieno nowa'ane lima kakadu dhoi bulawa,^a seemieno nowa'ane haa kakadu bhe seemieno nowa'ane sekakadu, nopoulosahataa bhe nepoo-poolindo seemie-seemie. Pada ana'a nokalamo. ¹⁶Bhatua metahimano dhoi lima kakadu na'a lasao nokala nopodagaane sampe nokolaba'ao dua lima kakadu dhoi bulawa. ¹⁷Bhatua metahimano haa kakadu nehabu dua peda na'a sampe nokolaba dua haa kakadu. ¹⁸Tamaka bhatua metahimano sekakadu kaowu lasao nokala neseli wite maka nokantano dhoino kafeompu'ano maitu.

¹⁹Nompona pada ana'a, kafeompu'ando nosulimo nopolentu bhe bhatua'ino. ²⁰Nomaimo bhatua metahimano lima kakadu na'a nowowo'o dua bhe labano lima kakaduno. Nopugaumo ne kafeompu'ano ambano ‘Waompu, lima kakadu wa'a kanau. Aini akolabaanemo dua lima kakadu.’ ²¹Ambano kafeompu'a na'a, ‘Nokesa sepali'a itua, hintu bhatua metaano bhe tumuhuno lalo. Notuhu lalomu ne taka mohobu, maka amosahuna'aangkomo taka bhalano. Pesuamo weo hame-hameku, pehapi'o dua bhe hintu ka'iaku ini.’ ²²Nomaimo dua bhatua metahimano haa kakadu, ambano, ‘Waompu, haa kakadu wa'a kanau. Aini akolabaanemo dua haa kakadu.’ ²³Ambano kafeompu'a na'a, ‘Nokesa sepali'a itua, hintu bhatua metaano bhe tumuhuno lalo. Notuhu lalomu ne taka mohobu, maka amosahuna'aangkomo taka bhalano. Pesuamo weo hame-hameku, pehapi'o dua bhe hintu ka'iaku ini.’

²⁴Kaowu nomaimo bhatua metahimano sekakadu bhe nopugau ne kafeompu'ano, ‘Waompu, apande'aane hintu mie mo'osano lalo. Otothe ne kaampo pata kae'ewi'amu, okape ne kaampo pata kamontisa'amu. ²⁵Dadi'anomo aote'i sampe dhoimu sekakaduno ini akantanoe. Aini sulimo ala'ao wutomu.’ ²⁶Nopugaumo kafeompu'a na'a, ‘Hintu ini bhatua modai bhe mantawano! Ingka pande'aanemo atobhe ne kaampo pata kae'ewi'aku, akape ne kaampo pata kamontisa'aku. ²⁷Fe'emo dhoiku itu moadae ne mie so mefowaweno dhoi, neanomo sasuliku, atumahimae bhe oeno. ²⁸Dadi'anomo alae'omu dhoi sekakaduno maitu maka wa'aneomu kodhoino ompulu

^a 25:15 Sakotu'uno: *talenta*.

kakaduno sa'ituini. ²⁹ Kapa'amo kokanandoono datumubhahiane ampa napontalabhi-labhi, tamaka tapa kokanandoono, o ae maka dua kanandoono damadae damala'ie. ³⁰ Bhatua tapa kofahalaa itu, ohoe'omu we simbali, weo doloma mposo. Ne na'a ta'o kangko'ae bhe ku'ino wangka.' ”

Kabhotusi ne Oleono Kiama

25:31-46

³¹ “Ane namai kaowu Anano Manusia weo kakalabhiano napo-owa-owa bhe kosasawindo mala'ekatino, maka naengkoha-ngkoha te kaengkoha'ano kumalabhiano. ³² Kosasawindo bansano liwu datihompu te wiseno maka napofelesaanda, pedamo dhagano dhumba nopogaati'ao dhumba bhe membe. ³³ O dhumba [ka'ibahatino mie dhumalangino kapoindalono Lahata'ala] namowada ne suanano; o membe [ka'ibahatino mie sigao'ano] namowada ne kemano.

³⁴ Omputo ana'a napugau ne mie we suanano ambano, ‘Maimo-omu, hintimiu nebarakatino Amaku, tahimamoomu Kafopahinta'a toka nefontaa-ntaano so hintimiu mpini pakatifokonandoono dhunia. ³⁵ Kapa'amo wakutuuno ao'aho pakande kanau'omu, wakutuuno nokekele wu'uku fefoho'uti kanau'omu, aembali mie humampe we liwumiu fobutu kanau'omu ne lambumiu. ³⁶ Wakutuuno miina akopakea fepakeani kanau'omu, aosaki fe'ondo kanau'omu, atitohongku mai umbati kanau'omu.’

³⁷ Mie banara na'a datumobhoosi ambado, ‘Waompu, saneafa bhahaa tawohako mo'aho maka tapakandeko tawa nokekele wu'umu maka tafefoho'utiko? ³⁸ Saneafa bhahaa tawohako membali mie humampe ne liwu mani, maka tafobutuko we lambu mani, tawa miina kopakea maka tafepakeaniko? ³⁹ Saneafa bhahaa mosaki tawa titohongku maka tamai taumbatiko?’ ⁴⁰ Omputo ana'a natumobhoosi ambano, ‘Amohatokoomu, kotu-kotu'u sabhaha nehabumiu ne bhahitieku foliuno kandidiki ini, ingka nopototomo habue'omu ne Idi.’

⁴¹ Pada ana'a napugaumo dua ne mie we kemano, ‘Gampiomu mai'ao ne wiseku ini, hintimiu mie nekangkanaino balaa! Pesua'omu weo efino narakaa tapa mopoopeono ampa suhue dhamani, toka nefontaa-ntaa so Kafeompu'ando seetani bhe mala'ekati sabhangka'ino. ⁴² Kapa'amo ao'aho miina makande kanau'omu, nokekele wu'uku miina mefoho'uti kanau'omu. ⁴³ Wakutuuno aembali mie humampe we liwumiu miina mobutu kanau'omu ne lambumiu, wakutuuno

miina akopakea'a miina mepakeani kanau'omu, aosaki bhe atitohongku miina mai umbati kanau'omu.'

⁴⁴Andoa na'a datumobhoosi, ambado, 'Waompu, saneafa bhahaa tawohako mo'aho tawa nokekele wu'umu, membali mie humampe tawa miina kopakea'a tawa mosaki bhaha'i titohongku maka miina ta'umondofaangkoa?' ⁴⁵Ambano dua omputo na'a, 'Amohatokoomu, kotu-kotu'u taenomo mokiidoomu metulumiomu seemie foliuno kandidiki ini, nopototomo mokiidoomu tumulumiomu Idi.'

⁴⁶Andoa ini damesua weo kakadee-dee suhue dhamani, tamaka mie banara dae'awa dadi suhue dhamani."

Patudhu damongko Yesus

26:1-5

Mrk 14:1-2;

Luk 22:1-2; Yoh 11:45-53

26 Palusi nofofoina'u'ao kosasawi'ae na'a, Yesus nopugaumo ne anaguhu'ino ambano, ²"Ingka pande'aaneomu hohaea'ano Paska tanaefua. Ne na'a Anano Manusia damowae ne kokuasano maka dakumantai'e te sau salipu." ³Wakutuu aitu neangka'indo imamumu bhe kamungkula'indo Yahudi dopohompu-hompu we lambuno Imamumu Bhalano konea'ano Kayafas. ⁴Andoa dopokana-kanagau de'ondofi akala dahumako Yesus maka damongkoe. ⁵Tamaka ambado, "Koise dohakoe ne matano hohaea'a, bhahaa tadohialele ra'eati."

Yesus nominakie seemie hobhine

26:6-13

Mrk 14:3-9; Yoh 12:1-8

⁶Yesus nohato we liwuno Betania, ne lambuno Simon kokuli modaino endefi'ini. ⁷Gaha'a tanosihato'amo seemie hobhine neowa kabuto-butolo kani^a nopono'ao mina-mina kawondu mo'ali'ano sepali'a. Sahatono mina-mina kawondu na'a nosungkae ne fotuno Yesus. Wakutuu ana'a Yesus tangasano nohumaa. ⁸Dowoha peda maitu anaguhu'ino nohehewu lalondo sampe dopugau ambado, "So ae gaha'a mina-mina aitu dopokadai-daiane?" ⁹Kapa'amo mina-mina aitu no'ali sepali'a, fe'emo naembali damasoe makaolino dama'andae mie mokae." ¹⁰Tamaka Yesus nopande'aane fekihi-ndo sampe nopugau ambano, "Noafa gaha'a hobhine aini fekasabhaaneomu? Ingka anoa ini nohabu metaa ne Idi. ¹¹Mie mokae sadhia dapobhai bhe hintimiu, tamaka Idi ini pae aeate kansuhu

^a 26:7 Sakotu'uno o kabuto-butolo ini nomai'ao ne kontu kapute nekonando pualam.

bhe hintimiua. ¹²Hobhine aini nominakiemo wawo mbadhaku ini, somo katokano humato dakumobuhu kanau. ¹³Amohatokoomu, kotu-kotu'u ne amai maka dua so katifolele'ano Bhihita Metaa ne koseka'ewa'ae dhunia ini, habuno hobhine ini dasumambilie dua somo kafe'ulaino.”

Isikadhi modaino Yudas

26:14-16

Mrk 14:10-11; Luk 22:3-6

¹⁴Pada ana'a seemie mai'ao ne anaguhuno ompulu hoduanu konea'ano Yudas Iskariot, nokalamo ne meangka'indo imamu. ¹⁵Nopugaumo, “Ma'a kanau'omu ae ane aowaangkoomu Yesus?” Lasao de'epiane tolu fulu woka pera maka dowa'ane. ¹⁶Notandamo ne na'a Yudas ne'ondofi katolala metaa so namowa'ao Yesus ne andoa.

Yesus nopoharoa'ao Paska bhe anaguhu'ino

26:17-25

*Mrk 14:12-21; Luk 22:7-14,
21-23; Yoh 13:21-30*

¹⁷Nohatomo oleo katanda'ano hoha'ano Roti Pata Koragi'ano. Domaimo anaguhu'ino dofeena ambado, “Taefotoka ne amai bhahaa gaomua so dapoharoa'ao'omu Paska?” ¹⁸Notobhoosimo Yesus ambano, “Kalaomu we kota maka fohatoomu mie popande'aku, putae ambano guru, “Tempoku noma'omo nahumatoa, gaoku apoharoa'ao Paska bhe anaguhu'iku we lambumu.’” ¹⁹Pada aitu anaguhu'ino dokalamo doangkafi katudu'aono Yesus, defotoka haroano Paska.

²⁰Nohondo oleo Yesus nengkohamo nohumaa nopombali-mbali bhe anaguhuno ompulu hoduanu. ²¹Tangasano dohumaa nopugau-mo ambano, “Amohatokoomu, kotu-kotu'u seemie ne olotamiu ini namowa kanau ne limando kaewa.” ²²Nokompeaha sepali'a lalondo sampe seemie-seemie dofeenamo ambado, “O idi bhahaa Waompu?” ²³Ambano Yesus, “Metandano roti weo pihi poowa bhe Idi, anoamo itu so mowa kanau ne limando kaewa. ²⁴Daanumo Anano Manusia – Idimo ini – tetewei namate peda tibuhino weo Kitabino anabii. Tamaka nobalaamo mie so mowano Anano Manusia ne limando kaewa. Mie ana'a netaamo koemo nolentea.” ²⁵Yudas so mowano Yesus ne kaewa nofeenamo dua, “O idi bhahaa Guru?” Ambano Yesus, “Pedamo pugauamu itu.”

Haroano Ompu

26:26-29

*Mrk 14:22-25;
Luk 22:15-20; 1Kor 11:23-25*

²⁶Tangasano dohumaa, Yesus nealamo roti maka nefoampe katumpuno lalo ne Lahata'ala. Roti ana'a nobhebhehaemo maka nowa'andae anaguhu'ino bhe nopugau ambano, "Alae'omu maka humaa'eomu, mbadhakumo inia." ²⁷Palusi ana'a nealamo dua kampoho'u'a, nefoampe dua katumpuno lalo ne Lahata'ala maka nowa'andae anaguhu'ino. Ambano, "Foho'uomu kosasawimiu mai'ao ne kampoho'u'a aini. ²⁸Heakumo inia. Heaku ini damotuhue so mie bhahi, somo mekatangkano podhandino Lahata'ala bhe manusia, somo dua kati'amponi'ano dhosando. ²⁹Amohatookomu, notanda aitu paemo aoho'ua angguru ampa oleono aoho'u angguru bu'ou, apoowa-owa bhe hintimiu weo Kafopahinta'ano Amaku."

Petrus nagumaga miina dapopande'ao bhe Yesus

26:30-35

*Mrk 14:26-31;
Luk 22:31-34; Yoh 13:36-38*

³⁰Pada delagu-lagu dopudhi Lahata'ala, dokalamo te kabhawono Zaitun. ³¹Nopugaumo Yesus ne anaguhu'ino ambano, "Alo aini naohungga kaparasaeamiu mba'inomo Idi, sampe humunsa kanau'omu. Kapa'amo nandoo tibuhino weo Kitabino anabii, 'Dhagano dhumba amongkoe, gulumano dhumbano datigasa.'^a ³²Tamaka amanu kaowu mai'ao ne mate ama'indulukikoomu we Galilea." ³³Petrus notobhoosimo ambano, "Mahinggamo kosasawindo naohungga kaparasaendo mba'inomo Hintu sampe dahumunsako, o idi paise." ³⁴Ambano Yesus, "Amohatoko, kotu-kotu'u alo aini dua pae'o nakumakuhua manu, natolu pakumo gumaga miina mande'a kanau." ³⁵Ambano dua Petrus, "Mahinggamo amate bhe Hintu, pae sepali'a agumagaa." Anaguhu'ino sigao'ano sanea dua dopugau peda na'a.

Yesus nosambahea te kaendeano Getsemani

26:36-46

Mrk 14:32-42; Luk 22:39-46

³⁶Yesus bhe anaguhu'ino dohatomo te kaendea konea'ano Getsemani. Nofohatomo anaguhu'ino ambano, "Mengkoha-ngkohaomu ne ini nandoo akumala asumambahea ne tatu." ³⁷Petrus bhe kohodua'indo anano Zebedeus, nowowo'oda. Notandamo ne itu

^a 26:31 Zak 13:7

nokompeaha sepali'a lalono bhe nokakenda-kenda handano. ³⁸ Nopugau ne anaguhu'ino totoluno maitu, “Nokompeaha sepali'a laloku, kao-kaomo amatemo. Mengkoha-ngkohaomu ne ini, mekambotoomu bhe kodhagaomu pobhai kanau'omu.” ³⁹ Yesus nopansuhu seendai te wise maka nolongko ne wite nosambahea ambano, “Ama, ane naembali fogampi kana'e kasabha so netompaloiku itu,^a ampamo kaowu koise angkafi kapoindaloku tamaka ta'ampamo kapoindalomu.”

⁴⁰ Pada ana'a nosulimo se anaguhu'ino, gaha'a nohatofida doodomo. Nopugaumu ne Petrus ambano, “Pae tumahaomu bhahaa mekambotoomu nasedhamu pobhai kanau'omu? ⁴¹ Mekambotoomu bhe sambahea'omu, keana nokantibhakoomu kasoba. Daanumo totono lalo neangka, tamaka o mbadha nonale.” ⁴² Fendua toha nokala nosambahea ambano, “Ama, ane kasabha aini pae naembali mogampie, tamaka tetewei atumompaloie, ta'ampamo kapoindalomu so kumadhadhia'ano.”

⁴³ Nosuli se anaguhu'ino nohatofida toha doodo mba'inomo dempaumo sepali'a. ⁴⁴ Miinamo nadumiu-diuda, tanokalamo toha nosambahea, kakapono tolu paku. Sambaheano nopototo bhe sa'ituini.

⁴⁵ Pada ana'a nosulikimo anaguhu'ino maka nopugauanda, “Nandoo dua moodoomu bhe mewuleomu bhahaa? Ingka nohatomo tempono Anano Manusia daowae ne limando mie kodhosa. ⁴⁶ Wanumoomu dokalaanaomu! Woha itu, mie so mowa kanau noma'omo.”

Yesus dohakoe

26:47-56

Mrk 14:43-50;

Luk 22:47-53; Yoh 18:1-11

⁴⁷ Tangasano Yesus nopugau, nohatomo Yudas, seemie mai'ano ne anaguhuno ompulu hoduano. Yudas maitu nohato nopoowa bhe mie bhahi metaguno kampue bhe kawangku. Mie bhahi na'a dotududa neangka'indo imamumu bhe kamungkula'indo Yahudi. ⁴⁸ Yudas padamo nofohatoanda tanda peda aini, “Mie so newonoku, anoamo itu. Hakoomu.” ⁴⁹ Yudas lasao noma'oti Yesus bhe nopugau ambano, “Peda ae itua guru?” poowa nowonoe. ⁵⁰ Yesus nofeenamo ambano, “Sabhangka, aitu'aemo kahato'amu?” Mie bhahi lasao dodhulupi Yesus maka dohakoe.

^a 26:39 Sakotu'uno: *fogampi kanau kampoho'u'a so kafoho'u'aku ini.*

⁵¹Gaha'a seemie pobhai'ano Yesus nokoalemo limano nobuna kampueno maka notowe bhatuano Imamu Bhalano, nondawu bhe tingalano. ⁵²Ambano Yesus ne mie ana'a, "Pusoloe kampueno itu, kapa'amo kotika mepakeno kampue namate'ao dua kampue. ⁵³Ingka naembali aetondala ne Amaku naetudu mala'ekati datumulumi kanau, mahingga nakolabhi naompulu haa tagua. ⁵⁴Ta'ampamo kaowu ane nada na'a, ingka pae nako'ulaa tibuhi'ano weo Kitabindo anabii putae tetewei nakumadhadhia peda aini."

⁵⁵Pada aitu Yesus nopugau ne mie bhahi ambano, "Kona kanau'omu mie modai gaha'a sampe metaguomu kampue bhe kawangku maka humako kanau'omu? Ingka se'o-se'oleo aengkohangko afofoina'u weo Lambuno Lahata'ala, tamaka miina humako kanau'omua. ⁵⁶Ampamo kaowu kosasawi'ae ini nokadhadhia so noko'ula'ao tibuhi'ano weo Kitabindo ana-anabii." Pada aitu kosasawindo anaguhu'ino dofileimo tadohunsae nomoisa.

Yesus ne wisendo Sahano Agama

26:57-68

Mrk 14:53-65; Luk 22:54-55, 63-71; Yoh 18:12-14, 19-24

⁵⁷Pada dohakoe, Yesus dowowo'oemo te wiseno Imamu Bhalano konea'ano Kayafas. Ne itu dohompumo pande-pande Kitabi bhe kamu-kamungkula'i miendo Yahudi. ⁵⁸Petrus noangka-angkae we kodo'ono sampe nohato we kadeteno lambuno Imamu Bhalano. Hato nopesua nengkohamo bhe dhumagano, patudhuno na'umondo-ondo kapalusi'aono kosasawi'ae maitu. ⁵⁹Neangka'indo imamu bhe kosasawindo Sahano Agama de'ondofi tingku pata kumotu'u, nomuda'ao dabhotusi damongko Yesus. ⁶⁰Tamaka miina dae'awaa, mahingga dobhahi sakusii mepaha-pahano. Panda-pandano doehe-mo dohodua, ⁶¹ambado, "Mie aini nopugau namondo'e nahumungga Lambuno Lahata'ala, maka ne katolu oleono namooliemo dua namoehee."

⁶²Imamu Bhalano noehemo maka nopugau ne Yesus, ambano, "Pae tumobhoosiea gaha'a kasangkatindo ne hintu ini?" ⁶³Tamaka Yesus miina nakodiua. Nopugaumo dua Imamu Bhalano ne Yesus ambano, "Aitu bhe Lahata'ala fo'ondo-ondono, fohato kainsami, hintumo ini Omputo Fosalamatino Anano Lahata'ala bhaha'i suano!"

⁶⁴Ambano Yesus, "Ingka pedamo pugaumu itu. Ampamo kaowu amohatoko, notanda aitu mohaomu Anano Manusia naengkoha ne

suanano Lahata'ala kokuasano, mohae'omu namai te wunta-wunta-
no olu te lani.”^a

⁶⁵Nofetingke peda na'a Imamu Bhalano lasao nopobhensi'ao pakeano bhe nopugau ambano, “Aitumaka! Mie aini ingka nofeka'aebumo Lahata'ala, nopototo'ao wutono bhe Lahata'ala! So dua ae gaha'a dae'ondofi sakusii? Ingka fetingkeemoomu na'a. ⁶⁶Peda amai fekihimi?” Dotobhoosimo ambado, “Anoa ini nokoka'ala, tetewei damongkoe!” ⁶⁷Pada aitu dokapehasi ulano bhe dotumbusie; sigao'ano dohambisie, bhe dopugau ambado, ⁶⁸“Alee Omputo Fosalamatino, soba bhoto, nohambisiko la'ae itua?”

Petrus nogagai'e miina namande'ao Yesus

26:69-75

Mrk 14:66-72; Luk 22:56-62;

Yoh 18:15-18, 25-27

⁶⁹Tangasano Petrus nengkoaha-ngkoaha we kadete, nomaimo seemie bhatua hobhine ambano, “Ingka hintu ini dua sadhia pobhai bhe Yesus, mieno Galilea maitu.” ⁷⁰Tamaka Petrus nogaga ne wisendo kosasawindo maitu ambano, “Miina amande'aanea ma'anano pugaumu na'a.” ⁷¹Hato nokala se fointono kadete, nowohaemo dua bhatua hobhine sigao'ano. Bhatua na'a nopugaumo ne mie meehe-eheno ne itu ambano, “Mie aini nopobhai bhe Yesus miendo Nasaret maitu.” ⁷²Petrus nopugaumo toha bhe nofemata, “Mie amaitu miina amande'aanea.” ⁷³Miina naompona domaimo dua mie meehe-eheno ne itu dopugau ne Petrus, ambado, “Teteweimo hintu ini seemie dua sabhangka'indo, notipande'ao ne wambamu.” ⁷⁴Petrus nofemata bhe nobhatata'iao wutono, “Miina amande'aanea mie ana'a!” Gaha'a nopobutu nokakuhuamo manu. ⁷⁵Petrus nofe'ulaimo pugauno Yesus, “Pae'o nakumakuhua manua, natolu pakumo gumaga miina mande'a kanau.” Pada ana'a no limbamo bhe no'ae, nokompeaha sepali'a lalono.

Yesus dowowo'oe ne wiseno Pilatus – Kamate'ano Yudas

27:1-10

27 Hato nomentae kosasawindo neangkando imamu bhe kamu kamungkula'indo Yahudi domafakamo damongko Yesus. ²Dadi'anomo Yesus dokatapuanemo hante maka dowowo'oe, dofoowae ne wiseno Pilatus, gubernur ne kadie aitu.

^a 26:64 Mzm 110:1; Dan 7:13

³Nowoha Yesus dohhotusie damongkoe, Yudas nososomo. Anoa-mo ini mowano Yesus ne andoa maitu. Dadi'anomo dhoi tolu fulu woka perano lasao nofosulie ne meangka'indo imamumu bhe kamungkula'i, ⁴bhe nopugau ambano, "Ingka akodhosamo aeowangkomu heano mie tapa koka'ala." Tamaka tadotobhoosi ambado, "Ingka suano nepande'ao mania, nopulimo ne wutomu!" ⁵No-fetingke peda na'a Yudas nokabhambi dhoi amaitu weo Lambuno Lahata'ala, maka nokala nokantai wutono.

⁶Neangka'indo imamumu dotawunaomo dhoi amaitu bhe dopugau ambado, "Dhoi aini olinu hea. Weo tubhono agamantoomu dhoi aini pae naembalia damopesua'e weo sohonganu kapopanga." ⁷Dadi'anomo domafakamu dhoi ana'a de'oliane wite nekonando witenu pande nu'ua. Wite ana'a somo katikobuhu'ando mie mengkahato. ⁸Dadi'anomo wite aitu ta'ampamo ha'oleo ini dokonae Wite Hea. ⁹Pedamo na'a noko'ulamo bhoasaono Lahata'ala nefosampe-no anabii Yeremia, "Andoa detahima tolu fulu woka pera, dhoi netandua'aondo miendo Israel mbali olinu mie ka'olindu. ¹⁰Dhoi ana'a de'oliane witenu pande nu'ua, nopobutu bhe katudu'aono Ompu ne idi." ^a

Yesus ne wiseno Pilatus.

27:11-26

*Mrk 15:1-15; Luk 23:1-5,
13-25; Yoh 18:33-19:16*

¹¹Yesus neehe-ehemo ne wiseno gubernur. Nofeenaemo gubernur na'a ambano, "Nokotu'u hintumu ini omputo miendo Yahudi?" Ambano Yesus, "Pedamo pugaumu na'a." ¹²Tamaka hatu dosangkatie neangka'indo imamumu bhe kamu-kamungkula'i, Yesus miina sepali'a natumobhoosida. ¹³Nopugaumo Pilatus ne Yesus ambano, "Miina metingkea bhahaa sabhaha nesungku'aondo inia?" ¹⁴Tamaka bhe nasewobha miina natumobhoosida sampe gubernur nopuli menteno.

¹⁵Nembalimo dua kanea ne oleono hohaea'ano Paska, gubernur nefolimba seemie katohongku ampa kapoindalondo mie bhahi. ¹⁶Wakutuu aitu nandoo seemie katohongku notiende-ende kamie modaino, neano Yesus Barabas. ¹⁷Dadi'anomo hatu dosihompumu mie bhahi ne itu, nofeenadamo Pilatus ambano, "Amolimbaangkomu la'ae bhahaa kapoindalomiu, Yesus Barabas, bhaha'i Yesus

^a 27:9-10 Zak 11:12-13

nekonando Kristus?”¹⁸ Pilatus nopande'aane putae kamungkula'indo Yahudi doowa Yesus ne wiseno, mba'inomo kakonduano lalondo.

¹⁹Tangasano Pilatus nengkoha-ngkoha ne kaengkoha'a kae-bhotusi'a parakara, nohatomo kaowili mai'aono ne mieno lambuno, ambano, “Fosipuli wutomu ne parakarano mie pata koka'alano maitu, kapamo mohondo weo nifiku akadee-deeanemo.”²⁰ Tamaka neangka'indo imam bhe kamu-kamungkula'i dowudhu mie bhahi daesalo namolimbaanda Barabas, maka Yesus damongkoe.

²¹Gubernur nofeenadamo dua ambano, “Mie hoduno ini amolimbaangkoomu la'ae bhahaa kapoindalmiu?” Ambado, “Barabas!”²² Ambano dua Pilatus, “Ane nada na'a, kaowu amafa'ianemo Yesus nekonando Kristus?” Kosasawindo dokei, “Dakumantai'e te sau salipu!”²³ Ambano dua, “Tamaka podiu modai ae gaha'anehabuno?” Tamaka andoa tanodhulu ka'osa dokei ambado, “Tewe wei dakumantai'e te sau salipu!”

²⁴Pilatus nopande'ao lalono sabhaha dhala paemo nakofahala'a, pakade mie bhahi maitu kao-kaomo daehabumo kahungga. Dadi'anomo nealamo oe maka newanu ne wisendo mie bhahi bhe nopugau ambano, “Miina akoka'ala ne heano mie aini; nopulimo ne wutomiu.”²⁵ Kosasawindo ra'eati dotobhoosi ambado, “Hunsa'anomo mateno mie aini tatumongkue insaodi bhe sampu'a mani.”²⁶ Pada aitu gubernur nofolimbaandamo Barabas, tamaka Yesus dohambisiane habuta maka nowa'andae dakumantai'e te sau salipu.

Yesus dopokafutaa'iane.

27:27-31

Mrk 15:16-20; Yoh 19:2-3

²⁷Pada ana'a tantara'ino gubernur doowamo Yesus se kamalino kaebhotusi'a parakara, maka kosasawindo tantara dolo'oida dapohompu-hompu dolibu-libu Yesus.²⁸ Pakeano dolembie, maka dofokanaane dhuba wungo, pakeando kolaki.²⁹ Dekinianemo dua songkono omputo mai'ao ne ha'ano sau kokihi, maka dofokanae ne fotuno. Dowa'ane dua kakebhano wulu dofointahaane ne suanano, peditandano omputo. Pada aitu dosudhumo dopahasombasombai'e ambado, “Somba Waompu, omputo miendo Yahudi!”³⁰ Dokapehasie poowa doala wulu na'a maka dohambie ne fotuno. Pada doele-eele peditandano na'a, dhuba wungo dolembiemo maka suli dofokanaane pakeano wutono.³¹ Palusi aitu dowowo'oemo we simbali, dakumalamo dakumantai'e te sau salipu.

Yesus dokantai'e te sau salipu

27:32-44

*Mrk 15:21-32; Luk 23:26,
33-43; Yoh 19:17-24*

³²Tangasano dohope we simbalino kota, dopo'awa'aomo seemie miendo Kirene konea'ano Simon. Tantara dofosuhu mie aitu natumongku sau salipuno Yesus. ³³Kaowu dohatomo te kabhawo nekonando Golgota, ma'anano ka'uada. ³⁴Ne itu Yesus dofefoho'uti-anemo angguru dosaloane bhe ufeino, tamaka pada nofenamie, nokiido naoho'ue.

³⁵Pada dokantai Yesus te sau salipu, tantara andoa maitu dodawu-dawumo pakeano. Mbali notipande'aoane dawuno seemie-seemie, dopodaduane. ³⁶Kaowu dengkoha-ngkoha ne itu dodhaganie. ³⁷Te wawono fotuno defopikaane kabuhi, tingkunomo katisalipu'ano. Wambano peda aini, "YESUS, OMPUTO MIENDO YAHUDI." ³⁸Nandoo dua dohodua mie modai nekantaindo te sau salipu nopoowa bhe Yesus, seemie ne suanano, seemie ne kemano.

³⁹Mie lumalono ne itu dofeka'aebue bhe dofoule-ule fotundo, ⁴⁰ambado, "Hintumo itu gaha'a so humunggano Lambuno Lahata'ala maka ne katolu oleono moeheemo dua! Fosalamatati wutomu ane kotu-kotu'u hintumo itu Anano Lahata'ala. Sampu'o toha mai'ao te sau salipu itu!" ⁴¹Pedamo dua aitu neangka'indo imam, pandepande Kitabi bhe kamu-kamungkula'i doele-elee dua ambado, ⁴²"Mie sigao'ano nofosalamatida, gaha'aitu wutono miina namooliea. Ingka anoamo itu omputono Israel, naetaa nasumampu mai'ao te sau salipu tamarasaea'ao dua bhe insaodi. ⁴³Ingka noposahun'ao ne Lahata'ala. Ane namoindaloe, naetaamo Lahata'ala so mosalamatie. Kapa'amo padamo nopugau, 'Idi ini Anano Lahata'ala.'" ⁴⁴Mahingga mie modai hoduano tisalipuno ne sohihi-no dowambakie dua.

Kamate'ano Yesus

27:45-56

*Mrk 15:33-41;
Luk 23:44-49; Yoh 19:28-30*

⁴⁵Hambi ompulu haa mata pana oleo kosekadie'ae na'a no-dapoe kahohondo, ampa hambu tolu mata ma'oleo. ⁴⁶Hambuhambu tolu mata Yesus nolo'oimo nofekandii-ndii ambano, "Eli, Eli, lama sabaktani?" Ma'anano, Lahata'alaku, Lahata'alaku, noafa hunsa

kanau'ao?^a 47 Dofetingke peda na'a seemie hodua meehe-eheno ne itu dopugaumo ambado, “Ingka nolo'oi anabii Elia.” 48 Seemie lasao notende neala kapa^b maka nolondoe weo angguru mokolo, pada aitu notei'e ne wulu maka nofefoho'uti Yesus. 49 Tamaka mie sigao'ano dopugau ambado, “Koise, ondo-ondo kaitae'omu bhaha'i kaowu anabii Elia namai namosalamatie.”

50 Yesus nokei toha nofekandii-ndii maka nofosipuli inawano. 51 Gaha'a tamba'omo kai bhalano mbali kahondomi weo Lambuno Lahata'ala nopobhensi mai'ao te wawo ampa we panda.^c Tanonandoomo dua lualino wite, nokosaka-saka bhe kabhawondo kontu. 52 Nandoo dua lia kafokobuhu'a tilengka'ano bhe dobhahi mie mongkilono dowanu mai'ao ne mate. 53 Hato kawanu'ano Yesus nomai'ao ne mate, andoa ini dolimbamo dua mai'ao weo kobuhundo maka dopesua we kota mongkilo. Ne itu dofotiwoha wutondo bhe dobhahi mie mohada.

54 Neangkando tantara bhe tantara dhumaganino Yesus dote'i sepali'a dowoha lualino wite bhe sabhaha kumadhadhia'ano sampe dopugau ambado, “Kotu-kotu'u mie aini Anano Lahata'ala.” 55 Ne itu dobhahi dua hobhine umondono se kodo'ono. Andoa ini mangkafino Yesus domai'ao we Galilea mbali umondofaono kafaraluuno. 56 Ne olotando andoa maitu nandoo Maria Magdalena, Maria inando Yakobus bhe Yusuf, bhe inando ana'ino Zebedeus.

Yesus dokobuhue

27:57-61

Mrk 15:42-47;

Luk 23:50-56; Yoh 19:38-42

57 Nohondo oleo nomaimo seemie hangkaea mai'ao ne liwuno Arimatea, neano Yusuf. Anoa ini nembalimo dua mangkafino Yesus. 58 Nokalamo ne Pilatus nesalo maeatino Yesus. Dadi'anomo Pilatus notududamo dama'ane. 59 Do'unda'aane kaowu, Yusuf noalamo maeatino Yesus maka nowaluane bhalatu monggela'ano. 60 Pada aitu nofondoleemo weo kobuhu bu'ou fehebua'ano wutono. Kobuhu ana'a dopatotae ne kabhawono kontu, dohabue peda katuno lia. Anoa nedole kontu bhalano mbali kasongkono wobhano lia maka nokala. 61 Maria Magdalena bhe Maria sigao'ano tadengkoha-ngkohamo ne itu, ne wiseno kobuhu na'a.

^a 27:46 Mzm 22:1

^b 27:48 Sakotu'uno: *spons*, kambeano pasi motatano.

^c 27:51 Kel 26:31-33

Kobuhuno Yesus dothaganie
27:62-66

⁶²Hato nomentae, oleonomo Sabat.^a Gaha'a neangka'indo imamu bhe miendo Farisi dosikala-kala'a dopo'awa'ao Pilatus. ⁶³Ambado, "Waompu, tafe'ulai pugauno fobhohe-bhohe'ino maitu waktuu nandoo nodadi. Ambano ne katolu oleono namanumo mai'ao ne mate. ⁶⁴Dadi'anomo fotudumo dadhumagani metaa'e kobuhuno ampa tolu oleo ini. Ane paise bhahasaa domai anaguhu'ino dambolaku maeatino maka damugau ne ra'eati putae Yesus maitu nowanumo mai'ao ne mate. Ane nada na'a, kabhohe-bhohe'i mbuhumaino ini nasedhulu'a dua kadahasino bhe ma'indulu'ano." ⁶⁵Ambano Pilatus, "Aini'adamo so dhumagano. Kalamoomu maka dhagani metaa'eomu kobuhu ana'a." ⁶⁶Pada peda na'a dokalamo dotandai kasongkono kobuhu na'a keana dodiu-diu'e, maka detudu tantara dothaganie.

Kawanu'ano Yesus.
28:1-10

Mrk 16:1-8;
Luk 24:1-12; Yoh 20:1-10

28 Nopalusi oleono Sabat, saowalano kamentae ne oleono Ahadhi, Maria Magdalena bhe Maria sigao'ano dokalamo da'umondo kobuhuno Yesus. ²Gaha'a tamba'omo nandoo luali mo'osa, mba'inomo seemie mala'ekatino Ompu nosampu nomai'ao te surugaa, nokala nodole kontu kasongkono kobuhu maka nengkohe te wawo. ³Ulanu nokotilinga pasae bhbihito, pakeano nopute peda kambano kapa.^b ⁴Tantara dhumagano ne itu nongkuda kate'indo sampe dotiwata pasa'ida mie mate.

⁵Tamaka mala'ekati amaitu nopugaumo ne hobhine'i ana'a ambano, "Hintimiu, koise mote'iomua! Ingka apande'aane ondofiomu Yesus tikantai'ano te sau salipu. ⁶Miinamo bhe anoa ne ini. Nowanumo mai'ao ne mate pedamo pugauno endefi'ini. Mai ondoe'omu kandole'ano. ⁷Aitu lasao kalaomu maka fohatoomu anaguhu'ino putae Yesus nowanumo mai'ao ne mate. Anoa nopa'induluki-koomu we Galilea. Ne tatu mohaemoomu. Tandai'eomu, ingka padamo afohatoangkoe'omu inia."

^a 27:62 Sakotu'uno: *nopalusimo oleo kaefotoka'a oleono Sabat.*

^b 28:3 Sakotu'uno: *nopute peda salju.*

⁸Dofetingke peda na'a, lasao dohunsa kobuhu na'a bhe dotende damohato anaguhu'ino. Ponamisindo dote'i tamaka do'ia dua sepali'a. ⁹Gaha'a tamba'omo nosumpuida Yesus bhe nofeabhada ambano, "Kabarakati so hintimiu." Lasao doma'otie, dosudhu dohako a'eno bhe dotaohao sambado. ¹⁰Nopugaumo dua Yesus ambano, "Koise mote'iomua, kala fohatoomu bhahitie'iku dakumala we Galilea, ne tatu damoha kanaumo."

Pahando Sahano Agama.

28:11-15

¹¹Tangasano hobhine'i sa'ituini we laano sala, tantara dhumagano dosulimo we kota detula-tula'ao kosasawi'ae kumadhadhia'ano na'a ne meangka'indo imam. ¹²Pada dopugau-gau bhe kamungkula'i dohhotu'aomo tantara maitu dowanda dhoi dofe-kabhahie, ¹³bhe dopugauanda ambado, "Pugau'omu putae anaguhu'ino doso'o maeatino Yesus tangasano moodomu. ¹⁴Ane nametingke gubernur, mada'o tamohatoe insaodi so nomalu'ao lalono, keana nokakenda-kenda handamiu." ¹⁵Tantara maitu doalamo dhoi ana'a maka defolele peda kaowilindo kamungkula'i sa'ituini. Tula-tulamo ana'a lumele'ano ne miendo Yahudi ta'ampamo ha'oleo ini.

Pahinta daefolele Bhihita Metaa

28:16-20

¹⁶Pada aitu anaguhu'ino ompulu seemieno dokalamo we Galilea, te kabhawa toka nefotantuno endefi'ini. ¹⁷Hato dowoha Yesus ne itu, dosudhumo dotaohao sambado, tamaka nandoo dua poibhahano. ¹⁸Yesus noma'otidamo bhe nopugau ambano, "Sabhaha kuasa te surugaa bhe we dhunia ini nowa'a kana'e Amaku. ¹⁹Dadi'anomo kalaomu, owadaomu sabhaha bansano liwu daembali anaguhu'iku. Kadiudaomu, weo neano Ama bhe Ana bhe Rohino Lahata'ala. ²⁰Foina'udaomu damangkafi sabhaha pahinta nefohato'aoku ne hintimiu. Maka tandai'eomu, sadhia apobhaiangkoomu ampa kafetompaino dhamani."